

Selîm Biçûk

RÊZIMANÊ  
KURDÎ

(Kurmancî)



Weşanên  
ÎNSTÎTUYA KURDÎ

Selîm Bîçûk

RÊZIMANÊ  
KURDÎ

(Kurmancî)

Weşanên  
Înstîtûta Kurdî

Wêşanên  
**ÎNSTÎTÛTA KURDÎ**  
Ji bo Lêkolîn û Zanist

**Çapa Yekemîn:** Adar 1977

Finowstr. 27, HH, 4. Etage  
12045 Berlin  
Tel: 0049-30-682 11 45  
Fax: 0049-30-681 02 43

**ISBN: 3-930943-19-0**

## *Ji dêvla Pêşgotinê*

Înstîtûta Kurdî Ji bo Lêkolîn û Zanist weşandina xebatên lêkolînî ji bo berzkirina nixên Kurd û Kurdistan ji xwe re kiriye armanc. Ji aliyekî ve rê dide lêkolînên nû daku zanist xwe bide pêş, ji aliyê din dixwaze lêkolînerên ciwan bi kar û xebatên ramyarî rabin.

Peylêçûna xurtî û qelsiya berhemana ji bo kûrkirina beşên zanist ji bo civaka Kurd pêwîstiyek nîşan dide? Em bi rexne û nixandinên zana û xwendevanên xwe dikarin karê zanistî pêş ve bibin, lêkolînên heja biafirînin. Lêkolînên zanistî bê rexne û şiroveyên zanistî xurt nabin; ev yek, wî mafê dide her xebatê ku li hêviya nixandinan bin.

Em karê xwe hîn di pêvejoka destpêkê de dibînin ji ber vê yekê jî, baweriya me ji hertiştî zêdetir ew e ku xebatên me di nav xwe de gelek kêmasiyan dihewînin. Em ji rexneyên li ser kêmasî û şaşîyan ji bo berhemên pêşerojê hêz digirin. Em ji wê yekê aciz in ku dostên me çavên xwe li kêmasî û şaşîyan bigirin û hertim lêborîné deynin ber xwe daku karê me hîn di destpêkê de ne.

Birêz Selâm Biçûk bi salan e li ser Rêzimanê xwe yê Kurdî dixebite. Ew bi xwe, di baweriya pêşketinê di rexne û nixandinan de dibîne, ji ber vê yekê jî, xebata xwe bi awayî ku di destê we de ye, pêşkêş dike. Înstîtûta Kurdî rexne û nixandin dide ser xwendevanan û ramana xwe ya li ser xebatên wisa di nav kar û xebatên xwe yên zanistî de, bi mînakên hîn pêşvetir destnîşan dike. Ev xebat jî, ji hêla Înstîtûtê destnîşanek e.

Înstîtût li hember her karên zanistî ku di rêza wê de dentîkevin, xwe berpirsiyar dibîne; ger li ser xebatan bi tîrahî nerawestabe jî.

Di hin pirtûkên me yên berî niha de hin kêmasî û şaşî hebûn lê mixabîn rexneyên bi nivîs heta vê demê negihîştine nivîskarên me. Hin rexneyên devkî pêşkêş bûne; ew rexne jî, mîna mirov ji lêkolînvanan hêvî dike, ne xwediyê cesaret in ku li ser xebatan bi kûrahî tesîr bikin.

Hêviya me, em giş bi hev re eniya rewşenbûrî û zanistî xurt bikin!

Înstîtûta Kurdî

Ji bo Lêkolîn û Zanist

Adar 1997

## Naverok

Pêşgotin.....	7
1. Ziman, rêziman û hêmanên zimanê kurdî.....	10
1.1 Ziman çi ye.....	10
1.2 Hêmanên zimanê kurdî.....	11
1.3 Rêziman çi ye?.....	12
1.2.1 Tîp û deng.....	13
1.2.1.1 Abc ya kurdî.....	21
1.2.1.2 Tîpên dengdar.....	21
1.2.1.2.1 Kurtedeng.....	22
1.2.1.2.2 Dirêjedeng.....	23
1.2.1.3 Tîpên dengdêr.....	23
1.2.1.4 Pevdengtîp.....	23
1.2.1.5 Siwartîp.....	24
1.2.1.6 Cêwitîp.....	24
1.2.1.7 Rastnivîsandîna tîpan.....	27
1.2.1.7.1 Tîpên gir û hûr.....	27
1.2.1.7.2 Tîpên dengdar li pey hev.....	28
1.2.1.7.3 Yekgirtina tîpan.....	31
1.2.1.7.4 Cîguhertina tîpan.....	31
1.2.1.7.5 Bihevguhertina dengdaran.....	32
1.2.2 Kîl.....	36

1.2.2.1 Bêjeyên yekdeng.....	36
1.2.2.2 Bêjeyên dudeng.....	36
1.2.2.3 Bêjeyên sêdeng.....	37
1.2.2.4 Bêjeyên çardeng.....	37
1.2.3 Peyv.....	39
1.2.3.1 Nav.....	43
1.2.3.1.1 Beşên navan.....	44
1.2.3.1.2 Zayend.....	52
1.2.3.1.3 Zêder.....	61
1.2.3.1.4 Piçkolekirina navan.....	68
1.2.3.1.5 Hejmar.....	70
— 1.2.3.1.6 Tewardina navan.....	71
1.2.3.1.7 Darêja berkarî.....	83
1.2.3.1.8 Navên kirdeyî û berkarî.....	89
1.2.3.2 Cînav.....	93
1.2.3.2.1 Cînavên kesok.....	94
1.2.3.2.2 Cînavên bêhêl.....	101
1.2.3.2.3 Cînavên nişandek.....	107
1.2.3.2.4 Cînavên pêgehîn.....	114
1.2.3.2.5 Cînavên pirsyariyê.....	116
1.2.3.2.6 Cînavên nependî.....	125
1.2.3.2.7 Cînavên xwemalîn.....	126
— 1.2.3.2.8 Tewardina cînavan.....	128



1.2.3.3 Rengdêr.....	130
1.2.3.3.1 Rengdêrên pesinde.....	130
1.2.3.3.2 Rengdêrên dumil.....	131
1.2.3.3.3 Rengdêrên nişandek.....	137
1.2.3.3.4 Rengdêrên hejmarî.....	138
1.2.3.3.5 Rengdêrên pirsiyarî.....	140
1.2.3.3.6 Rengdêrên nependî.....	140
1.2.3.3.7 Rengdêrên xwedanî.....	140
1.2.3.4 Hejmar.....	143
1.2.3.4.1 Beşên hejmarê.....	143
— 1.2.3.4.2 Tewandina hejmaran.....	148
1.2.3.5 Lêker.....	157
1.2.3.5.1 Veguhastina lêker.....	159
1.2.3.5.2 Di lêkeran de rader.....	163
1.2.3.5.3 Raweya fermanî û KDN.....	165
1.2.3.5.4 Komên lêkeran.....	171
1.2.3.5.5 Di lêkeran de dem.....	184
1.2.3.5.6 Di lêkeran de rawe.....	200
1.2.3.5.7 Di lêkeran de nakirin.....	211
1.2.3.5.8 Lêkera bûn.....	214
1.2.3.5.9 Lêkera hebûn.....	220
1.2.3.5.10 Lêkekerên derhingêv.....	221
1.2.3.5.11 Çend lêkerên hîmî.....	229

1.2.3.6 Hoker.....	231
1.2.3.6.1 Hokerên demîn.....	232
1.2.3.6.2 Hokerên cihîn.....	233
1.2.3.6.3 Hokerên çawanî.....	234
1.2.3.6.4 Hokerên hejmarî.....	235
1.2.3.6.5 Hokerên pirsiyarî.....	236
1.2.3.7 Daçek.....	238
1.2.3.7.1 Daçekên lêkerî.....	238
1.2.3.7.2 Daçekên raweyî.....	240
1.2.3.7.3 Daçekên navdêrî.....	240
1.2.3.7.4 Daçekên erênî.....	241
1.2.3.7.5 Daçekên nayînî.....	241
1.2.3.7.6 Daçekên pirsiyarî.....	242
1.2.3.7.7 Daçekên egerî.....	242
1.2.3.7.8 Daçekên vekitî.....	243
1.2.3.8 Gihanek.....	244
1.2.3.8.1 Gihanekên xwerû.....	244
1.2.3.8.2 Gihanekên dubare.....	244
1.2.3.8.3 Gihanekên daçekî.....	245
1.2.3.9 Bang.....	246
1.2.3.9.1 Bangên gazikirinê.....	246
1.2.3.9.2 Bangên dilxweşî û şahiyê.....	247
1.2.3.9.3 Bangên êş nifrîn û kovanan.....	247



1.2.4 Hevok.....	248
1.2.4.1 Avahiya hevokê.....	250
1.2.4.1.1 Hevokên lêkerî.....	250
1.2.4.1.2 Hevokên navdêrî.....	254
1.2.4.1.3 Hevokên bangê.....	254
1.2.4.2 Di hevokê de niqteşanî.....	256
Çend nimûne liser hevokê.....	261
Çavkanî.....	269

## Pêşgotin

Gelê Kurdistanê ji berbanga dîrokê ve di bin nîrê bindestiyê de êş û zorê dikişîne. Her tiştên Kurdan ketine ber bayê talan û wêrankirinê. Badev û firtoneya koledariyê serax û binaxa me bi bêbextî dimale. Dijmin, kelepor û kevnetoreyê me jibo xwe bi kar tîne. Hebûn û kesbûna me di bin seqem û berfa mêtîngeryê de dilerize û bêçare hêdî hêdî diçilmise û tê pişavtinê. Zimanê me jî, mîna endamekî bîngêhîn ji hebûna me ya netewî dibe armanca êrişên hovane. Jiber ku ziman hêlîna gel e. Hêlîna dîrok, çand, tore û hemû nîrx û bihayên netewî ye. Lew re bûye armanca yekemîn ji lêdanên mêtîngêran re. Jibo ku dijmin gelê me ji meydanê rake, lêdana mirinê avêtiye zimanê kurdî. Lew re baş zanibû ku kuştina zimanê kurdî, kuştina netewa kurd bi xwe ye. Kuştina kurdayetî û kesbûna kurdî bi xwe ye. Ev rastiyeke ku mirov nikare jiber çavan bixe. Di dirêjahiya dîroka Kurdistanê de, dijmin ev ramyarî bi rê ve birîye. Di dema serdariya Ereban de, Omerê Kurê XETAB, zimanê kesê ku bi kurdî dipeyîvî jê dikir. Herwiha piştî binkevtina serhildana Dêrsimê, pêşniyaza I. INONU ew bû ku qirkerinên sipî bîn pêkaninê. Jibo kuştina giyana serhildêr û berxwedêr li cem Kurdan qîşleyên leşkerî hatin

avakirinê û sêwiyên ku dê û bavên wan hatibûn kuştinê bi mejî û ramana kemalî tê de hatin xwedîkirinê. Armanca yekemîn ji van dibistanên di nav qereqolên leşkerî de ew bû ku tore, ziman, dîrok û kesbûna Kurdayetî bi nifşên kurdî bidin jibîrkirinê. Lê tevî van êriş û qedexekirinan jî, zimanê kurdî liber xwe da. Di çiya, şikeft û asêgehên Kurdistanê de, ji hêla gelê Kurdistanî ve hat parastin. Ev jî, encama resenî û xwezayîya zimanê kurdî û taybetiyên gelê kurd in.

Zimanê me zengîn, pak, ciwan û xweş xwe gihand îro, lê mixabin ku heta niha abc û rêzimanekê yekbûyî û hevgerî jibo wî peyde nebûye. Ev jî, ji rewşa bindestîya welat tê. Bi tenê ev daxwaz di nav welatekî serbixwe û azad, ji hêla dezgeheke netewî ve pêk tê. Îro hoyên xweyî û babelî derfet û karînan didin jibo birêvebirîna vî karî. Di vê derbarê de pêwîst e, ku herkes çî dizane bide gelê xwe. Lew re ku pêdiviya zimên jibo Kurdan mîna xwarin û vexwarinê ye.

Gelek rewşenbîr û zimanzan ji vê xebatê ditirsin. Çêkirina rêzimanekî bê kêmayî dikin bihane û li dijî vî karî derdikevin. Gelek jî, dityarên nexweş yên mîna :  
" Pêwîstî bi gelek zimanzanan nîn e " tînin ziman.

Zimanzanî jî, mîna her zanistîşax merc û hoyên wê hene. Lêkolînên ku dibin, giring e bi awayekî zanistî bin. Ez jî, mîna kurdekî welatperwer xwe berpirsiyarê pêşvebirina vê xebatê dibînim. Li gor karîna û derfetên xwe, çiqas kêr bin jî, ezê xwe berdim nav gulistana zimane Kurdî. Xwe bi gul û çîçekan bixemilînim. Herdem jî, mezintirîn mamosteyê min di vî derbarî de zimanzan û têkoşerê serxwebûn û azadiya Kurdistanê OSMAN SEBRÎ ye.

Min rêzimanê CELADET BEDIRXAN bingeş girtiye û bi dîtîna zimanzanê din temam kiriye. Di gelek cihan de min kêmayî li gor ramana xwe dagirtine. Helbet, ev lêkolîn ne bê kêmayî ye, lê hêviya min ew e ku bigihîje armanca xwe û xwendevanên zimane Kurdî jê sûd bigirin.

Selîm Biçûk

## 1. Ziman, rêziman û hêmanên zimanê kurdî

### 1.1. Ziman çi ye ?

Ziman, desteka têgihîştina mirovan e. Bê vê destekê jiyana û pêşveçûna bajarvanî nabe. Ziman bi dengên ku ji dev, lêv, dinan, qirik, ziman û bêvil dertên pêk tê. Herwiha bi van dengên zimanê devîkî ( axaftin , peyîvîn ) çêdibe. Lê jibo zimanê nivîskî her dengêkî ku tê bihîstinê liser kaxezê, bi nîşanekê tê naskirinê. Ev nîşan jî, bi tîp ( herf ) tê bi navkirinê. Dema ku em dibêjin: Aş, em du dengên dibihîzin, dengê tîpa ( a ) û dengê tîpa ( ş ) . Her yek bi nîgarekê tê nivîsandinê: A, Ş

Jibo zimanê kurdî (31 ) sî û yek tîpên latînî hatine danînê. Zimanzanê birûmet CELADET BEDIRXAN sî û yek deng di zimanê kurdî de pejirandine. Bi rastî, ev in dengên bingehîn di kurdî de. Lê hîn ( 6 ) şeş dengên din hene, ew jî ev in: Xw Ç K P R T. Tîpa pevdeng û pênc tîpên cewî, yên ku cihê du dengên nêzî hev digrin kê in. Ji bilî van tîpan sê dengên din ku ji zimanê erebî ne, cihên xwe di nav dengên zimanê kurdî de digrin: Ā ( ع ), X̄ ( ح ), H̄ ( ح ).

Her tîpek dengdar yan jî, yekgirtina bédengan bi dengdarekê re dengêkî çêdike, mîna : A Av - ketin ( ke - tin ). Jibo vî dengî kî ( birge ) tê gotinê. Her çend kîte bêjeyekê ( peyvekê ) çêdikin, mîna :



Serxwebûn      Ser - xwe - bûn.

Rêzkirina çend peyvan jî, hevokek xwedî wate çêdikin mîna:  
Em serxwebûn û azadiyê dixwazin. Axafin jî, bi rêzkirina  
hevokan pêk tê:

Jibo pelixandina bêrûmetiya sedsalan. Jibo jiyaneke bişeref  
û rêzdar. Jibo gihîştina karwanê mirovahiyê. Me bi destekî  
pênûs û bi yê din qilêş hilgirtiyê. Berê me li çiyayên  
Kurdistanê, hêlînên baz û şêran. Me ev rê girtiyê. Em bi  
xwîna sor vedikin û dişopînin, jiber ku: Ji serxwebûn û  
azadiyê bi rûmetir tiştêk nîn e.

## 1.2. Hêmanên zimanê Kurdî

Mîna ku li jor diyar dibe, di zimanê kurdî de ( 4 ) çar  
hêmanên bingehîn hene ku liser ava dibe û pêk tê:

1.2.1. Tîp

1.2.2. Kit

1.2.3. Peyv

1.2.4. Hevok



### 1.3. Rêziman Çi ye ?

Tevahiya bend û rêzanên rastaxaftin û rastnivîsandina zimanekî bi Rêziman tê bi navkirinê. Rêzimanê kurdî rastaxaftin û rastnivîsandina zimanê kurdî bi bend û rêzanan şirove dike.

### 1.2.1. Tîp û dengên zimanê kurdî

Tîp nişanên ku liser kaxezê bi nivîsandin dengên zimên didin nasîn. Tevahiya van tîpan abc ya kurdî pêk tînin. Abc ya kurdî ya latîni ji ( 31 ) sî û yek tîpan tê sazkirinê:

A a Tîpa yekemîn e , ji abc ya kurdî. Bi serê xwe dengekî dirêj, ji kûraniya qirikê, bi vekirina dev derdixe. Bi lêvkirina vê tîpê re ba ji nav devê mirov dertê û vekirina dêv hinekî dom dike :

Av, al, agir, Alan, Azad, ax, aram, aş .....

B b Tîpa duyemîn e, di abc ya kurdî de. Bi anîna her du lêvan ser hev peyde dibe û bi serê xwe tu dengan nade :

Bav, baz, berber, baran, Botan, barbar,....

C c Bi serê zimên ji hêla jorîn ve peyde dibe, yan ku bi danîna serê zimên ser perçeyê jêrîn ji nav devî. Ev tîp dengekî bi çingênî derdixe:

Can , cer, ciwan, cercer, co, cobar,.....

- Ç ç Mîna ( c ) bi alîkariya serê zimên peyde dibe û dengekî bi çingênî derdixe. Bi du awa tê bikaranînê:  
 Awayê nerm:  
 Çêlek - çîrok - çîn - çivîk - çilmisîn....  
 Awayê sert :  
 Ço - çol - çîmen - çayê - çal - çayir ....
- D d Bi alîkariya serê zimên ku li dinan dikeve peyde dibe:  
 Dad, derd, dem, dê, dîmen, dûman, dadvan,....
- E e Dengdareke xweser e. Bi vekirina dev û rakirina lêv û dinan ji ser hev, dengekî kurt yekcar ji baniyê qirikê derdixe:  
 Ez, em, ezber, erzan, encam, efsane,....
- Ê ê Tîpeke dengdar e. Ji baniyê qirikê, bi vekirina dev û rakirina lêv û dinanan ji ser hev dengekî dirêj derdixe:  
 Êl, êm, êvar, êzing, êş, êrîş, êrdim,....

- F f Ev deng bi alîkariya lêv û dinanan çêdibe. Lêva jêr dikeve navbera dinanên jêr û jor û hinekî tê qerisandinê. Lêva jor jî, hildayî dimîne: Fener, ferman, fêrbûn, Ferfûr, Fanos, ...
- G g Ev deng liser nîvê zimên ji jor ve çêdibe. Nîvê zimên bi ser şikefta devî ya jor de tê qerisandinê û lêv û dinan vekirî dimînin: Ga, gur, gul, guh, gel, gamêş, ger, gez,....
- H h Ev deng ji qirika mirov bi hûkirinê dertê. Herwiha dev , lêv û dinan vekirî dimînin: Hawar, huner, hozan, hêz, herêm, hêvî , hêja,
- I i Ev dengdar bi vekirina dev dengê kurt û yekcar ji nîvê qirikê derdixe. Di destpêka peyvên kurdî de nayê bikaranînê . Herwiha di dawiya peyvên de jî, ji bilî çend daçekan nayê bikaranînê , mîna : Bi , ji, çî, di,.... Kirin, birin, mirin, bilbil, dirinde, Dimdim...
- Î î Ev dengdara xweser bi vekirina dev, lêv û dinandengê dirêj ji nîvê qirikê derdixe:

În, îşev, îsal, înan, îcar, îsot...

J j Ev deng ji pişt dinanan peyde dibe. Mirov binê zimanê xwe bi ser pişt dinanan ve hinekî diqerêse û vî dengê bi xuje xuj derdixe:  
Jar, jîn, jîyan, jîjo, jêr, jor, jîr, jajî

K k Ev deng ji nivê pişt zimên bi alîkariya şikefta dev ya banî peyde dibe. Ev tîp cihê du dangan digre.

Awayê nerm:

Ker (nabihîse), kil, kor, kin, ka (pûşê hûr), kadîn, kavil, kar (çêlika bizinê),...

Awayê sert :

Ker (bar radike), kum, kun, kar (îş), kole, kol, kaxez, ka (bide min),...

L l Ev deng bi alîkariya serê zimên ji nivê zimên dertê:  
Lal, lale, lûle, Leyla, Lezgîn, leylan, Lor...

M m Ev deng bi girtina dev û dinan û danîna lêvan ser hev jî bêvilê dertê:

Mar, mêr, mal, mê, Memo, Med, meymûn, mom,...

- N n Bi alîkariya serî û nivê pêşzimên bi hildana lêvan ji ser hev ji bêvilê dertê:  
Nan, narîn, nalîn, Nermîn, nûner, nişan, Nişmîn,...
- O o Ev xweser dengekî dirêj ji nav dev bi vekirina lêv û dinan derdixe:  
Ol, ode, Oso, ocax, olk, oldar...
- P p Ev deng bi danîna her du lêvan ser hev dertê û bi du awa tê bikaranînê:  
Awayê nerm:  
Pîr (bi emir), pepûk, pîvaz, pêlav, pembû, pîrejîn...  
Awayê sert:  
Pere, por, pirç, perçe, pûş, poşman,  
pîr (rêberê dîn)
- Q q Ji nivê qirikê dertê:  
Qaz, quling, qîz, Qamişlo, qirik, qijik, qîrên, qoq,...
- R r Ji serî û nivê pêşzimên peyde dibe û bi du awa tê bikaranînê:  
Awayê nerm:  
Rol, reben, rêwî, rê, rik, rim, rimbaz,



Awayê sert:

Reş, rewş, rabûn, rewşenbîr, req...

S s Ev deng ji nav dinan bi fitîkdanê peyde dibe:  
Sal, sor, sar, sol, sîr, sersal, sosin,...

Ş ş Ji pişt dinanan û bi alîkariya binê zimên peyde dibe:  
Şor, şûr, şîr, şar, şir, şêr, şoreş, şeş,...

T t Bi alîkariya dinanan û serê zimên peyde dibe û bi du awa tê bikaranînê:

Awayê nerm:

Tîr, tirî, tûr, tîtî, tilûr, tij,...

Awayê sert:

Tirş, teşî, teşt, tor, ter,...

U u Ev dengdara xweser bi vekirina lêv û dinan ji nav dev yekcar û kurt derdikeve. Di pêşiya peyvan de nayê bikaranînê. Di dawiya peyvan de jî, bi awakî sinorkirî tê mîna: Tu, ku, du,...

Kur, gur, kum, xurde, gumgum, qure

- Û û Ev dengdara xweser bi vekirina dev, dinan û lêvan  
 ji nav dev dirêj derdikeve û vekirina dev hinek dom  
 dike:  
 Ûrg, kûr, rû, mû, dû, çûn, bûn,...
- V v Ev deng bi alîkariya lêv û dinan peyde dibe. Lêva  
 jêr em dikin navbera dinanên jêr û jor û hinek  
 diqerêsin:  
 Vedan, volkan, viyan, vîn, veşartin, valabûn,...
- W w Ev deng di nav lêvan de peyde dibe. Bi alîkariya  
 dengdaran tîpên siwar çêdike û ew bi xwe jî, nîv  
 dengdar e:  
 Wa, we, wê, wi, wî, ew, -êw.  
 Bi alîkariya tîpên bêdeng jî, pevdengan çêdike,  
 wek: Xw, kw, gw.  
 Wan, welat, wêran, windabûn, wî, ew,  
 Xwarin, xweser, xwê, xwîn, xwinav  
 Gwêz, gwîtin, kwîr, kwînêr...
- X x Ev deng ji nivê qirikê dertê:  
 Xanî, xort, xebat, xizim, xunav, xirab, xezal,....

- Y y Ev deng ji nivê pişta zimên peyde dibe. Nîvdengdar e û bi alîkariya dengdaran tîpên siwar çêdike:  
Ya, ye, yê, yi, yî ,ey.  
Yar, yek, guliyên sor, neteweyî, eywan,...
- Z z Tîpa dawî ye ji abc ya kurdî. Dengê wê ji nav dinanan peyde dibe.  
Zozan, zevî, zor, zindan, zerzûr, Zerê,

#### 1.2.1.1. Abc ya Kurdî

Abc ya kurdî ( 31 ) sî û yek tîp in û li du beşan par ve dibin:

Tîpên gir ( girek ):

A B C Ç D E Ê F G H I Î J K L M N O P Q R S Ş T U Û V  
W X Y Z

Tîpên hûr ( hûrek ):

a b c ç d e ê f g h i î j k l m n o p q r s ş t u û v w x y z

#### 1.2.1.2. Tîpên dengdar

Di zimanê kurdî de ( 8 ) heşt tîpên dengdar hene:

A Ê Î Ì O U Û

Bi lêvkirina van tîpan mirov devê xwe ji hev vedike. Her tîpek jî, bi serê xwe dengêkî derdixe.

A	a	kar	şar
E	e	ker	şer
Ê	ê	kêr	şêr
I	i	kir	şir
Î	î	kîr	şîr
O	o	kor	şor
U	u	kur	gur
Û	û	kûr	şûr

Li gor Kurtî û dirêjahiya dengê van tîpan di nav xwe de, li du beşan par dibin:

#### 1.2.1.2.1. Kurtedeng: E I U

E	e	ez, em, ber, şer, berber, ezber, pale
I	i	Dimdim, bilbil, dil, mirin, kirin, min
U	u	tu, gul, guh, kum, kur, Kurd, durust

#### 1.2.1.2.2. Dirêjedeng: A Ê Î O Û

A	a	av, al, ap, Alan, bav, Dara, baran
Ê	ê	êl, êm, êrîş, dêm, rê, mêr, Bêrivan
Î	î	în, îro, îşev, dîn, jîn, şîn, zîn, sîr, şîr
O	o	ol, orde, olk, Oso, Soro, Bozo, sor
Û	û	ûrg, tûr, şûr, rû, mû, kûr, dûr, hûr

#### 1.2.1.3. Tîpên Dengdêr:

Di zimanê kurdî de (23) bîst û sê tîpên dengdêr hene. Ev tîp bi serê xwe tu dengî nadin. Tîpên dengdêr ev in:

B C Ç D F G H J K L M N P Q R S Ş T V W X  
Y Z

#### 1.2.1.4. Pevdengtîp

Ev tîp ji yekgirtina du tîpên bêdeng û dengdarekê çêdibin:

xw	xwa, xwe, xwê, xwî, xwî.
gw	gwê
kw	kwî

Xwa: Xwarin, xwazgîn, xwas, ...

Xwe: Xwere, xweser, xwelî, ...

Xwê: Xwêdank, xwêsi, ...



Xw<sup>1</sup>: Xwinav, xwirde, xwirdekar,...

Xwî: Xwîn, xwînxwar, xwîni, ...

gwê gwêz	gwî gwîtin	kwî kwîr kwîner
----------	------------	-----------------

#### 1.2.1.5. Siwartîp

Ev tîp bi yekgirtina tîpên ( y, w ) û dengdaran çêdibin:

Y : Ya, ye, yê, yî, yî, ey.

W: Wa, we, wê, wî, wî, ew, êw, aw.

Y	yar, yek, Darayê Kurd, mayin, çiyayî, meydan,...
W	Wan, welat, wêne, windabûn, wî, xew, dêw, daw

#### 1.2.1.6. Cêwîtip

Ev tîp bi du awa tên bilêvkerinê û di ziman de cihê du dengên digirin. Cêwîtip ev in:

Ç K P R T

Her tîpek ji van du dengên derdixe, dengê nerm û yekî sert

<sup>1</sup>Pevdengê (xwî) di bergehokî pir teng de bê bikaranînê çêtir e. Ji berku dengên (xwî) û (xu) di kurdî de yek in. Lê di peyvên mîna: Xwarin - dixwim de, gerek e ( xwî) bê bikaranînê jibo ku koka lêker neyê guhertinê.

Tip	Awayê nerm			Awayê sert		
Ç	çem	çêlek	Çîrok	ço	çap	çep
K	ker <sup>2</sup>	kil	kezeb	ker <sup>3</sup>	kum	kol
P	pîr <sup>4</sup>	pêlav	pîvaz	pîr <sup>5</sup>	per	pirç
R	rût	rûn	rêzan	reş	rewş	razan
T	tûr	tîr	tîrî	têr	tor	teşî

<sup>2</sup>Ker Kesê ku nabihîse.

<sup>3</sup>Ker Heywanê ku baran radîke.

<sup>4</sup>Pîr Yê bi temen mezin ( kal ).

<sup>5</sup>Pîr Rêberê dîn li cem Elewî û Êzdiyan.

## Abc ya Kurdî Bi Helbestekê<sup>6</sup>

Artêş e banga ciwan e  
Çîmen e dilo efsan e  
Êlên firîşteyan gelo  
Herêm îşkere îsandin  
Ji Kawa Lalişa Mezlûm  
Nûnerê omîda pakbûn  
Qehreman e rola serkar  
Şoreşa teze urdekar<sup>7</sup>  
Û viyan viyana welat  
Xewna yekemîn e zû hat

---

<sup>6</sup>Tîpên yekemîn ji peyvên helbestê abc ya kurdî çêdikin.

<sup>7</sup>Urdekar Xurdekar Hûrkar.

### 1.2.1.7. Rastnivîsandîna Tîpan

#### 1.2.1.7.1. Tîpên gir û hûr:

Di nivîsandîna kurdî de, ji van rewşên ku em li jêr rêz bikin û pê ve her gav tîpên hûr tên nivîsandînin:

#### 1. Nasnav ( Navên bernas ):

Ev nav bi tîpa gir dest pê dikin û tevayî jî, tîpên gir bîna nivîsandînin, rast e. Wek:

Azad > AZAD	Xebat > XEBAT
Şêrîn > ŞÊRÎN	Amed > AMED
Qamişlo > QAMIŞLO	WAN > WAN
Botan > BOTAN	Bagok > BAGOK

#### 2. Hevok (Pevek) :

Herdem bi tîpa gir dest pê dike.

Wek: Şoreşa Kurdistanê xwe gihandîye koçbera şerê gelî. Di şerê gelî de jî, hemû hêzên civatê dibin eniyên cengê. Îro li Kurdistanê her gund, her bajar li hember dijmin, eniyeke cengê vedike.

#### 3. Dema mirov bixwaze bêjeyekê yan jî, navekî di hevokê

de berçav bike jibo balkêşiyê bi tîpên gir di navbera du kevanên biçûk de dinivîse. Wek:

Li welat " ÇAPKIRIN "a pirtûkan qedexe ye.

Ji " SERXWEBÛN " û " AZADI " yê bi rûmetir tiştekan nîne.

4. Semivîsên gotar û nivîsaran bi tîpên gir dest pê dikin yan jî, tevahî bi tîpên gir tîpên nivîsandinê.

Wek:

Enîşka Rêzimanî > ENÎŞKA RÊZIMANÎ.

5. Navên pirtûk, rojname û kovaran bi tîpa gir dest pê dibe yan jî, tevayî bi tîpên gir tîpên nivîsandinê.

Rêzimanê Kurdî > RÊZIMANÊ KURDÎ

Rewşen > REWŞEN                      Lêkolîn > LÊKOLÎN

Welat > WELAT                      Avaşîn > AVAŞÎN

6. Textik û tepikên rêklam û bangeşiyê û balkêşan (lafte ) bi tîpên gir dest pê dikin yan jî, tevayî bi tîpên gir in :  
BIJÎ SERXWEBÛN Û AZADIYA KURDISTAN

1.2.1.7.2. Hatina tîpên dengdar li pey hev

Di zimanê kurdî de du dengdar di bêjeyekê de yan jî, di bêje û paşgînekê de li pey hev nayên, di vê rewşê de tîpên :

( Y,W, H ) dengdaran ji hev dûr dikin.Mîna:

Gî - an                      Giyan.

Du - emîn                    Duwemîn.

Dirêja - î                    Dirêjahî

Tîpa (w ) dema bi vê delametê radibe bi tenê li pey van dengdaran ( o, u, û ) tê, jibo ku lêvkirina bêjeyê neyê guhertinê. Mîna:

Ez di rêza duwemîn de bûm.

Duwekî tarî ji agirê petrolê dertê.

Min serşoweke fireh ava kir.<sup>8</sup>

Tîpa (H) di şûna tîpa (Y) de tê bikaranînê , di bêjeyên mîna:

Dirêj                    dirêjayî                    dirêjahî

Teng                    tengayî                    tengahî

Reş                    reşayî                    reşahî

Ji hêla din ve gelek bêjeyên kurdî yên ku bi tîpa ( h ) dest pê dikin, bi demê re ev tîp ketiye û bi dengdarekê dest pê dikin, mîna :

Êriş                    hêriş

Awa                    hawa

Ûrde                    hûrde

Êl                    hêl

---

<sup>8</sup>Pir caran peyva ( bûwer ) bi vî awayî dinivîsîn ( bûyer ). Bi dîlîna min ( buwer ) rastir e.



Evîn            hevîn

Elb            helb

Avêtin        havêtin

Dema ev bêje dibin berbarê vê rêzanê vedigerin ser  
reseniya ( eslê ) xwe. Mîna:

Bi êrişên tund gerîla dijmin dipelixîne.

Bi hêrişên tund gerîla dijmin dipelixîne.

Bi awakî sert ez rabûm.

Bi hawakî sert ez rabûm.

Pêavêtin            Pêhavêtin

Tîpa ( Y ), di hemû rewşên din de, bi delameta  
jhevdûrkirina dengdaran radibe. Mîna:

Gundiyeke got : " Çiya em in , me bombe bikin ".

Bêjeyên ku bi dengdaran dest pê dikin, dema li dû daçekan  
tên, ev daçek dikarin dengdarên xwe bavêjin. Mîna :

Ajotin            bi ajo            bajo

Anîn            bi îne            bîne

Axaftin        bi axife        baxife

Di nivîsandina kurdî de zêder ( a, ê, ên ) mîna paşgînan tên  
pejirandinê, dema dawiya bêjeyê dengdar be, tîpa " y "   
dikeve pêşîya zêderê . Mîna: Çiyayê Cûdî pîroz e .

#### 1.2.1.7.3. Yekgirtina Tîpan

Di kurdî de du tîpên mîna hev di bêjeyekê de, li dû hev nayên. Di vê rewşê de yek jê dikeve. Mîna:

Xurt - tir	xurttir	xurtir
Paş - şîv	paşşîv	paşîv
Deng - gir	denggir	dengir
Derd - dar	derddar	derdar

Di zimanê kurdî de çend tîpên ne ji hev digihîjin hev û dengekî nû çêdikin yan jî, cih didin tîpeke nû. Ji yekgirtina tîpên ( xw ) û ( gw ) bi dengdaran re pevdeng çêdibin :  
Xwa, xwe, xwê, xwi, xwî.

Gwê, gwî, Kwî, kwê.

#### 1.2.1.7.4. Cîguhertina tîpan

Di zimanê kurdî de gelek dengên nêzî hev hene. Di peyvajowê de gelek caran li gor devok û zaravên kurdî cihê xwe bi hev guhertine. Mîna :

( v ) û ( f )	Hevt	heft
	Sekevtin	serkeftin
	Hevsar	hefsar
	Hêrivandin	hêrifandin
( v ) û ( b )	Av	ab

	Bav	bab
	Lêv	lêb
( z ) û ( s )	Gulav	gulab
	Leyiztin	leyistin
	Paraztin	parastin
	Bihîztin	bihîstin
( j ) û ( z )	Jîrek	zîrek
	Jeng	zeng
	Jehir	zehir
( v ) û ( w )	Serkevtin	serkewtin
	Av	aw
( b ) û ( w )	Xirab	xiraw

#### 1.2.1.7.5. Bihevguhertina dengdaran

Tipên (eh) dema di yek bêjeyê de, li dû hev bîn, ev herdû tîp dikevin û cihê xwe didin tîpa (a).

Çehv	Çav
Xwehr	Xwar
Şehr	Şar
Kehr	Kar
Behr	Bar
Mehr	Mar
Çehr	Çar

Tîpên (ih) dibin ( î )

Cih	Cî
Sih	Sî
Mih	Mî
Bih	Bî
Rih	Rî
Tirih	Tirî

Tîpên (uh) dibin (o) yan jî ( û )

Cuh	Co
Duh	Do
Buhtan	Botan
Duhtmam	Dotmam
Cuhtkirin	Cotkirin
Cuhtin	Cûtin
Nuh	Nû

Di van rewşan de kurtedeng cihê xwe dide dirêjedengê.

Dema di bêjeyekê de dirêjedengên ( î, û ) dikevin pêşiya dengdareke din û bi tîpên ( y, w ) ji hev tîn vekitandinê, ev dirêjedeng cihê xwe didin kurtedengên ji babeta xwe , anku ( î )dibe( i ) û ( û ) dibe (u). Wek:

Çiyayîyê mêrxas Çiyayiyê mêrxas

Gundiyeq                      Gundiyeq

Dûwek                         Duwek

Mûwek                        Muwek

Bûwer                         Buwer

Bêjeyên mîna (dê, rê ...) dibin:

Diya                             Riya

Diya min                      Riya min<sup>9</sup>

Di navên nêr de , dema tîpa (a) hebe, bi tewandinê dibe ( ê ).

Şervan                         Şervên

Ga                                Gê

Nan                               Nên

Gavan                         Gavên

Derman                        Dermên

Alan                             Alên

Dîwar                         Dîvêr

Lêkerên pirkîte, dema dengê dawî ne ( i ) be ,di fermaniyê de tê zîvirandin û dibe ( î ).

Axaftin    axaf    axif    diaxife    baxife

Cemedîn    cemed    cemid    dicemide    bicemide

Li gor hin devokan ev tîp dibe ( ê ) .

---

<sup>9</sup>Bi baweriya min ( dêya min, Rêya min ) rasttir e.

Baxêfe

Balêse ( Alastim )

Lêkerên derhingêv yên ku bi ( andin ) dawî dibin di fermaniyê de ( a ) dibe ( î ) .

kelandin

dikelînim

bikelîne

Gerandin

digerînim

bigerîne

Kenandin

dikenînim

bikenîne

Revandin

direvînim

birevîne



### 1.2.2 Kit<sup>10</sup>

Kit di bêjeyê de parçeyê biçûktirîn e ku nema tê parçekirinê, ev jî, bi tîpên dengdar pêk tê.

Xebat: Bêjeyeke dudeng e ( xe - bat ) . ( Xe ), dengê yekemîn e. ( Bat ) jî, dengê dûwemîn e. Her dengek ji van nema tê parçekirinê. Em nikarin (xe), wiha parçe bikin: x - e . Herwiha ( bat ) jî, nayê parçekirinê.

Ba: Bêjeyeke yekdeng e, nayê parçekirinê. Di bêjeyê de çend tîpên dengdar hebin, hewqas deng hene, liser vî bingehî bêjeyên kurdî li gor hejmara tîpên dengdar bi vî awayî tên parkirinê:

#### 1.2.2.1. Bêjeyên Yekdeng

Di van bêjeyan de tîpeke dengdar heye. Mînak:

Dê , bav, bar, av, xak, ap, şar, dar, ji, bi, li, yek, kir, bir, mir, çû, bû, deng, bang,....

#### 1.2.2.2. Bêjeyên Dudeng

Hacer	Ha - cer
Baran	Ba - ran
Karwan	Kar - wan
Hêvî	Hê - vî

---

<sup>10</sup>Kit : Deng Birge Tej

Di van bêjeyan de du tîpên dengdar hene û bi du dengan tên parçekirinê.

#### 1.2.2.3. Bêjeyên Sêdeng

Serkevtin	ser - kev - tin
Hilpişkîn	hil - pişk - kîn
Şoreşger	şo - reş - ger
Berxwedan	ber - xwe - dan

#### 1.2.2.4. Bêjeyên Çardeng

Serîhildan	se - rî - hil - dan
Bajarvanî	ba - jar - va - nî
Welatparêz	we - lat - pa - rêz
Koçbarkirin	koç - bar - ki - rin

Di van bêjeyan de çar tîpên dengdar hene û bi çar dengan parçe dibin.

Herwiha bi vî awayî bêjeyên pênc deng jî, tên parçekirinê.

### 1.2.3. Peyv<sup>11</sup>

#### a. Di zimanê kurdî de peyv çi ye ?

Di Nîsana 1990 î de , li derdorên Bêytûlşebabê, lehengê nemir Sebrî ( Cemîl ) gihişt karwanê şehîdên nemir. Rêhevalê Sebrî mîna hemû şehîdên me, navê xwe bi tîpên ji agir di singa dîroka Kurdistanê de neqîşand..."

Ji rêzên jor diyar e ku hevok ji çend bêjeyên xwedî wate saz dibe. Bi hevketina van bêjeyan hevok wateya xwe distîne, lê dema em bêjeyekê ji hevokê berçav bikin, mîna Sebrî. Bêjeya Sebrî ji çend tîpan saz bûye: S E B R Î di nav van tîpan de du tîp dengdar in ( e, î ) jibo vê jî, lêvkirina vê bêjeyê parçe dikin : Seb - rî. Em dibêjin ev bêje du deng e. Ji hêla din ve bêje xwedî wate ye. Gava em navê Sebrî dibihîsin em dizanin ku kesekî şoreşger pê tê binavkirinê û ev kes şehîd ketiye. Herwiha hemû bêjeyên ku di rêzên jorîn de hatibûn mîna : Bêytûlşebab, Nîsan, 1990 î ,li, bi, ji, leheng, şehîd, hemû, gihişt , ....

Her bêjeyek ji van ji çend tîpan saz dibe, çend dangan dide û wateyekê nîşan dike. Li gor vê em dikarin peyvê (bêjeyê) bi vî awayî bidin nasandin:

Peyv ji çend tîpan saz dibe, çend dangan derdixe û wateyekê berçav dike.

---

<sup>11</sup>Peyv: Bêje Şor Axif Qise

b. Peyvên hevdeng

Lêvkirin û nivîsandina van bêjeyan yek e, lê wateya wan ji hev cuda ne.

Şîn <sup>12</sup>	Şîn <sup>13</sup>	Şîn <sup>14</sup>
Ber <sup>15</sup>	Ber <sup>16</sup>	Ber <sup>17</sup>
Bîr <sup>18</sup>	Bîr <sup>19</sup>	
Pîr <sup>20</sup>	Pîr <sup>21</sup>	
Şor <sup>22</sup>	Şor <sup>23</sup>	
Cot <sup>24</sup>	Cot <sup>25</sup>	

c. Peyvên hevwater

Wateya van bêjeyan yek e, lê lêvkirin û nivîsandina wan ji hev cuda ne.

---

<sup>12</sup> Şîn	Reng		
<sup>13</sup> Şîn	Heşîn	Giya	
<sup>14</sup> Şîn	Girî û dîlzarî		
<sup>15</sup> Ber	Kevir		
<sup>16</sup> Ber	Pêş	Lihember	
<sup>17</sup> Ber	Cîrax		
<sup>18</sup> Bîr	Ji bîranînê	Ra	Hîzîr
<sup>19</sup> Bîr	Çala avê		
<sup>20</sup> Pîr	Gelek	Zehf	
<sup>21</sup> Pîr	Liser avê tê avakirinê		
<sup>22</sup> Şor	Tama xwê		
<sup>23</sup> Şor	Xeber	Gotin	
<sup>24</sup> Cot	Dufer	Didu	
<sup>25</sup> Cot	Ajotîna axê	Cotkirin	

Bêje	Peyv	Şor	Xeber	Qise	Axif
Pir	Gelek	Zehf			
Gerdûn	Dinya	Cihan			
Rûmet	Şeref				
Şerm	Fihêt				
Zû	Bilez				

ç. Peyvên dijhev

Ev bêje bi wateya xwe dijî hev in .

Reş	Sipî
Şer	Aşitî
Sar	Germ
Sivik	Giran
Birûmet	Bêrûmet
Mezin	Biçûk
Nezan	Zana

Di kurdî de parçeyên axaftinê (koma peyvan) :

Koma hemû peyvên ku di axaftin û nivîsandina kurdî de peyda dibin parçeyên axaftina kurdî ne. Ev jî, neh beşên bingehîn in, di zimanê kurdî de. Emê van parçeyan li jêr rêz bikin û bi firehî liser rawestin.

1.2.3.1 Nav

1.2.3.2 Cînav

1.2.3.3 Rengdêr

1.2.3.4 Hejmar

1.2.3.5 Lêker

1.2.3.6 Hoker

1.2.3.7 Daçek

1.2.3.8 Gehandek

1.2.3.9 Bang



### 1.2.3.1 Nav

Kêliyêk ji Bihara Gundê min

Serê sibê ye. Rojê şaxên xwe yên zêrîn davêtin mêrg û palên çiyê. Ox ... Xweş ! Ev çi awaza bêmirin e, tê guhên min; Marêna bizin û karikan, borîna çêlek û dewaran, barbara berx û mihan, çîwçîwa çivîk û şalûlan.

Dengê bilûrek bi awazeke girînî û xemgîn mîna pêlên bayê guhên min hênik dike. Haho! Strana " lo lo lawiko " bi dengêkî stûr û giran pêl dide. Di nav re qebqeba kewekî ji kontara çiyê bilind dibe. Şêrîn bang dike Narîne. Gulê bang dike Perwîne. Ewt ewta segên gund , qid qidq mirîşkan. wey bavo! Dengê zeriyeke delal ji riya kehniyê tê, bi strana " Her hebin pêşmergên me " xwe mijûl dike. Wey hesteyên min, ez çi bihîdzim, ez çi berdim?! Bi hev re ox yeh! Sinfonîyeke xweristî bêmirin e. Dengê Zeriye, wey xweziya min bi we Pêşmergeno! Bilûra şivên ?! Na, dengê kewan?! Na, na ... wey lo dilo! Ev çi ye?! Ev çi bûye?! ...

Dema em ji nivîsa jorîn van bêjeyan berçav dikin: Bihar, gund, roj, mêrg, çiya , awaz, guh, kehrik, berx, şivan, Şêrîn, Gûlê, kew, hest ...

Em dibînin ku her bêjeyek ji van kesekî , cihekî yan jî, tişteki dide nasîne. Ev kes, cih û tişt bi vê bêjeyê tê binavkirinê. Di zimanê kurdî de nav ji van bêjeyan re tê gotinê. Herwiha nav bi vî awahî tê nasdan:

Nav parçeyeke ji axaftina kurdî ( yek ji bêjeyên zimanê kurdî ye). Tişteki , kesek, lawirek yan jî, cihek bi vê bêjeyê tê naskirinê.

#### 1.2.3.1.1 Beşên Navan

Di zimanê kurdî de du beşên navan hene:

Navên ku mirov bi her pênc hesteyên ( hisên ) xwe dikare nas bike, an ku hebûneke wan berçav hebe, ji van navan re şênber (madî) tê gotinê. Mîna: Av , nan, çiya, ba, çêlek, berx, çivîk, bilûr ...

Navên ku mirov nikare bi her pênc hesteyên xwe nas bike, yan ku hebûneke wan ya berçav tune, lê mirov di raman û mêjiyê xwe de wan nas dike. Razber (manewî) ji van navan re tê gotinê. Mîna: Giyan ( rih ), jîrî, hiş, sewda, bext, raman....

#### A. Navên şênber

Navên şênber yên xwedî giyan:

Jin :Narîn, Şêrîn, Gulê, Perwîn, Zînê,

Mêr	Azad, Hogir, Xebat, Hawar, Reşo,
Mirovên nêr	Mêr, xort, bav, bira, xal, ap,
Mirovên mê	Jin, keç, bûk, xwîşk, dotmam, ....
Lawirên nêr	Beran, nêrî, ga, beraz, dîk, hesp...
Lawirên mê	Bizin, çêlek, mih, mehû, mirîşk,

#### Navên şênber yên bêgiyan

Mêza	Av, baran, berf, beroş, ode, cam ...
Nêrza	Kon, nan, kevir, agir, êzing,

#### B. Navên Razber

Ev nav tişteki bêrih û can, bêleş û giyan bi nav dikin. Tişteki ne berçav e, lê mirov di ramana xwe de nas dike. Mînak: Hêvî, tirs, mêranî, raman, saw, merdî, cangorî.....

Navên razber sê beş in:

1. Navên Ramanî
2. Navên ku bi paşgînên " atî, tî û î " tên sazkirinê.
3. Navên raderî

##### 1. Navên ramanî

Nêrza	Sewda, rih, derd, hiş,...
Mêza	Hêz, hêvî, tirs, saw,...

## 2. Navên jêbirînî

atî	Reşatî, serokatî, koratî, mirovatî,....
tî	Hevaltî, biratî, zavatî, feqîrtî,...
î	Erzanî, xweşî, hogirî, giranî, rebenî,...

## 3. Navên raderî

Ev nav raderên lêkeran bi xwe ne.

n	çûn, man, bûn, dan,...
in	birin, kirin, hatin, firotin,...
în	anîn, kirîn, nalîn, revîn, firîn,....
andin	kelandin, tirsandin, kenandin,

Bi du awayên din nav di zimanê kurdî de par dibin. Nasnav û gelempernav:

### a. Nasnav

Ev nav mirovekî yan tiştekî bi tenê binav dikin û ew tişt yan ew kes bi wî navî xuya ye. Nasnav, navên tiştan, jinan, mêran û welatan in. Mînak:

Kurdistan, Afrîn, Koban, Hêzil, Ferad, Bagok, Botan, Qamişlo, Şêrîn, Zêrîn, Azad, Reşo, Dicle,...

Nasnav herdem bi tîpa gir dest pê dikin û dibe ku bi tevayî jî, gir bên nivîsandinê.

Di kurdî de nasnav ev in:

1. Navên kesan( Rastnav )

Ev navên mirovan in. Mînak:

Hacer, Bêrivan, Egîd, Simko, Rewşen, Sêvê, Temo, Cesûr, Azad, Raperîn, Rêwîn,...

Ev nav ji sê navan pêk tîn:

1. Navê pêşî           Azad ( navê kesekî ye )
2. Navê bav            Şivan ( Şivan bavê Azad e )
3. Navê malbatî       Temo ( Şivan ji mala Temo ye )

Azadê Şivanê Temo yan jî, Azadê kurê Şivanê Temo.

2. Navên malbatî

Bedirxanî, Osmanî, Pehlewî, Şikakî,...

3. Navên nijadî

Kurd, Faris, Ereb, Tirk, Ermen,...

4. Navên erdnîgarî

Navê welatan       Kurdistan, Misir, Filestîn, Çîn,

Navê bajaran       Amed, Şirnex, Qamoşlo,

Navê çiyaran       Bagok, Gebar, Cûdî, Agirî,

Navê çeman         Hêzil, Ferad, Dîcla, Xabûr,

Navên cih û deran   Botan, Xerzan, Hesinan,

Herwiha navên gundan jî, ji nasnavan tên hejmartinê.

#### b. Navên Celeb

Ev nav her tiştên ji beşekî, babetekê yan jî, celebekî binav dîkin. Mîna:

Çiya, Bajar, welat, mih, bizin, beran, ga, mirov,

Navên celeb bi du beşan tên parkirinê:

#### 1. Navên Beş

Ev nav bi kêrî navkirina tiştên ji celebekî yan beşekî tên.

Mînak:

Mih, balinde, çiya, mirov, lawir, candar,...

#### 2. Navên kombêj

Ev nav bi kêrî navkirina parçeyekî yan jî, komekê ji navekî beş tên. Mîna:

Lek, kerî, ref, selef,...

Kerîyek pez.

Refek balefir.

Selefek siwar.

Navên Celeb bi awayekî din bi sê beşan tên parkirinê:

A. Navên Cih ( lûs )

B. Navên Alav ( amraz )

C. Navên dumil



## A. Navên Cih

Ev nav derekê, ciyekî yan jî, warekî bi nav dikin. Mînak:

Xanî , meydan, dibistan, forotgeh, nexweşgeh, mûristan, çayxane,...

Navên cih du beş in:

### 1. Xweber

Navên cihîn xweber bi xwe cihêkî yan jî, derekê bi nav dikin.

Mînak:

Keleh, bazar, bender, xanî, şikeft,...

### 2. Sazber

Navên cihîn sazber ji nav û bêjeyên din bi yekgirtina paşgînan tên çêkirinê. Paşgînan ku navên cihîn saz dikin ev in:

Istan, geh, zar, xane, lîn, dîn,...

Istan	Kurdistan, Hindistan, Erebia, gulistan, goristan, mûristan, karistan, daristan,...
Geh	Dengeh, lîzgeh, çêregeh, bargeh, Zanîngeh, kargeh, tomargeh, nexweşgeh,...
Zar	Çîmenzar, gulzar,...
Xane	Mêvanxane, nexweşxane, dermanxane,
Lîn	Kulîn, hêlîn, xwêlîn, biriqîn,...

Dîn      Kadîn,...

### B. Navên Alav

Ev nav bi kêrî navkirina alavekî (amraz, destek) tên. Mînak:

Şûr, kêr, birek, badek, xame,...

Ev jî, du beş in:

#### 1. Alavên Xweber

Navên ku ji xweber alav in, wek:

Qelem, kevçî, bivir, tevşo,...

#### 2. Alavên Sazber

Ji bêjeyên din bi alîkariya paşgînan çêdibin. Paşgînen ku navên alav saz dikin ev in:

Ek, dan, çiv, ing, ar,...

Ek      Birek, badek, pêçek,

Dan      Çaydan, xwêdan, xwelîdan, kildan,      kevçîdan

Çiv      Kîlçiv

Ing      Bêjîng, hevring,

Ar      Xîzar

Gelek nav bi (ing) dawî dibin, lê ne alav in. Wek:

Zivîng, rojîng,...

### C. Navên Dumil

Navên dumil bi du awan çêdibin:

#### 1. Hevbend

Ev nav bi çar awan çêdibin:

- Nav û rengdêr      Girsor, rûreş, dilpak,
- Du nav              Marmasî, sîrdim, biramak,
- Nav û hoker        Berçavk, bermalî, navmalî,
- Nav û lêker        Gerav, bager, dermansaz..

#### 2. Navên xurdehad:

Ev nav bi alîkariya paşgînan çêdibin. Mîna:

Gûn	Argûn, pargûn
N	Xewn, tevn

### 1.2.3.1.2. Zayend<sup>26</sup>

Di zimanê kurdî de du zayend hene: Nêr û mê. Ev zayend bi du beşan par dibin:

#### Rasteza

Navên ku bi rastî nêr in yan jî, mê ne. Mînak:

Navên bi rastî nêr : Xort, mêr, ga, beran,

Navên bi rastî mê : Keç, jin, çêlek, mih, bizin,...

#### Gumanza

Navên ne nêr û ne mê ne. Lê di ziman de mîna rastezayan hin nêr û hin mê tên bikaranînê. Dema em bixwazin navekî ji van nas bikin ku nêr yan mê ye, emê hevokê bi vî navî saz bikin. Gava paşgîna " ê " bistîne, ev nav nêr e, lê gava " a " bistîne mê ye. Mînak:

Dil : Dilê germ.

Çiya : Çiyayê Cûdî.

Çem : Çemê Dicle pêlan dide xwe.

Navên : Dil, çiya, û çem ne nêr û ne mê ne, lê di ziman de mîna navên nêr tên bikaranînê, jiber ku di hevbendiyê de " ê " distînin.

Av : Ava kaniya me zelal e.

---

<sup>26</sup> Nêr û mê

Şoreş : Şoreşa Kurdistanê pêş de diçe.

Gul : Gula sor.

Navên Av, şoreş û gul ne nêr û ne jî, mê ne , lê di ziman de mîna navên mê tên bikaranîne û paşgîna " a " di hevbendiyê de distînin.

Navên Nêrza

Navên nêrza du beş in:

Rastezayên nêr

Ev nav bi rastî zayend nêr in. Nêrza jî, di Kurmancî de ev in:

Navên mirovên nêr : Mêr, law, kur, zîlam, zava,

Navên mêran : Azad, Zerdeşt, Hogir,

Navên lawirên nêr : Beran, nêrî, ga, dîk, beraz,

Gumanzayên nêr

Ev nav bê zayend in, ne nêr û ne mê ne. Lê di ziman de mîna navên nêr tên bikaranîne. Mînak: Xanî, guh, çiya, çem, nan, dil, serî, kevir, dest, kon, gopal,...

Navên nêr paşgîna " ê " di forma hevbendî de distînin.

Mînak:

Xortê şoreşger.

Lawê Medya.

Reşoyê şehîd  
Hogirê leheng.  
Beranê tov.  
Gayê cot.  
Nanê sêlê.  
Çemê Ferat.

#### Navên mêza

Navên mêza du beş in: Rastzayên mê û gumanzayên mê.  
Rastzayên mê bi rastî zayend mê ne. Rastzayên mê jî,  
ev in:

Navên kesên mê : Jin, keç, bûk, dê, xûşk, met,  
Navên jinan : Şêrîn, Narîn, Dîcla, Gulê,  
Navên lawirên mê : Mih, bizin, çêlek, mirîşk, dêl,...

#### Gumanzayên mê

Ev nav bi rastî ne nêr û ne mê ne, lê di ziman de mîna  
navên mê tên bikaranînê û paşgîna " a "

distînin. Mînak:

Teşt, çal, dar, rê, pênivîs, berf, av, şoreş, tirs, hêvî, birin,  
kel,...

Ji gumanzayên mê re rêzanek heye. Ew jî ev e:

Ev beşên navên razberî herdem mê ne:

### Navên jêbirînî

Navên ku bi " atî, tî û î " dawî dibin. Ev nav herdem mê ne û paşgîna " a " distînin. Mînak:

Serokatî, koratî, mirovatî, reşatî, hevaltî, biratî, bijartî, zavatî, erzani, xweşî, hogirî, giranî,...

### Navên raderî

Navên raderî raderên lêkeran in û herdem mê ne. Mînak:

Kirin, çûn, hatin, man, hebûn, firîn, firotin, ketin, lerizandin, damezirandin, firandin, kelandin,...

Navên zayend mê di hevbendiyê de herdem paşgîna " a " distînin. Mînak:

Çala avê.	Berfa sipî.
Keça şervan.	Jina azad.
Bizina kej.	Miha qer.
Şêrîna jîr.	Hacera şehîd.
Hevaltiya gelan.	Serokatiya hemdemî.
Xweşiya çiyar.	Hebûna ziman.
Çûna şoreşê.	Hilkişandina çiyar.

### Navên duzayend ( Nêremê )

Navên du zayend li gor kesê ku mirov liser daxive carna nêr û carna mê ne, yan ku jibo nêr û jibo mê jî, tên bikaranînê.



Mîna navên : Heval, yar, dijmin, dost, karker, mamoste, şervan, hogir, Şoreşger, ...

Ev nav û yên mîna wan dema bi navekî nêr re hevbend dibin " ê " distînin û dema bi yekî mê re be paşgîna " a " distînin. Mînak:

Hevalê dilsoz ( dema heval nêr be - xort, mêr )

Hevala dilsoz ( dema heval jin be )

Herwiha em dibêjin:

Yarê delal

Yara delal

Dostê çeleng

Dosta dilsoz

Mamosteyê dibistanê

Mamosteya dibistanê

Şervanê azadiyê

Şervana azadiyê

Karkerê jîr

Karkera jîr

Şoreşgerê kurd

Şoreşgera kurd

Dijminê hov

Dijmina hov

Evîndarê welat

Evîndara welat

Xebatkarê hêja

Xebatkara hêja

Têkoşerê gernas

Têkoşera gernas

Hogirê min

Hogira min

### Navên nêr

- |  |   |
|--|---|
| 1- Navên mirovên nêr                     | Bav , ap, xal, zava,  |
| 2- Navên candarên nêr                    | Ga, beran, dîk, ...   |
| 3- Navdêrên hejmarî                      | Du, sê, çar, pênc, deh,<br>sed, hezar,... lê yek mê<br>ye.  |
| 4- Navên rengan                          | Sor, zer, kesk (heşîn ),<br>qehweyî, agirî...   |
| 5- Navên gewher û madenan                | Hesin, zêr, zîv,<br>derî vê rêzê hilberînên<br>petrol û komirê mê ne:<br>Mazot, benzîn, komir, .. |
| 6- Berhemên candaran                     | Goşt, penîr, mast,<br>nîvişk, şîr, lê derî vê<br>rêzê: hêk, hirî û liva mê<br>ne.                 |
| 7- Mêweyên ( fêkî ) hişk                 | Hejîr, mewîj, ...   |
| 8- Darên hişk                            | Dar, tîrek, ço, ..  |
| 9- Hemû avên herik                       | Çem, cobar, ...<br>derî vê rêzê co û sûlav<br>mê ne.  |
| 10- Qût û dexil û hemû celeb navên wan : | Qut, dexil, genim, ceh,   |

11- Endamên laşê mirov yê der ve hemû nêr in  
Serî, çav, guh, dest,  
çerm, zik, ...

### Navên mê

- 1- Mirovên mê û navên wan Dê, xwişk, met, bûk,  
Şêrîn, Lîlav, Şermîn,  
Nermîn, Çîmen, Sûlav,  
Laliş,...
- 2- Hemû candarên mê Mî, bizin, çêlek, mirişk,  
mehîn, dêlik,...
- 3- Avên aram ( sekinî ) derya, gol, bîr, çal, Derî  
vê rêzê delav nêr e .
- 4-Navên erdnîgarî yê bajar, gund, çiya, deşt û welatan:  
Amed, Xanik, Bagok,  
Heran, Kurdistan,...derî  
vê rêzê navên çeman  
nêr in.
- 5- Êwirgeh Şikeft,... derî vê rêzê  
kon, xanî, axwir û stewl  
nêr in.
- 6- Navgînên siwariyê Otomobîl, taksî, tirên,  
firok, keştî....

- 7- Tiştên ji asîmanan tèn jêr û heyînên asîmanî:  
 Baran, berf, stêr, roj,  
 heyv  
 derî vê rîzê ba û ewir  
 û asîman nêr in.
- 8- Nexweşî, êş û navên nexweşiyên
- 9- Xwarinên pijandî û tiştên xwaringehê, lê nan, goşt, kefçî  
 û çetel nêr in.
- 10- Navên mûzîk û nivîsandinê.
- 11- Navên sîleh û çekan, lê çekên sipî:  
 Şûr, gurz,  
 doqik, bivir, şeşperî ,... nêr in.
- 12- Navên ku bi " î " , " ahî " , " tî " û "atî" dawî dibin:  
 Erzanî, meznahî,  
 hevaltî, biratî, ...
- 13- Navên tîpên abc
- 14- Darên heşîn ( ter )
- 15- Navên gulên
- 16-Navên pirtûk û pergalên nivîsandinê:  
 pel, kaxiz, pênûs,...
- 17- Pût û celebên giyayên ku dibin pût jibo candaran, lê ceh  
 nêr e

18- Hemû navên raderî ( raderên lêkeran ) :

çûn, hatin, birin ,...

19- Endamên laşê mirov yên hundir tev mê ne :

ceger, rovî, kezeb, ...lê  
dil nêr e.

20- Navên sal, hefte, rojên hefteyê, meh û demsalan hêmu  
mê ne.<sup>27</sup>

---

<sup>27</sup>Navên ku ji du parçeyan saz dibin zayenda parçeyê dawî distînin. Wek:  
Rê ( mê ye ) Ziman ( nêr e ) Rêziman ( zayenda ziman distîne û nêr e )  
Riya welat şoreş e. Zimanê kurdî şêrî e. Rêzimanê kurdî xweş e.

### 1.2.3.1.3. Zêder

#### Çiya

Çiya yek ji pîrozayiyên gelê Kurdistanê ne. Îro, mîna hemû koçberên dîrokî, çiyayên Kurdistanê bûne bargehên gerîlayên me yên leheng ku şerê Serxwebûn û Azadiyê bi rê ve dibin. Herwiha bav û bapîrên me jî, di demên zor û astengiyan de, xwe dikişandin çiyayên û serî didan berxwedanê, jibo parastina ziman, çand, dîrok, tore, hebûn û hemû biha û taybetiyên xwe yên netewî.

Îro, şoreşa Kurdistanê ya nûjen dîsa dide xuyakirinê ku çiyayên me ne tenê parastgehên pîroz in, lê belê kelehên berxwedanê ne jî, jibo pêkanîna êrîşên serkeftinê, berbi avakirina Kurdistanê serbixwe û azad ve ...

Koçberên dîrokî.

Gerîlayên me.

Şerê serxwebûn û azadî yê pîroz.

Şoreşa Kurdistanê ya nûjen.

Dema em van hevokan berçav dikin, em dibînin ku:

Hevoka yekemîn ji du navan saz dibe:

Koçber û dîrok, lê bêjeya "ên" girêdanek di navbera wan de çêkiriye û dide famkirinê ku gelek koçber bi vî rengî derbas



bûne. Herwiha hevoka duwemîn jî, bi bêjeya " ên " girêdanek di navbera nav û cînavekî de çêdike (Gerîla û me). Bêjeya " ên " dîsa wan bi hev girê dide û dide nasîn ku gelek gerîla ne, lê vê carê jiber ku gerîla bi tîpeke dengdar dawî dibe pêşiya " ên " tîpa " y " girtiye. Em dizanin ku koçber mêza ye, jiber ku em dibêjin: koçbera hovîtiyê.

Bêjeya gerîla dibe nêr û mê, em dibêjin: " Gerîlaya ARGK " yan jî : " Gerîlayê ARGK " .

Di encamê de tê nasîna ku bêjeya "ên" jibo koma ( pirhejmar ) herdu zayendan tê bikaranîna, jibo koma nêr û mê çêdibe. Mîna: Keçên kurd û xortên kurd.

Hevoka sêyemîn jî, ji du parçeyan pêk hatiye: Şer û serxwebûn , şerê serxwebûn û azadî û pîroz

di herdu parçeyan de "ê" girêdanekê çêdike, anku dibe amraza hevbendiyê (xistine pal) û dide zanîn ku bêjeya şer yekhejmar e û zayend nêr e. Tê nasîna ku "ê" jibo nêrzayê yekhejmar tê bikaranîna.

Hevoka çaremîn, dîsa ji du parçeyan e: Şoreş û Kurdîstan. Şoreşa Kurdistanê û nûjen, di her du caran de bêjeya " a " hevbendiyê di navbera van bêjeyan de dike û dide nasîna ku şoreş bêjeyeke mê û yekhejmar e. Tê nasîna ku bêjeya "a" jibo mêzaya yekhejmar tê bikaranîna.



Ev bêjeyên li jor hatine hejmartinê: a, ê, û ên. Zêder ji wan re tê gotinê. Di encamê de em dibêjin:

Zêder bêjeyeke biçûk e, du navan, navekî û rengdêrekî yan jî, navekî û cînavekî bi hev dide girêdanê, an ku hevbendiyê di nav wan de çêdike û hejmar û zayenda van nav û rengdêran diyar dike. Hevok herdem bi zêderê tê tewandinê.

#### A. Zêdera pendî

Zêdera pendî navekî yan rengdêrekî bi tenê , ku em baş nas dikin berçav dike û zayend û hejmara wan dide nasîn. Dema em dibêjin: " Dîroka Kurdistanê " em liser dîrokeke nas daxivin ku ew dîroka gelê Kurdistanê ye. Zêdera "a" hevbendiyê di navbera (dîrok û Kurdistanê ) de çêdike. Ev dîrok pal dide ser Kurdistanê, an ku Kurdistan palgeh û dîrok palvedêr e , "a" jî, amraza jibo vê ( bendek ) jê re tê gotinê, ji hêla din ve " a " dide nasîn ku dîrok yekhejmar û mêza ye.

Zêdera pendî ev e:

1. Jibo yekhejmara mêza " a " ye. Mînak:

Gula sor: Em dizanin liser kîjan gulê daxivin, an ku ev gul ji hêla me ve tê naskirinê. Peyva "a" jî,

hevbandiyê dike navbera navekî (gul) û rengdêrekî (sor) û dide zanîn ku guleke bi tenê û mêza ye. Herwiha em dibêjin: Keça kurd.

Pênivîsa min.

Xweşiya çiyar.

Biratiya kurdan.

Serhildana gel.

Şervana ARGK.

2. Jibo yekhejmara nêrza "ê" ye. Mînak:

Çiyayê Cûdî.

Dilê min.

Agirê Newrozê.

Şervanê ARGK.

Çemê Dîclê.

3. Jibo koma herdu zayendan ( nêr û mê ) "ên" tê bikaranînê. Mînak:

Gulên sor.

Dilên pak.

Çiyayên Kurdistanê.

Golên xwîné.

Gorên şehîdan.

Gayên cot.

Çowên bêbext.

Dema dawiya bêjeya pêşî tîpeke dengdar be ( y,w ) pêşiya

zêderê digre. Mînak:

Sorowê cotkar. ( Soroyê cotkar )

Birayên delal.

Ronahiya zanistiyê.

Xameya min.

Mirovahiya hemdem.

Bêjeyên mîna : dê, rê û mî dibin : di, ri, mi.

Diya min.

Riya min.

Miya qer ( miha qer ).

Zêder nav û cinavekî bi hev girê dide û xwedîtiyê ber çav dîke:

Gula min, çiyayê me, bavê min, diya min,...

Yan nav û rengdêrekî bi hev girê dide:

Gula sor , çiyayê bilind , zozanên xweş ,

bihara geş,...

Yan jî, du navan bi hev re girê dide:

Simkoyê Şikakî , çiyayên Kurdistanê ,

B. Zêdra nependî (nediyar)

Di zêdera pendî de me got: Gula sor, jiber ku me guleke bi tenê berçav dikir û me nas dikir kîjan gul e, lê dema em gulê bi sinor nekin û neyê naskirinê, em liser kîjan gulê daxivin , em dibêjin: Gulek sor. Ev bêjeya biçûk ku hevbendiyêke bi vî awayî çêdike: Zêdera nependî jê re tê gotinê.

Zêdera nependî ev e: ek, eke, ekê, ekî, ine, na, in.

Yekhejmar

Ek û ekî jibo nêr. Ek, ekê û eke jibo mê.

Xortekî gul çinî.

Marekî bi Şêrîn veda.

Azadekî serî hilda.

Xortek tivingê hildigre.

Şoreşgerek dijmin ditirsîne.

Gayek kayê dixwe.

Keçekê mar kuşt.

Bizinekê şîr rijand.

Malekê xwarin da.

Keçek nan dixwe.

Gulek avê vedixwe.

Şêrînek teşiyê dirêse.

Min keçeke bedew dît.

Şoreşgereke hêja hat gund.

## Kom

Di komê de nav " ina<sup>26</sup> , in " distîne.

Xortin sêvan dixwin.

Keçin pembû diçînin.

Lawina dar birîn.

Keçina kizwan çinîn.

Xortin hatin.

Keçin çûn.

Gulin çilmisîn.

Zarokin dibezin.

Salo darin birîn.

Memo gurin kuştin.

Osman leşkerina dikuje.

Zîne mihina didoşe.

Memo ji kurina pirsî.

Şêro bi xortina dikene.

Ciger dê ji bajarina derbas bibe.

Di navên nêr û mê yên nependî de, em (ekî) û (ekê) di rewşa tewandinê de bi kar tînin.

---

<sup>26</sup>Navên pirjimar dema ku bi (an) tîn tewandinê û nependî bin pir caran di şûna (inan) de, (ina) tê nivîsandinê.

#### 1.2.3.1.4. Piçkolekirina navan

Navê piçkole bi danîna paşgînekê çêdibe. Piçkolekirina navan bi armanca hez kirin, xweş kirin, ciwan kirin û pîs kirin û kêr kirinê çêdibe. Mînak:

Baxçe	ji navê bax
Darik	ji navê dar
Çetiko	ji navê çeto (çeter)
Hogirko	ji navê Hogir
Perwînkê	ji navê Perwîn

Paşgînên biçûkirina navan ev in:

ek, ok, kok, ole, kole, ik, çe, çik, ko, kele, leke, ûle, oke, k, iko, kê, ikê.

ek	destek, bendek, perdek, pêçek,
ok	zarok, canok, danok, gulok, şemamok,
kok	xweşkok, reşkok, delalkok,
ole	Reşole, gêjole, hişkole, mêşole,
kole	reşkole, piçkole,...
ik	darik, dasik, xweşik, reşik, dilik, keçik,
çe	baxçe, navçe,
çik	rêçik, derçik
ko	Hesenko, rebenko,

kele	sûrkele,
leke	çoleke,
ûle	mêşûle, zerûle,
oke	baroke,
k	gulîk, dargulîk, bijîk, cok,
iko	xortiko, xweşiko, reşiko,
kê	dilvînkê, Nermînkê,
ikê	xweşikê, sêvikê, gulikê,



#### 1.2.3.1.5. Hejmar ( kom û yekhejmar )

Di zimanê kurdî de du hejmar hene:Yekhejmar û pirhejmar.Yek yekhejmar e û ji yekê û jor de kom e.

##### Yekhejmar

Navê yekhejmar mirovekî, tişteki yan jî, lawirekî tenê bi nav dike. Navê yekhejmar nayê guhertin mîna xwe dimîne. Lê di tewandinê de, navê nêr (î) û yê mê (ê) distîne. Navên nependî (ek) û (eke) distînin û di tewandinê de,( ekî) û ( ekê ) distînin:  
Keç, xort, gund, keçek, xortek, keçeke, keçê, xortî, gundî, keçekê, xortekî, gundekî,...

##### Kom

Bêtir ji yekî ji mirovan, tiştan yan jî, lawiran bi nav dike. Dema nav diyar be, paşgîna " an " distîne. Lê dema nediyar be "nan" distîne. Navê kom di hevbendiyê de ( xistinepal ) paşgîna " ên " distîne: Keçan, xortan, keçinan, xortinan, keçên dilsoz, xortên çeleng,...

#### 1.2.3.1.6. Tewandina navan

Navê kom dibin hin mercan de tê tewandinê:

1. Nav, dema ku kirdeyekî bi berkar be di buhêrkê de tê tewandinê.

Şoreşgeran sîxurek kuşt.

Gundiyan serhildan çêkir.

Palan nîsk çinîn.

Xort(î)<sup>29</sup> çek rakir.

Keçê nan pijand.

Keçekê dijmin lerizandin.

Xortekî Şêrgo dît.

Şoreşgerinan sîxurek kuşt.

Gundînan serhildan çêkir.

2. Eger nav kirdeyekî bê berkar be, di herdeman de şût dimîne û nayê tewandinê.

Cotkar hatin.

Xwendevan rabûn.

Rêwî diponijin.

Dijmin dê bimirin.

---

<sup>29</sup>Tewandina navên nêr kêm tê bikaranînê. Mirov dikare bibêje: Xort çek rakir.

Di vê rewşê de em kombûna nav ji kombûna lêker nas dikin,  
jiber ku lêker " n "a kombûnê distîne: hatin, rabûn, ponijin,  
mirin,...

3. Eger nav di hevokê de kirdeyekî xwedî berkarekî durust  
be, di nihok û mandê de, nayê tewandinê.

Mêr çekan amede dikin.

Jin şoreşgeran bi nan dikin.

Keç xortan dibînin.

Koçer dê biçin zozanan.

Xort dê biçin çîyan.

Gerîla dê dijminan bikujin.

4. Eger nav berkarekî durust be, di buhêrkê de şût dimîne û  
di nihok û mandê de tê tewandinê..

#### Buhêrk

Gundiyan noker kuştin.

Kurdan caş dîtin.

Min şervan dîtin.

Min keç dît.

Min xort dît.

Nihok:

Ez şoreşgeran dibînim.

Em gulan diçînin.

Xort keçan pîroz dikin.

Mand:

Ez dê şoreşgeran bibînim.

Em dê gulan biçînin.

Ez keçê dibînim.

Ez xort(î) silav dikim.

5. Eger nav di hevokê de berkarekî ne durust be, di her çaxan de tê tewandinê.

Buhêrk :

Min ji xwendekaran pirsî.

Min li şehîdan silav kir.

Min bi şervanan re nan xwar.

Min ji keçê re got.

Te ji xort(î) pirsî?

Nihok:

Ez ji xwendekaran dipirsim.

Ez li şehîdan silav dikim.

Ez bi şervanan re nan dixwim.

Mand:

Ez dê ji xwendekaran bipîrsim.

Ez dê li şehîdan silav bikim.

Veguhastina navan (Tewang)

Nav mîna xwe namîne, di bin hin rewş û hoyan de tê guhastinê. Jibo têgihîştina veguhastina navan, emê bi hev re hevokên jêr berçav bikin.

1. Şêrînê! Tu şoreşgeran dibînî ?

Şêrin > Şêrînê

Azado were vê derê !

Azad > Azado

Keçno, werin dilanê!

Keç > Keçno

Xortno, ev govenda mêran e.!

Xort > Xortno

2. Hêvînê tiving hilgirt.

Hêvîn > Hêvînê

Ez nameyê dinivîsim.

Name > Nameyê

Min xebat li Botanê dît.

Botan > Botanê

Zoro ji Hewlêrê ye.

Hewlêr > Hewlêrê

Li vî xortî temaşe bikin.

Xort > Xortî

Vî bajarî ez gêj kirim.

Bajar > Bajarî

3. Ez çûbûm çiyê .

Çiya > Çiyê

Min ji hevêl re got

Heval > Hevêl

Min ji ava çêm vexwar.

Çem > Çêm

4. Min ji Hogir re got.

Hogir > Hogir re

Ez di Qamişlo re çûm Dêrikê.

Qamişlo > Qamişlo re

Stirî di piyê Gulê re çû.

Gulê > Gulê re

5. Em bi Zêrê ve çûn.

Zêrê > Zêrê ve

Şûr di pişta Ristem ve çû.

Ristem > Ristem ve

6. Kesbûna şoreşgerî di Nezîr de pêk hatibû

Nezîr > Nêzîr de

Me çayê di beroşê de çêkir.

Beroş > Beroşê de

7. Keçan çek hilgirtin

Keç > Keçan



Gerîlan dijmin hejand.

Gerîla > Gerîlan

Goşt di saringê de bû.

Saring > Saringê de

Koma yekemîn ji hevokên ku me rêz kirine, di darêja bangê de ne; Şêrînê , Azado, keçno û xortno, van navan di vê darêjê de paşgînên: ê, o, û no standine. Em ji van hevokan digihîjin vê derencamê:

Nav di darêja bangê de, tê guhastinê. Navê mê yê yekhejmar paşgîna (ê) distîne, mîna:

Şoreşê !

Yadê !

Xwişkê !

Hevalê !

Yarê !

Navê nêr yê yekhejmar paşgîna (o) distîne, mîna:

Kurdo !

Rizgaro !

Welato !

Mileto !

Hevalo !

Koma herdu zayendan ( nêr û mê ) paşgîna (no) distînin, mîna:

Hevalno!

Dayikno!

Kurdno!

Miletno!

Koma duyemîn ji hevokan, navên ku di darêja berkariyê de hatine tewandinê dicivîne: Hêvînê, nameyê, Botanê û Hewlêrê , navên mê ne. Ev nav bi paşgîna " ê " hatine tewandinê. Lê xortî, nanî û bajarî navên nêr in û bi paşgîna " î " hatine tewandinê.

Derencam:

Nav di darêja berkariyê de tînan tewandinê. Navê mê paşgîna " ê " distîne û navê nêr paşgîna " î " distîne.

Koma sêyemîn ji hevokan tewandina navên nêr ku tîpa " e " yan " a " tê de hebe berçav dike. Çiya bûye çiyê. Çem bûye çêm. Her wiha heval bûye hevêl.

Derencam:

Navê nêr ku tîpa " e " yan " a " di wan de hebe di tewandinê de " e " û " a " dibin " ê "

Gavan > Gavên

Şivan > Şivên

Şervan > Şervên

Xebat > Xebêt

Çem > Çêm

Koma çaremîn ji hevokan rewşeke cemhevî ku bûyer tê de pêk hatiye berçav dike. Jibo vê darêjê awayê bi hev re tê gotinê. Di awayê bi hev re de nav paşgîna " re " distîne û bersiva van pirsan dide:

Bi kê re ?      Tu bi kê re çûyî çiyê?

Ez bi Egîd re çûm çiyê .

Bi çi re ?      Tu bi çi re difirî ?

Ez bi ewran re difirîm.

Ji kê re ?      Te ji kê re got ?

Min ji Zînê re got.

Di ku re ?      Tu di ku re çûyî?

Ez di Qamişlo re çûm.

Di çi re ?      Te derzî di çi re kir?

Min derzî di ber kumê xwe re kir.

Koma pêncemîn ji hevokan yekîtiyekê di navbera bûyerê û kesê ku bûyer hatiye serê wî de berçav dike. Awayê tevayî ji vê darêjê re tê gotinê. Di awayê tevayî de nav paşgîna " ve " distîne û bersiva van pirsan dide:

Di ku ve ?      Şûr di ku ve çû ?

Şûr di pişta Ristem ve çû ?

Bi çi ve ?      Te ker bi çi ve girêda ?

Bi sing ve.

Di çi ve ?      Şûr di çi ve çû ?

Şûr di balgih ve çû.

Di kê ve ?      Gule di kê ve çû ?

Gule di Şîno ve çû.

Koma şeşemîn ji hevokan cihê ku bûyer tê de pêk hatiye berçav dikin. Jibo vê darêjê awayê cîwarî tê gotinê.

Nav di vî awayî de paşgîna (de) distîne û bersiva van pirsan dide:

Di çi de ?      Goşt di çi de ye ?

Goşt di beroşê de ye.

Di kê de ?      Kesbûna şoreşgerî di kê de ye ?

Di Nezîr de ye.

Di ku de ?      Şoreşger di ku de ne?

Şoreşger di mala Dilgeş de ne.

Koma heftemîn ji hevokan, dîsa mîna ya duyemîn, navên ku di darêja berkariyê de hatine tawandinê, dicivîne. Lê vê carê nav pirhejmar e. Di vê rewşê de navê kom bi paşgîna ( an ) hatiye tawandinê.

Gerîla

Gerîlan

Keç

Keçan

Nav di awayê raderî de:

Di darêja raderî de, nav mîna xwe dimîne, nayê guhastinê û bersiva van pirsan dide:

Kî çi dike ?

Kî dibîne ?

Keç dibîne.

Çi çi pê hat ?

Çi ket ?

Xanî ket.

Çi di çi rewşê de ye ?

Çi şikestiye ?

Derî şikestiye.

Kî di çi rewşê de ye ?

Kî hişyar e ?

Gel hişyar e.

Nasîn:

Di awayê bi hev re , tevayî û cîwarî de , nav bi daçekan tê tewandinê. Em dikarin jibo van darêjan awayê daçekî bibêjin.

#### Guhestina navên mê " keç "

Rêz	Awa	Pendî-Yek	Nependî-Yek	Pendî-Kom	Nependî-Kom
1	Rast	keç	keçek	keç	keçin
2	Bang	keçê	.....	keçno	.....
3	Tewandî	keçê	keçekê	keçan	keçnan
4	Bihevre	keçê re	keçekê re	keçan re	keçnan re
5	Tevayî	keçê ve	keçekê ve	keçan ve	keçnan ve
6	Cîwarî	keçê de	keçekê de	keçan de	keçnan de

### Guhestina navên nêr " xort "

Rêz	Awa	Pendî-Yek	Nependî-Yek	Pendî-Kom	Nependî-Kom
1	Rast	xort	xortek	xort	xortin
2	Bang	xorto	-----	xortno	-----
3	Tewandî	xort(î)	xortekî	xortan	xortnan
4	Bihevre	xort(f) re	xortekî re	xortan re	xortnan re
5	Tevayî	xort(î) ve	xortekî ve	xortan ve	xortnan ve
6	Cîwarî	xort(î) de	xortekî de	xortan de	xortnan de

### Guhestina navên nêr ( nan )

Rêz	Awa	Pendî-Yek	Nependî-Yek	Pendî-Kom	Nependî-Kom
1	Rast	nan	nanek	nan	nanin
2	Bang	nano	-----	nanino	-----
3	Tewandî	nên(nanî)	nanekî	nanan	naninan
4	Bihevre	nên re	nanekî re	nanan re	naninan re
5	Tevayî	nên ve	nanekî ve	nanan ve	naninan ve
6	Cîwarî	nên de	nanekî de	nanan de	naninan de



### 1.2.3.1.7. Tewandina navan - darêja berkarî

Di darêja berkarî de nav tê tewandinê. Navê mê paşgîna (ê) distîne û yê nêr paşgîna (î) distîne.

Eger navê nêr tîpên ( e ) yan ( a ) tê de hebin, ev tîp dibin ( ê ). Di rewşên jêrîn de nav dikeve darêja berkariyê:

1. Di buhêrk de, eger nav bi lêkerê derhingêv re kiryar be dikeve darêja berkariyê û tê tewandinê.

Navê mê:

Keçê çeka şoreşê hilgirt.	Keçê
Çêlekê ka xwar.	Çêlekê
Şêrînê gul av dan.	Şêrînê

Ev hevok bi vî awayî dikarin bîn ziman:

Çeka şoreşê ji hêla keçê ve hat hilgirtinê.

Ka ji hêla çêlekê ve hat xwarinê.

Gul ji hêla şêrînê ve hatin avdanê.

Navê nêr:

Vî xortî çeka şoreşê hilgirt.	Xortî
Vî hogirî gul av dan.	Hogirî

Ev hevok bi vî awayî dikarin bîn ziman:

Çeka şoreşê ji hêla vî xortî ve hat hilgirtinê.



Gul ji hêla vî hogirî ve hatin avdanê.

Navê nêr ku ( a ) di wan de heye:

Gê ka xwar. Ga > Gê

Êş genim kir ard. Aş > Êş

Nasîn: Peyvên bav, xal û ap derî vê rêzanê ne. Ev peyv mîna navên mê ( ê ) distînin, yan ( o ) distînin.

Apê / Apo çek hilgirt.

Bavo / Bavê gul çandin.

Xalê / Xalo av vexwar

2. Eger nav di demên nihok û pêşedemê de berkarekî durust be dikeve darêja berkariyê û tê tewandinê.

Navê mê

Nazê tivingê heldigire. Tivingê

Şînoyê çêlekê bibe mêrgê. Çêlekê

Gulê bizinê didoşe. Bizinê

Navê nêr

Nazê goşt(î) dixwe. Goşt ( î )

Nermîne wî giyayî dikelîne. Giyayî

Soro nêr dixwe Nêr ( nan )

Gulê dên dikelîne. Dên ( dan )

3. Eger nav berkarekî ne durust be, di herdemê de tê tewandinê.

Navê mê

Memo li şêrînê dike hawar.	Şêrînê
Huner ji Hêvînê pirsî.	Hêvînê
Emê li Botanê bibin mêvan.	Botanê

Navê nêr

Huner ji Azad(î) dipirse.	Azad(î)
Ezê li gundî bibim mêvan.	Gundî
Qenco ji êş hat.	Êş (aş )
Ez ji zimên hez dikim	Zimên
Guro li Osmên xist.	Osmên

4. Di darêja zêderî de, navê dawî tê tewandinê.

Navê mê

Mala jinê.	jinê
Kirasê Şêrînê.	Şêrînê
Nanê sêlê.	Sêlê

Navên nêr

Êşa dil ( î ).

Dîtina çav(î).

Çûna êş.

Sima gê.

Hilgirtina bêr.

Gurana nêr<sup>30</sup>.

Êşa serî.

Dil ( î )

Çav ( î )

Êş ( aş )

Gê ( ga )

Bêr ( bar )

Navê nêr ku ( e ) yan ( a ) di wan de heye, dema bi rengdêreke nişandinê yan rengdêreke hejmarî re bên bikaranînê, herdem bi ( î ) tên tewandinê.

Ezê hêsp bikirim.

Berên ceh xwar.

Ez ji berên ditirsim.

Ezê vî hespî bikirim.

Sî beranî ceh xwarin.

Ez ji vî beranî ditirsim.

---

<sup>30</sup>Eger navê nêr bi ( î ) dawî bibe ( î ) yek jê, jibo neyê dubarekirinê dikeve.

Soza keç û xortên kurd

Şêrîné ! Tivingê hilgire, mîna şêran xwe berde meydana  
rûmetê. Bila dinya bêguh bibihîze.

Mirovahiya kor ya bêçav bibîne. Lalên bêziman bipeyîvin.  
Bila tev bibihîzin, bibînin, biqîrin û bizanibin ku kurd hêdî  
bêrûmetiya sedsalan napejirînin. Azado! pêşmergeyê gelê  
xwe, lehengê serxwebûn û azadiyê, va ye roja me nêzîk  
dibe, bi kena şêrîn ji pişt çiyar ve der tê û dibêje: Şêrîné !  
Hevalê ! Azado! Hevalo !

Hogirno ! Gernasno !

Birgerînin! Govenda azadiyê ye. Kurdistana serbixwe li  
hêviya me ye. Xwe xemilandiye, xêliya kesk û sor û zer li  
xwe kiriye. Azadî, xwe bi rext û fişekan pêça û bejna xwe li  
ba kir. Şêrîné qilêşa xwe avêt milên xwe. Xêliya bûkaniyê  
pêça di nav buxçeya rengîn de. Mil bi mil keç û xortên hêja  
hatin pîrozgeha mêraniyê, soz dan û gotin: Emê herin  
Kurdistanê. Birînên wê derman bikin. bi deşt û çiyar re bibin  
yek. Di şikeft û berqefan de rakevin. Li bajêr me nîn e  
hedar. Çiyayên pîroz dê me hembêz bikin. Emê tîrêjên rojê  
ku ji pişt Cûdî ve dertên bihûnin xêliyên bûkan, landikên  
zarokan jê saz bikin. Êdî dergûşên vala bê mindal mayîn  
pêdiviya me pê nîn e. Emê hêlanên bihuştî ji zarokên xwe  
re bafirînin. Di şûna zîre zîra tank û balefiran de, wê

melodiyên bêmirin bîn bihîstinê. Guleyên ku dilên dayîkan  
dax didin dê bibin gul û binefş. Zozanên li koçeran  
qedexekirî dê bibin seyrangehên evîndaran. Em soz didin  
ku her tiştî di welatê agir û rojê de biguherînin, her tiştên  
xweş û ciwan bafirînin. Lê eger em şehîd ketin bila kefenê  
me ji ala rengîn be. Di roja serxwebûn û azadiyê de bi sê  
rengên gulan, kesk û sor û zer gorên me bi xemilînin, jibo  
hestiyên me giyan bidin û vê şadîmeniya mezin pîroz bikin.

### 1.2.3.1.8. Navên kirdeyî û berkarî

#### Navên kirde

Ev nav bi karekî radibe. Pişekî yan jî, delametekê pêk tîne. Navên kirdeyî bi hatina paşgînên ku ji koka lêkeran e li dû navan saz dibin. Bi yekgirtina nav û paşgînan, navekî nû saz dibe ku hem wateya nav û hem jî, ya lêker dide. Ev navên lebatî û livbaz bi bizavekê radibin û jibo wan "navên kirde" tê gotinê. Paşgînên ku navên kirde çêdikin, ev in:

Van	Aşvan, dergehvan, hozanvan, bilûrvan, gavan, şervan, xwendevan, dilovan, şoreşvan, dadvan, rojnemevan, bêrîvan,....
Wan	karwan, pêhlewan,...
Kar	Cotkar, xwendekar, serkar, nivîskar, tewankar, xebatkar, hesinkar
Ker	Karker, tevinker, şoreşker, spîker, dagirker, zêrker, şermker,...
Ger	Rojnameger, dadger, şanoger, hesinger, şoreşger, meyger, werger,...
Gêr	Wergêr, çapgêr, xwegêr, ...
Gir	Masîgir, rexnegir, wênegir, dengir,...



Bêj	Dengbêj, çîrokbêj,...
Baz	Hîlebaz, livbaz, rimbaz, serbaz, canbaz,...
Pêj	Xwarinpêj, nanpêj,
Pij	Nanpij,
Kêş	Wênekêş, barkêş, zehmetkêş,...
Dar	Dildar, koledar, serdar, zordar, dengdar, dikandar, kujdar,...
Dêr	Rengdêr, çavdêr, femandêr,...
Nas	Kurdnas, rojhilatnas, civatnas, mafnas,...
Zan	Kurdzan, zimanzan, dengzan, zemînzan, dîrokzan,...
Guhêz	dengguhêz, nûçeguhêz, wêneguhêz, ...
Bir	Darbir, destbir, qolbir, rêbir, porbir, namebir,...
Bîr	Rewşenbîr, ronakbîr, ...
Firoş	Gulfiroş, meyfiroş, zembîlfiroş, nanfiroş, şîrfiroş,...
Der	Jander, hewleder,...
Saz	Pîşesaz, dermansaz, plansaz,...
De	Dirinde, bexşînde, girîde
Bar	Xembar, tewanbar, ...
Ber	Rêber, fermanber,...
E	Xwende, xwere, beze, firoke,
Yar	Hişyar, biryar, mafyar,...
War	Bendewar,...



Wer	Serwer, bîrawer, pêşwer, ...
A	Zana, şareza, hosta,...
Ar	Xewar, kevnar,...
Ok	Kenok, gerok, revok, serok,...
Mend	Hişmend, hunermend, aqilmend, siyamend,...
Er	Daner,...

## Navê berkar

Ev nav buyerek tê serê wî û dikeve bin barê lêkerê ji babeta xwe. Navê berkar bi danîna paşgîna " î " li dû lêkeran saz dibe. Herwiha navekî nû tê çêkirinê, mîna:

Ketî > Yê ku ketiye.

Lêkera ket<sup>31</sup> + î > Navê berkar

Di navê berkar de, lêker bi xwe dibe nav. Mînak:

Hilgirtin > hilgirt > hilgirtî

Hilbijartin > hilbijart > hilbijartî

Vexwarî

Xwarî

Ditî

Mirî

Kenî

Dema em dibêjin : Hilbijartî, tê wateya yê ku ketiye bin hîkariya hilbijartinê.

---

<sup>31</sup>Ketin Ew ket ( kesê sêyemîn yê yekjimar di dema derbasbûyî de )

### 1.2.3.2. Cînav<sup>32</sup>

Cînav, di zimanê Kurdî de peyveke şûna navan digire.

Mîna:

Hogir diçe şoreşê.

Ew diçe şoreşê.

Hacer qehreman e.

Ew qehreman e.

Hacer ala şoreşê bilind kir.

Wê ala şoreşê bilind kir.

Gelê Kurd dijmin lerizand.

Wî dijmin lerizand.

Wek tê xuyakirinê, cînavên: Ew, ew, wê û wî şûna Hogir,

Hacer û gelê Kurd digirin û di hevokê de bi delameta van navan radibin.

---

<sup>32</sup>Cînav      Bernav ( Zemîr )

Beşên cînavan

1.2.3.2.1. Cînavên kesok (kesanî):

Ev cînav şûna navên kesan digirin. Ew jî, du awa ne:

1. Awayê rast:

A- Yekhejmar

Kesê yekemîn, yê ku dipeyive

Ez

Kesê duwemîn, yê ku pê re tê axaftinê

Tu

Kesê sêyemîn, yê kû axaftin liser e û ne amade ye

Ew

B - Kom

Kesên yekemîn, yên ku dipeyivin

Em

Kesên duwemîn, yên ku bi wan re tê axaftinê

Hûn

Kesên sêyemîn, yên ku liser wan tê axaftinê û ne li wir in

Ew

## 2. Awayê tewandî

### A - Yekhejmar

Kesê yekemîn, yê ku dipeyive

Min

Kesê duwemîn, yê ku pê re tê axaftinê

Te

Kesê sêyemîn, yê ku axaftin liser e lê ne li wir e

jibo nêr

Wî

jibo mê

Wê

### B - Kom

Kesên yekemîn, yên ku dipeyivin

Me

Kesên duwemîn, yên ku bi wan re tê axaftinê

We

Kesên sêyemîn, yên ku liser wan tê axaftin û ne amade ne wan

## 1. Awayê rast

Bi lêkerên derhingêv re

Di dema berê(buhêrk) de berkarê durust tên:

Xebat(î) ez dîtîm.	wî ez dîtîm.
Şêrîneh tu dîtî.	wê tu dîtî.
Dilberê ew dît.	wê ew dît.
Hewesê em dîtîm.	wê em dîtîm.
Comerd(î) hûn dîtîm.	wî hûn dîtîm.
Şevger(î) ew dîtîm.	wî ew dîtîm.

Cînavên: Ez, tu, ew, em, hûn û ew di hevokên jorîn de berkarên durust in.

Di dema niha de (nihok) kirde (kiryar) tîn:

Ez xebat(î) dibînim.	Ez wî dibînim.
Tu Şêrîneh dibînî.	Tu wê dibînî.
Ew Dilberê dibîne.	Ew wê dibîne.
Em Hewesê dibînin.	Em wê dibînin.
Hûn comerd(î) dibînin.	Hûn wî dibînin.
Ew Şevgerî dibînin.	Ew wî dibînin.

Cînavên: Ez, tu, ew, em, hûn û ew di hevokên jorîn de kirde(kiryar) ne.

Di mandê de (pêşedemê de) kirde tîn

Ezê gulê av bidim.  
 Ezê wê av bidim.  
 Tuyê (tê) sévê bixwî.  
 Tuyê wê bixwî.  
 Ewê Amedê pîroz bike

Ewê wê pîroz bike.

Emê serxwebûnê bibînin.

Emê wê bibînin.

Hûnê şoreşê pêş de bibin.

Hûnê wê pêş de bibin.

Ewê Newrozê geş bike.

Ewê wê geş bike.

Cînavên: Ez, tu, ew, em, hûn û ew di hevokên jorîn de

Kirde ne (Kiryar in).

Bi lêkerên nederhingêv re :

Di herdeman de kiryar ( kirde ) tên. Mînak:

Nihok

Ez difirim.

Tu difirî.

Ew difire.

Em difirin.

Hûn difirin.

Ew difirin.

Pêşedem

Ezê biçim

Tuyê( tê ) biçî.



Ewê biçe.  
Emê biçin.  
Hûnê biçin.  
Ewê biçin.

Bûhêrk

Ez ketim  
Tu ketî.  
Ew ket.  
Em ketin.  
Hûn ketin.  
Ew ketin.

Ev awayê cînavan di herdeman de bi lêkerên nederhingêv re tên bikaranînê, lê bi lêkerên derhingêv re, tenê di dema nihok û pêşerojê de tên bikaranînê. Herwiha bi navan re bi alîkariya lêkera "bûn" tên bikaranînê. Mînak:

Ez kurd im.  
Tu kurd î.  
Ew kurd e.  
Em kurd in.  
Hûn kurd in.  
Ew kurd in.

Ez im.  
Tu yî.  
Ew e.  
Em in.  
Hûn in.  
Ew in.  
Ez pale me.  
Tu pale yî.  
Ew pale ye.  
Em pale ne.  
Hûn pale ne.  
Ew pale ne.

## 2. Awayê tewandî

Ev awayê cînavan tenê bi lêkerên derhingêv re tên bikaranînê:

a. Di dema berê (buhêrk)de kirde ne ( kiryar in ).

Min al hilgirt.

Te al hilgirt.

Wê al hilgirt.

Wî al hilgirt.

Me al hilgirt.

We al hilgirt.

Wan al hilgirt.

b. Di dema niha ( nihok ) de berkarê durust in.

Nazê min dibîne.

Nazê te dibîne.

Nazê wê dibîne.

Nazê wî dibîne.

Nazê me dibîne.

Nazê we dibîne.

Nazê wan dibîne.

c. Di pêşedemê( mandê ) de berkarên durust tên:

Gulê dê min bibîne.

Gulê dê te bibîne.

Gulê dê wê bibîne.

Gulê dê wî bibîne.

Gulê dê me bibîne.

Gulê dê we bibîne.

Gulê dê wan bibîne.

d. Di herdeman de berkarên ne durust tên:

Azad (î) li min dixê. ( Nihok )

Şêrîne li te xist. ( Buhêrk )

Şermîne dê li wî bixê. (Pêşedem)

Ev awayê cînavan bi navan re nayên bikaranîne. Em dibêjin:

Ez şoreşger im.

Tu kurd î .

Ew bedew e.

Di Kurmancî de nabe, em bibêjin :

Min şoreşger im.

Te kurd î.

Wê bedew e.

Cînav hemû bêzayend in ( bêcins in ), tenê di awayê tewandî de, kesê sêyemîn ( wî, wê ) bizayend e." Wî " jibo nêr û " wê " jibo mê tê bikaranînê. Mînak:

Hawar dijmin lerizand.      Wî dijmin lerizand.

Hacer dijmin lerizand.      Wê dijmin lerizand.

Cînavên kesok herdem kirde yan jî , berkar in.

#### 1.2.3.2.2. Cînavên bêhêl

Cînavên bêhêl di kurdî de herdem berkar in û şûna cînavên kesok digirin. Cînavên bêhêl ev in: Ê, hev, êk, xwe.

Ê

Ev cînavê bêhêl, herdem yekhejmar e, li dû lêkeran tê û şûna " wî " û " wê " digire. Mîna:

Min tiving da Sozdarê.

Min tiving da wê.

Min tiving dayê.

Min gul da Azad.

Min gul da wî.

Min gul dayê.

Sozdarê      ->      wê                      -> ê

Azad              ->      wî                      -> ê

Ev cînav bi daçekên ( ji, li, bi, di ) re dibe yek û bi vî awayî

cînavên lihevxiştî tên çêkirinê . Mîna:

Li wî xist                      Lê xist

Li wê xist                      Lê xist

Bi wî çû                      Pê çû

Bi wê çû                      Pê çû

Di wî de çû                      Tê de çû

Di wê de çû                      Tê de çû

Ji wî pirsî                      Jê pirsî

Ji wê pirsî                      Jê pirsî

Li wî ( li wê )                      Lê

Bi wî ( bi wê )                      Pê

Di wî ( di wê )                      Tê

Ji wî ( ji wê )                      Jê

Mînak:

Min li dijmin xist.  
Min li wî xist.  
Min lê xist.  
Şêro ji Şêrînê pirsî.  
Şêro ji wê pirsî.  
Şêro jê pirsî.  
Ez bi pê nûsê dinivîsînim.  
Ez bi wê dinivîsînim.  
Ez pê dinivîsînim.  
Ez di zanîngehê de me.  
Ez di wê de me.  
Ez tê de me.  
Cînavê bêhêl "ê" şûna berkarên durust digire. Mîna:  
Min gula sor da Hêvînê.  
Min gula sor da wê.  
Min gula sor dayê.  
Lê ev cînav bi daçekan re şûna berkarên ne durust digire.  
Mîna:  
Min ji Gulê pirsî.  
Min ji wê pirsî.  
Min jê pirsî.

Hev

Ev cînav ji ( hev û din ) ku di şûn de bûye: hevdin , hatiye kurtkirinê û bûye hev. Hev, şûna berkarên durust jî, û yên ne durust jî, digire. Mînak:

Me hev dît.

Gulê û Hacer hev dîtin.

Gerîla û gundiyan hev dîtin.

Me li hev xist.

Şêrinê û Sozdar ji hev pirsîn.

Gundî û polîs bi hev çûn.

Cînavê "hev" bi daçekan re dibe yek û cînavên lihevxiştî çêdike.

Bi hev                      Pev

Ji hev                      Jev

Di hev                      Tev

Li hev                      Lev

Mînak:

Em bi hev re çûn.      Em pev re çûn.

Ji hev çûn.              Jev çûn.

Di hev de bûn.        Tev de bûn.

Li hev hatin.          Lev hatin.



## Êk

Ev cînav jî, bi wateya " hev " tê . Ji (êk û din) ku di şûn de  
bûye ( êk din ) hatiye kurtkirinê û bûye  
êk . Ev cînav jî , mîna hev tê bikaranînê. Şûna berkarên  
durust digire.

Mînak:

Noşîn û Hêvî êk dîtin.

Cegermij û Noşeng êk pîroz kirin.

Şûna berkarên ne durust jî, digire. Mîna:

Me ji êk (jêk) pirsî.

Roşeng û Noşeng li êk ( lêk ) xistin.

Cînavê bêhêl " êk " bi daçekan re dibe yek û cînavên  
lihevxiştî çêdike .

Bi êk	Pêk
Li êk	Lêk
Ji êk	Jêk
Di êk	Têk

Mînak:

Em bi êk hatin	Em pêk hatin.
Em li êk hatin	Em lêk hatin.
Em ji êk çûn	Em jêk çûn.
Em di êk de çûn	Em têk de çûn.

## Xwe

Ev cînavê bêhêl bi cînavê (rajêr) tê binavkirinê. Cînavê "xwe" şûna nav û cînavên nêr û mê kom û yekhejmar digire.

Mînak:

Min al da destê hevalê xwe.

Ez ji gelê xwe re dibêjim: "An kurdistan, an Kurdistan".

Dema ku kirde û berkar di hevokê de yek kes be, cînavê "xwe" şûna berkar digire. Mîna:

Min xwe nas kir.

Te xwe dît.

Wî xwe şîşt.

Cînavê "xwe" herdem berkar e, lê carnan bi kirdeyekî din re dibe kirde, dema du kes bi kar radibin. Mînak:

Ez û hevalê xwe çûn çiyê.

Min û hevala xwe pirtûk xwend.

## Nasîn

1. Dema çend cînav di hevokê de hebin, li gor kesan rêz dibin:

Ez, tu, ew, em, hûn, ew.

Min, te, wî, wê, me, we, wan.

Mînak:

Ez û ew, em çûn bajêr.

tu û ew heval in.

2. Eger di hevokê de çend lêker bi kirdeyekî pêk hati bin, kirde careke tenê tê gotinê. Wek:

Ez çûm, gihîştim û vegeriyam.

Lê eger lêkerin derhingêv û hin nederhingêv bin li gor lêker cînav tê bikaranînê:

Ez çûm , min dît.

Ez çûm , min xame kirî.

Hevoka : Em çûn , me hesp ji xwe re kirî. Hin bi vî hawayî bikar tînin:

Me çû hesp ji xwe re kirî.

#### 1.2.3.2.3. Cînavên nîşandek

Ev cînav şûna navên dûr û nêzîk, bi awakî ku van navan nîşan dikin digirin. Ev cînav ev in:

1. Cînavên ku dûrbûn û nêzîkbûna navê ku şûna wî digrin, diyar nakin, lê tenê hejmar û zayenda navdêr diyar dikin.

jibo zayendê nêr û yekhejmar :

yê

Yê ku te dît hevalê min bû.

Jibo zayendê mê û yekhejmar :

ya

Ya ku te dît şoreşger bû.

Jibo koma herdu zayendan :

yên

Yên ku te dîtin gerîla bûn.

Ev cînav bi serê xwe nayên. Herdem bi cînavên girêdanê  
( ku ) re tên û kirde ne.

2. Cînavên nîşandek jibo navdêrên nêzîk :

Ev

Ev hat.

Ev hevalê min e.

Ev hevala min e.

Ev cînav li gor navderê ku nîşan dide, tê tewandinê:

Jibo nêr yekhejmar dibe :

Evî

Evî kalî got.

Jibo mê yekhejmar dibe:

Evê

Evê keçê ez dîtim.

Jibo nêr û mê kom:

Evan

Evan keç û xortan got.

Gelek caran tîpa "e" ji " evî, evê, evan " tê avêtinê û dibin:

Vî, vê, van.

Jibo kûrkin û xurtkirina hizra nîşandinê "ev" bi zêderê re tê  
û dibe : eva, evê, evên.

Evê hat heval e.

Eva hat şervan e

Evên hatin gerîla ne.

Carma "ha" dikeve dawiya cînavê nîşandek û zêderê û ew jî,  
dibe cinavekî nîşandek :

Evê ha, eva ha, evên ha.

Evê ha Azad e.

Eva ha Şêrîn e.

Evên ha Azad û Şêrîn in.

3. Cînavên nîşandek jibo navderên dûr :

Ew

Ew xort kî ye?

Ew hevala min e .

Ew heval hatin.

Ev cînav jî, li gor navê ku nîşan dike, tê tewandinê.

Jibo nêr, yekhejmar dibe:

Ewî

Ewî xortî çi got?

Jibo mê, yekhejmar dibe:

Ewê

Ewê keçê xelat girt.

Jibo nêr û mê kom dibe:

Ewan

Ez ewan keç û xortan hez dikim.

Ji bo kûrkirin û xurtkirina hizra nîşandinê "ew" bi zêderê re tê û dibe: Ewê, ewa, ewên.

Ewê hat xortekî jîr e.

Ewa hat keçeke bedew e.

Ewên hatin xort û keçên gundê me ne.

"Ha" dikeve dawiya cînavê nîşandek û zêderê û ew bixwe jî, dibe cînavekî nîşandek: Ewê ha, ewa ha, ewên ha.

Ewê ha li ber xwe dide.

Ewa ha xebatê dike.

Ewên ha têkoşer in.

"Ew", di awayê xwe yê tewandî de, gelek caran "a" davêje û dibe: Wî, wê, wan

Wî xortî xweş got.

Wê keçê tiving hilgirt.

Wan keç û xortan serî hildan.

Di vê rewşê de, ji wateya hevokê mirov cudayî dixwe navbera cînavên kesok ( wî, wê, wan ) û cînavên nîşandek ( wî , wê, wan )<sup>33</sup>.

---

<sup>33</sup>Eger navdêr li pey van cînavan hebe, hingê dibin cînavên nîşandek.

Cînavê nişandek ( ev, ew ) kirde jî, û berkar jî, tên bikaranînê.

Lêkerên derhingêv bi evî, evê, ewî, ewê re

### Nihok

Di nihokê de, ev cînav şûna berkarên durust û ne durust digirin:

Ez ewî (ewê) dibim dibistanê.

Ez evî (evê) dibim seyranê.

Beran li ewî ( ewê ) dixê.

Beran li evî ( evê ) dixê.

### Buhêrk

Di buhêrkê de, ev cînav şûna kirde digirin:

Evî (evê) nan xwar.

Ewî (ewê) pîvaz xwar.

Di vê rewşê de şûna berkarê nedurust jî, digirin:

Berên li evî ( evê ) xist.

Berên li ewî ( ewê ) xist.

### Pêşedem

Di vê demê de şûna berkarên durust û nedurust digirin:

Ezê ewî (ewê) bitirsînim.

Ezê ewî (ewê) bibînim.

Mamoste wê ji ewî( ewê) bipirse.



Mamoste wê ji evî (evê) bipirse.

Lêkerên derhingêv bi (ev, ew) re

Nihok

Di nihokê de şûna kirde digirin:

Ev nên dixwe.

Ew avê vedixwe.

Pêşedem

Di pêşedemê de, şûna kirde digirin.

Evê min bigire.

Ewê te bibîne.

Buhêrk

Di buhêrkê de, şûna berkarê durust digirin:

Min ev dît.

Min ew xwar.

Lêkerên nederhingêv bi ( ev, ew ) re

Herddem şûna kirde digirin.

Ev çû welat.

Ew ji Botanê tê.

Ev diçe dibistanê.

Ew difire.

Evê bikeve avê.

Ewê ji bajêr derkeve.

Lêkerên derhingêv bi (evan, ewan) re

### Buhêrk

Di buhêrkê de şûna kirde digirin:

Evan xwar.

Ewan em dîtin.

### Nihok

Di nihokê de şûna berkarê durust û ne durust digirin:

Ez evan dibînim.

Ez ji wan dipirsim.

### Pêşedem

Di pêşedemê de şûna berkarê durust û ne durust digirin

Ezê evan bişînim welat.

Ezê ji wan bipirsim.

### Nasîn

Hin cînavên nîşandek di devok de awayên xwe winda kirine  
û ketine awakî din:

Evê ha	vîna	vaya	
Eva ha	vêna	vaya	
Evên ha	vêna	vana	evana
Ewê ha	wîna	waya	
Ewa ha	wêna	waya	
Ewên ha	wêna	wana	ewana

Lê ya durust ev e:

Ev, evî, evêha, evê, evaha, evan, evên, evênha.

Ew, ewî, ewêha, ewê, ewaha, ewan, ewênha.

Cînavê nîşandek "ev" bi bêjeyên : şev, roj û sal re dibe  
"î".

Ev şev	îşev
Ev roj	îroj
Ev sal	îsal

#### 1.2.3.2.4. Cînavên pêgehîn ( girêkî )

Cînavê pêgeh dikeve paşiya navdêr an cînavekî din û wan  
bi hevoka di pey wan re girê dide. Cînavê pêgehîn di  
zimanê kurdî de yek e. Ew jî, ev e: Ku

Cînavê "ku" di hevokê de, carna kirde û carna berkar e.

### Kirde

Ê ku tu dîtî heval bû.

Mirovê ku tu dîtî heval bû.

A ku tu dîtî şoreşger bû.

Keça ku tu dîtî şoreşger bû

### Berkar

Ê ku te dît gerîla bû.

Kesê ku te dît gerîla bû.

A ku te dît şehîd ket.

Keça ku te dît şehîd ket.

Evê ku tu dibînî mamoste ye.

Cînavê (ku) bi zêderê re tê bikaranînê :

Ê ku, a ku, ên ku, êd ku

Cînavê (ku) bi cînavên nişandek re tê bikaranînê:

Evê ku, eva ku, ewê ku, ewa ku, evên ku, evêd ku, ewên ku, ewêd ku,.

Mînak:

Xameya ku min kirî sor e.

Hespê ku te kirî boz e.

Ev çiyayê ku tu dibînî Cûdî ye.

Azadê ku tu nas dikî hevalê min e.

Di zimanê kurdî de, ji cînavê pêgeh û pê ve

(ku)yeke din heye pêwend (gihanek) e ev (ku)

du hevokan digihîne hev û herdem li pey

lêkeran tê. Mîna:

Em hatin ku em bixwînin.

Em diçin çiya ku em azad bibin.

Carna (ku) bi wateya heke tê ,

hingê (beriya lêker) jê re tê gotinê.

Ku gel serî hilde emê azad bibin.

Ku gerîla bîn gund emê dilşad bibin.

#### 1.2.3.2.5. Cînavên pirsiyariyê

Cînavên pirsiyariyê di hevokên pirsiyarî de,

şûna navan digirin û li gor pêkhatina hevokê carna berkar û

carna kirde ne. Cînavên pirsiyariyê ev in:

Kî, kê, kîjan, çi, çend, ku, çima, jiber çi,çawa,

kengî, ji kengî ve, li kuderê, bi kuderê ve,

ji kuderê ve, di kuderê re, di kuderê de, ma,...

KÎ ( kî )?

Ev cînav di hevoka pirsê de şûna navê mirovan digire.

Di lêkerên derhingêv de:

### Buhêrk

KÎ? Şûna berkarê durust digire. Mîna:

Te kî (kî) dît.?

We kî(kî) tirsand?

### Nihok

KÎ? Şûna kirde digire. Mîna:

KÎ sêvê dixwe?

KÎ bersiva min dide?

### Pêşedem

KÎ? Şûna kirde digire. Mîna:

Kiyê ( kî dê ) pirtûkê bixwîne?

Kiyê ( kî dê ) min bigire?

### Di lêkerên nederhingêv de

KÎ? Herdem kirde ye.

KÎ hat gund?

KÎ diçe bajêr?

Kiyê biçe bajêr?

KÎ? Tê tewandinê û dibe (kê?).

Kîjan?

Ev cînavê pirsyarî ji van bêjeyan tê bikaranînê:  
(kî, ji, van, yek) yan jî, (kî, yek, ji van) û li gelek deverên  
Kurdistanê , bi van awayî tê bikaranînê: kîjan, kujan yan jî,  
kîjik.

Ev cînav jibo kes û tiştan tê bikaranînê. Kîjan, li gor navdêra  
ku şûna wê digire tê tewandinê û bi navê nêr re dibe: Kîjanî  
û bi yên mê re dibe: Kîjanê. Bi koma herdu zayendan re  
dibe: Kîjanan. Mînak:

Kîjanî ji van Azad dît ?

Kîjanê tu dîtî ?

Kîjanan pez çêrand ?

Bi lêkerên derhingêv re

Buhêrk

Di dema berê de şûna kirde û berkar digire.

Kirde

Di vê rewşê de, kîjan tê tewandinê:

Kîjanî kirî ?

Kîjanê got ?

Kîjanan dît ?

Berkar

Di vê rewşê de, kîjan nayê tewandinê:

Te kîjan pirtûk kirî ?



Te kîjan keç dît ?

Te kîjan xort dît ?

Lê dema Kîjan dibe berkarê nedurust, tê tewandinê. Mîna:

Te li kîjanê xist ?

Te ji kîjanî pirsî ?

#### Nihok û pêşedem

Di şûna kirde de kîjan nayê tewandinê. Mîna:

Kîjan dikire ?

Kîjan dê bibîne ?

Lê di şûna berkar de tê tewandinê:

Tê kîjanê bibînî ?

Tu ji kîjanî hez dikî ?

Ewê kîjanî bikire ?

Emê ji kîjanî bipirsî ?

#### Bi lêkerên nederhingêv re

Herdem kirde ye û nayê tewandinê:

Kîjan hat ?

Kîjan diçe ?

Kîjan dê bê ?

Kê?

Ev cînavê pirsiyarî şûna navên mirovan digire.

Di lêkerên derhingêv de

Buhêrk

Di dema berê de, kê şûna kirde digire:

Kê got ?

Kê kiras kirî ?

Nihok û pêşedem

Kê şûna berkarê durust digire:

Tu kê dibînî?

Tê kê bitirsînî ?

Di herdeman de (kê) şûna berkarê ne durust digire. Mîna:

Te li kê xist ?

Tu ji kê dipirsî ?

ewê ji kê bipirse ?

Kê, bi lêkerên nederhingêv re nayê bikaranînê.

Cînavê pirsiyariyê ( kê ), (kî) bi xwe ye di awayê tewandinî de ye.

Ku?

Ev cînav şûna navê cih û deveran digire. Mîna:

Tu li ku bûyî ?

Tu ji ku tê ?

Ku dever xweş e ?

Cînavê ku ji avêtina bêjeya (dever) ji kudever hatiye kurtkirinê.

Tu ji ku yî ?

Tu ji kudeverê yî ?

Tu ji kuderê yî?

Cama cînavê kîjan cihê (ku) digire û kîjan der tê bikaranînê, yan jî, (kî) û dibe kîder. Ev cînav bi daçekan re tîn bikaranînê: Ji kîderê? Ji kuderê? Di kîderê de?

Di kuderê de? Bi kuderê ve? Bi kîderê ve? Di kuderê re?

Di kîderê re?

Çi?

Ev cînav, di hevoka pirsê de, şûna navên bêgiyan (bêrih ) digire.

Di lêkerên derhingêv de

Herdem berkar e. Mîna:

Te çi kirî ?

Tu çi dikirî ?

Ewê çi bikire ?

Tu li çi dixî ?

Ewê li çi bixe?

Te li çi xist ?

Di lêkerên nederhungêv de

Herdem şûna kirde digire. Mîna:

Çi hat ?

Çi diçe ?

Çiyê biçe ?

Cînavê pirsyariyê (çi) bi bêjeyên din re tê bikaranîné û cînavên pirsyariyê çêdike:

Bi cînavê (ma) re dibe: Çima?

Ma tu hatî ?

Çima tu hatî ?

Ma tu lal î ?

Çima tu lal î ?

Ma tu bindest î ?

Çima tu bindest î ?

Bi cînavê (ma) mirov pirs dike jibo ku agahdarê tişteki bibe. Lê dema çi bi ma ve dibe, mirov haydar e ji wê agahiyê, lê dixwaze nepejirîne û neqayîlbûna xwe liser diyar bike. Yan jî, sedem û egerên wê agahiyê bizani be:

Ma tu kurd î ?

Çima tu kurd î ?

Çi, bi bêjeya (awa) ve dibe çi awa û çawa tî çêkirinê . Bi cînavê pirsyarî ( çawa ) miriv li hal û rewşa tişteki, mirovekî, kesekî (mirov, candar) dipirse:

Tu çawa yî ?

Hespê te çawa ye ?

Xaniyê te çawa ye ?

Rojên te çawa derbas dibin ?

Tu çawa debar dikî ?

Çi , bi daçekên " jibo, jiber, jibona" re tê girêdanê û cînavên pirsyariyê " jibo çi? jiber çi? jibona çi " çêdike. Bi van cînavan em sedem û egerên tiştan dipirsin:

Jiber çi tu duh nehatî malê ?

Jibo çi em bîndest in ?

Jibona çi ev kuştin û talan ?

Çend?

Ev cînavê pirsyarî şûna hejmarnavan digire:

Te çend gul jê kirin ?

Te çend keç dîtin ?

Çend gerîla hatin gund ?

Çend gundî çûn şoreşê ?

Tu çendan dibînî ?

Cînavê pirsyariyê (çend) tenê , di koma herdu zayendan de tê tewandinê:

Te ji çendan pirsî ?

Tu çendan nas dikî ?

Çend, carna cînavê nependî ( nebinavkirî ) ye:

Min çend şoreşger dîtin.

Ez çend rojan li gund mam.

Di vir de (çend) bi wateya ( hinek ) tê û wateya xwe ya pirsîyariyê winda dike.

Kengî?

Bi vî cînavê pirsîyariyê , mirov li dem û çaxê buyerekê dipirse:

Kengî tê bê(yî) mala me?

Kengî emê hev bibînin?

Kengî tu çûyî gund ?

Kengî, bi daçeka (ji.... ve) cînavê pirsîyarî ( ji kengî ve ) çêdike:

Ji kengî ve tu neçûyî welat ?

Ji kengî ve tu li vir dimînî?

Ji kengî ve dibistana we dest pê kiriye ?

Ma?

Bi vî cînavê pirsîyariyê mirov liser tiştekî agahdar dibe:

Ma tu dizanî bi kurdî bixwînî?

Ma ev çi rewşa em tê de ne ?

Ma tu hozan î ?

Gelo?

Ev jî , mîna " ma" ye û carna pê re tê.

Gelo! Emê bi ser kevin?

Gelo! Ew çû welat ?

Ma gelo heye em rizgar bibin?

Ma gelo heye em bibin xwedî welat ?

#### 1.2.3.2.6. Cînavên nependî ( nebinavkirî )

Ev cînav şûna navan bi awakî nependî û nenaskirî digirin.

Di zimanê kurdî de gelek cînavên nependî hene, ji van cînavan:

Yek, heryek, tu, tukes, kes, tu, tutişt, herkes, hertişt, tişteke, hin, hinek, filan, behvan, hîç, gişt, hemû, hemûkes, her, tev, hîn, hinek, çend, çendek, pir, gelek, tenê, mirov, heçî,... Mînak:

Min tukes nedît .

Yekê digot yekî: Li me pîroz be yekî!

Herkes dibêje : Bijî Kurdistan!

Ez tişteki dibînim.

Gişt dibêjin: An serkeftin, an serkeftin!

Tev dibêjin : An Kurdistan, an Kurdistan!

Cînavên nependî mîna navan tîn tewandinê:

Yek, yekî, yekê, yekan, kes, kesî, kesê, kesan,...



#### 1.2.3.2.7. Cînavên xwemalîn (arzî, xwedanî )

Ev cînav şûna navekî ku xwedanekî wî di hevokê de heye digire. Cînavên xwedanî ji du cînavan bi hev dikevin.

Cînavên xwedanî ev in :

Jibo nêr, yekhejmar :

Yê min, yê xwe, yê te, yê evî, yê evê , yê ewî, yê ewê, yê me, yê we, yê evan, yê ewan.

Jibo mê , yekhejmar:

Ya min, ya xwe, ya te, ya evî, ya evê, ya ewî, ya ewê, yê me, yê we, yê evan, yê ewan.

Jibo koma herdu zayendan :

Yên min, yên xwe, yên te, yên evî, yên evê, yên ewî, yên ewê, yên me, yên we, yên evan, yên ewan.

Her cînavêk ji du cînavan pêk hatiye, mîna: Yê min. Cînavê pêşî "yê" hejmar û zayenda tiştan diyar dike, lê cînavê duwemîn "min" hejmar û zayenda kesê xwedanê wî diyar dike. Dema cînavê duwemîn cînavêkî nîşandek be, wek: Yê evî, ji bilî zayend û hejmar dûrbûn û nêzîkbûnê jî, diyar dike.

Mînak:

Gula min.	Ya min.
Destê ewî.	Yê ewî.
Guliya ewê.	Ya ewê.

Çiyayên me.

Yên me.

Kirasê evê.

Yê evê.

Cînavên xwedanî ji cînavên nependî jî, çêdibin, Wek:Ya  
filan, yê hinekan, ya tu kesî, yê kê,...

### 1.2.3.2.8. Tewandina cînavan

Cînavê pirsiyariyê " kîjan? "

Rêz	Awa	Mê	Nêr	Kom
1	Rast	Kîjan?	Kîjan?	Kîjan?
2	Bang	-----	-----	-----
3	Tewandî	Kîjanê?	Kîjanî?	Kîjanan?
4	Bihevre	Kîjanê re?	Kîjanî re?	Kîjanan re?
5	Tevayî	Kîjanê ve?	Kîjanî ve?	Kîjanan ve?
6	Cîwarî	Kîjanê de?	Kîjanî de?	kîjanan de?

Cînavên pirsiyariyê " kî? " û " çi? "

Rêz	Awa	Kî?	Çi?	Mê	Nêr
1	Rast	Kî?	Çi?	Çi jin?	Çi xort?
2	Bang	-----	-----	-----	-----
3	Tewandî	Kê?	Çi?	Çi jinê?	Çi xortî?
4	Bihevre	Kê re?	Çi re?	Çi jinê re?	Çi xortî re?
5	Tevayî	Kê ve?	Çi ve?	Çi jinê ve?	Çi xortî ve?
6	Cîwarî	Kê de?	Çi de?	Çi jinê de?	Çi xortî de?

### Cînavên nîşandek " ev " û " ew "

Rêz	Awa	Ev-Mê	Ev-Nêr	Ev-Kom	Ew-Mê	Ew-Nêr	Ew-Kom
1	Rast	Ev	Ev	Ev	Ew	Ew	Ew
2	Bang	-----	-----	-----	-----	-----	-----
3	Tewandî	Evê(Vê)	Evî(Vî)	Evan	Ewê(Wê)	Ewî(Wî)	Ewan
4	Bihevre	Evê re	Evî re	Evan re	Ewê re	Ewî re	Ewan re
5	Tevayî	Evê ve	Evî ve	Evan ve	Ewê ve	Ewî ve	Ewan ve
6	Cîwarî	Evê de	Evî de	Evan de	Ewê de	Ewî de	Ewan de

### Cînavên kesok

Rêz	Awa	Yek 1	Yek 2	Yek 3	Kom 1	Kom 2	Kom 3
1	Rast	Ez	Tu	Ew	Em	Hûn	Ew
2	Bang	-----	-----	-----	-----	-----	-----
3	Tewandî	Min	Te	Wî / Wê	Me	We	Wan
4	Bihevre	Min re	Te re	Wî/Wê re	Me re	We re	Wan re
5	Tevayî	Min ve	Te ve	Wî/Wê ve	Me ve	We ve	Wan ve
6	Cîwarî	Min de	Te de	Wî/Wê de	Me de	We de	Wan de

### 1.2.3.3. Rengdêr

Rengdêr bêjeyeke reng, salix, pesin, kêsîm û rewşa navan dide zanînê. Rengdêr, herdem li dû navan tê , wek:

Gula sor.

Çiyayê pîroz.

Ev hesp beze ye.

Keça kurd jîr e.

#### 1.2.3.3.1. Rengdêra pesinde ( salixdanê )

Ev rengdêr rewşa navekî bi başî yan jî, bi nebaşî tîne ziman, mîna bêjeyên :

Baş, sor, bilind, pîs, hêja,...

Rengdêra pesinde bi zêderê re yan jî , bi lêkera bûn re tê bikaranînê.

A. Bi zêderê re

Keça baş.

Xortê hêja.

Dijminê hov.

Gelên gernas.

B. Bi lêkera bûn re

im, î, e, in, in, in, bû, be

Ev xort şoreşger e.

Ev keç bedew e.

Azad jîr e.

Xebat hozan bû.

Di rengdêra pesinde de, bêjeyên mîna : Belengaz, ciwan, pîr, bextiyar,... Bi serê xwe rengdêr in û mîna navan tên bikaranînê.

#### 1.2.3.3.2. Rengdêrên dumil

Ev rengdêr bi du awa tên sazkerinê:

##### A. Rengdêrên afirandî (xurdezad)

Ev rengdêr bi alîkariya paşgîn û pêşgînan ji nav û lêkeran çêdibin. Paşgînen ku rengdêrên afirandî çêdikin ev in:

Baz        Canbaz, tîrbaz, rimbaz, sextebaz,....

Kar        Cotkar, alîkar, sextekar,...

Ker        Zivker, zêrker, şûrker, hesinker,...

Van        Bilûrvan, şervan, gavan,...

Bend       Solbend, sazband, ...

Vanî       Aşvanî, xêlvani, bajarvani,...

Gîn        Gulgîn, rengîn, xemgîn, lezgîn, xwazgîn,...

Yar        Hişyar, bextiyar, kiryar,...

Dar	Serdar, bindar, guhdar, dildar,...
Anî	Mêranî, piranî,...
Ane	Şahane, hovane,...
Î	Gundî, çiyayî, kurdistanî,...
Ger	Şoreşger, şevger, dadger, şanoger,.....
Mend	Cegermend, hişmend, hunermend,...
Gêr	Wergêr, Xwegêr, kargêr,.....

Pêşgînên ku rengdêrên afirandî çêdikin ev in:

Hev	Heval, hevrê, hevkar, hevpişe,...
Nîv	Nîvro, nîvşev, nîvsal, nîvnan,.....
Ho	Hogir, hozan, hoşeng,....

#### B. Rengdêrên hevbend

Rengdêrên hevbend, bi van awayên jêr saz dibin:

##### 1. Bi ketina zêderê:

Dilê şad.	Dilşad
Bejna zirav.	Bejinzirav
Çavê reş.	Çavreş

##### 2. Bi guhestina cihê bêjeyan:

Bihayê giran.	Giranbiha
Roja xweş.	Xweşroj



3. Ji du navan bi anîna navê berkar:

Bavkuştî

Dilşewitî

4. Ji nav û lêkerekî :

Dilrevîn

Dengbêj

Mêrkuj

Dengir

5. Ji rengdêr û lêkerekî:

Xweşgo

Pirgo

Reşbîn

Pakbîn

Pêpelûka rengdêran

Rengdêrên pesinde, pesnê navdêran bi pêpelûkên têvil (cuda) didin zanînê. Di van rengdêran de sê (3) paye hene: xwerû, payepîv û bêpaye.

1. Rendêra xwerû

Bêjeyek ragîr û bi serê xwe ye, wek:

Sor, reş, nû, kevin, mezin, bilind, jîr,...

## 2. Rengdêra payepîv

Ev rengdêr xwedî pilik e, xwedî, paye ye, ev paye jî, bi van bêjeyan tê pîvanê:

Pir, hindik, gelek, kêr, zêde, bêtir,...

Ev gul pir sor e.

Çiyayê Agirî gelek bilind e.

Di vê rengdêrê de sê paye tên dîtin: Nizimpaye, hevser û bilindpaye.

### A. Nizimpaye

Dema ku du nav di pesindanê de dikevin berheviyê, kêmbûn û nizimbûna navekî di wê rewşê de bi van bêjeyan tê xuyakirinê: Kêr, hindik (hindek).

Azad kêr ceger e.

Şêrî hinekî jîr e.

Cano kêr semax e.

### B. Hevser

wekheviya du navan di pesindanê de belî dike. Jiber ku her du nav di vî pesnî de di yek payê de ne û pila wan yek e. Ev rengdêr bi alîkariya bejeyên : Wek û mîna saz dibin.

Reşo wek Xebat şoreşger e.

Hacer mîna Bêrîvan gernas e.

### C. Bilindpaye

Ev rengdêr bi xwe rengdêra xwerû ye, lê paya wê bi paşgîna : tir û tirîn bilind dibe.

Dema ku berhevî di pesindanê de di navbera du navan de be. Navê yekemîn xwedyê paya yekemîn rengdêra xwerû distîne. Mîna:

Ev çiya bilind e.

Lê navê duwemîn , xwedyê paya bilindtir rengdêra xwerû bi anîna paşgîna (tir) distîne, Mîna:

Ev çiya bilindtir e.

Nermîn jîr e. Şermîn jîrtir e.

Gulê gewr e. Jînê gewirtir e

Hogir dirêj e. Memo dirêjtir e.

### 3. Rengdêrên bêpaye

Ev rengdêr pesnekî bilind yan jî , pir bilind dide nav. Di rengdêra bêpaye de sê pêpelûk tên xuyakirinê.

Dema em berheviyê bi pesnê (sor) dikin navbera sê gulan , em dibêjin:

Ev gul (pir) sor e. (pir sor)

Ev gul (hîn) sortir e. ( sortir)

Ev gul sortirîn e. ( sortirîn)

Pir hîn - tir tirîn

Pir sor e (hîn) sortir e sortirîn e  
Çiyayê Gebarê (pir) bilind e, Cûdî hîn bilindtir e, lê Agirî  
bilindtirîn e.  
Zozanên Şerefdînê pir xweş in, derya wanê hîn xweştir e, lê  
sersing xweştirîn e.

### Nasîn 1

Bêjeyên mîna mezintir dibin meztir.  
"Ar", di bêjeya Kevnar de şûna tir digire.  
Kevnar                      Kevintir  
Pirtir                         Bêtir  
"Ar", di bêjeya xewar de şûna tir digire.  
Xewar                        Bi xewtir

### Nasîn 2

Dema navdêr tê avêtinê, zêder dikeve pêşiya rengdêrê û bi  
delameta cînav radibe, wek:  
Ez gula sor û ya zer dibînim.  
Ya , şûna gulê digir e û bi karê cînav radibe.

### Nasîn 3

Carna navdêr yekcar ji hevokê dikeve û rengdêr mîna cînavekî li şûnê dimîne û bi delameta cînav radibe û mîna wî tê tewandinê. Herwiha ji rewşa rengdêrî dikeve:

Tirsim bimirim nebînim esmera min

Riya Mêrdînê bi kaş e

Delala min.

Esmera min                      Yara mina esmer.

Delala min                      Yara mina delal

Esmer û delal du rengdêr in, lê navdêrên wan ketine. Jibo vê mîna navdêran bi zêderê re hatine tewandinê.

#### 1.2.3.3.3 Rengdêrên nîşandek

Ev rengdêr cînavên nîşandek bi xwe ne. Dema ku navdêr di hevokê de tê gotinê, ev cînav dibin rengdêr, wek:

Ev mirov îro ji Amedê hat.

Ew keç îro ji çiyê hat.

Evî xortî got.

Evê keçê got.

Bi rengdêra nîşandek re navê nêr li gor rêzana gelemper tê tewandinê, wek:

Ez evî nanî dixwim. ( Nabe ku em bêjin - nê )

Ez ji evî bajarî hez dikim.

Ez evan bajaran dibînim.

Dema ku gelek navdêr ji yek hejmarê bin û zayenda wan ne yek be jî, em yek rengdêra nîşandek tînin û navdêrê dawî tenê tê tewandinê, wek:

Evî tîr û kevanî bide min.

Ez evî xort û keçê dibînim.

Rengdêra nîşandek jî, di vê rewşê de li gor zayenda navdêra pêşî tê tewandinê.

Lê dema ku zayenda navdêran ne yek be, her yek rengdêra nîşandek li gor hejmara xwe, distîne.

Ez evê gulê û evan daran dibînim.

Ez ji ewî bajarî û ewan gundan hez dikim.

#### 1.2.3.3.4 Rengdêra hejmarî

Rengdêra hejmarî, hejmar bi xwe ye, dema ku di hevokê de bi navdêra xwe re bê, wek:

Heşt şoreşger hatin.

Bîst şervan çûn çiyê.

Sed gerîla ketin bajêr.

Rengdêra hejmarî du beş in :Jimarîn û rêzîn



#### A. Jimarîn

Ev rengdêr hejmara navdêr dide zanîn. Dikeve pêşiya navdêr û li gor tewanga xwe navdêr dide tewandinê, wek:

Deh gul vebûn.

Şeş mirovan got.

Çil keçî biryara şoreşgerî da.

Ezê neh pirtûkan bikirim.

#### B. Rêzîn

Ev rengdêr dikeve paşiya navdêran û rêza wan dide zanîn, wek:

Azadê şeşane di rêzê de.

Hespê min yê sisêyan derket di bezê de.

Gulê di rêza sihî de ye.

Rengdêra rêzîn bi xwe tê tewandinê û tewanga xwe nade navdêr. Carna rengdêra rêzîn hejmara rêzê jî, diyar dike, dema ku ev rêz mîna koman be.

Gerîla çar çar hatin.

Gundî deh deh diçûn.

Jimarnavên didu û sisê dema dibin rengdêrên hejmarîn, dibin du û sê, wek:

Du mirov mirin.

Sê mirov hatin mala me.



#### 1.2.3.3.5 Rengdêra pirsiyarî

Ev rengdêr cînavên pirsê bi xwe ne. Dema ku dikevin pêşiya navdêr dibin rengdêrên pirsiyarî:

Çend firok hatin ser we ?

Kîjan xortî got ?

Çend mirovan xwar ?

#### 1.2.3.3.6 Rengdêra nependî

Ev rengdêr cînavên ne pendî ne. Dema ku dikevin pêşiya navdêra xwe dibin rengdêrên nependî:

Hemû mirovan dît.

Min tu çare nedît.

Min filan kes dît.

Min çend gur dît.

#### 1.2.3.3.7 Rengdêra xwedanî ( arzî, xwemalîn )

Ev rengdêr ji cînavên kesok û nîşandek pêk tê . Li pey navdêran tê , lê ew bi xwe gerek e, li pey cînavên xwedanî " yê, ya, yên " bihata. Ev rengdêr û navdêra xwe bi zêderê, bi hev tên girêdanê. Cînavên ku dibin rengdêrên xwedanî ev in: Min, xwe, te, vî, vê, wî, wê, me, we, van, wan.

Pirtûka min.

Gulê û Şêro kurê xwe dît.

Keça van.  
Bexçeyê wan.  
desmala vê.  
Gundê min û te.

### Nasîn

dema gelek rengdêrên pesinde di hevokê de bi navekî ve dibin, bi vî awayî tên bikaranînê.

1. Navê nêr yekhejmar:

Navdêr zêdera "ê" distîne. Rengdêrên navîn " î " distînin û ya dawî mîna xwe dimîne, nayê guhertinê.

Mînak:

Xortê çelengî jîrî qenc.

Çiyayê asêyî bilindî pîroz.

kevîrê reşî sitemî şahîkî gelover.

Lê dema nav nependî be "ekî" distîne.

Xortekî çelengî jîrî qenc.

Çiyayekî asêyî bilindî pîroz.

Kevîrekî reşî sitemî şahîkî gelover.

Beraneke kolî girsî qer.

Şoreşgerekî zaneyî mêrxasî leheng.

## 2. Navên mê yekhejmar

Navdêr zêdera "a" distîne lê rengdêrên navîn "e" distînin û ya dawî mîna xwe dimîne, nayê guhertinê, wek:

Keça rinde bedewe ciwan.

Ava zelale kûre xurt.

dara bilinde heşîne xweşik.

Lê dema navdêr nependî be "eke" distîne, wek:

Çêlekeke beieke bilinde bişîr.

Keçeke rinde bedewe jîre şoreşger.

Goleke firehe kûre bigere bitirs.

## 3. Koma herdu zayendan ( nêr û mê )

Navdêr zêdera "ên" distîne. Lê rengdêrên navî "e" distînin û ya dawî mîna xwe dimîne nayê guhertinê, wek:

Keçên rinde bedewe şoreşger.

Xortên çelenge qence mêrxas

Lê dema navdêr nependî be, "in" distîne. Wek:

Çemin dirêje xurte boşav.

Şervanin jîre çelenge mêrxas.

### 1.2.3.4 Hejmar

Hejmar perçeyek ji axaftina zimanê kurdî ye. Li gor ho û mercên hevokê, bêjeyên wî beşê axaftinê tên guhertinê.

#### 1.2.3.4.1 Beşên hejmarê

1. Hejmarên bingehîn:

a. Hejmarên dehên pêşî (yekemîn):

1 yek

2 du

3 sê

4 çar

5 pênc

6 şeş

7 heft

8 heşt

9 neh

10 deh

b. Hejmarên dehên duwemîn:

11 yazdeh<sup>34</sup>

12 duwazdeh

13 sêzdeh

14 çardeh

---

<sup>34</sup>Hin herêm dibêjin: Deh û yek, deh û didu, deh û sisê,...

15 pazdeh

16 şazdeh

17 hivdeh

18 hijdeh

19 nozdeh

20 bîst

c. Hejmarên dehtayî:

10 deh

20 bîst

30 sî(sih)

40 çil (çel)

50 pêncî (pêncih)

60 şeşt

70 heftê

80 heştê

90 not

100 sed

ç. Hejmarên sedtayî:

100 sed

200 dused

300 sêsed

400 çarsed

500 pêncsed

600 şeşsed

700 heftsed

800 heştсед

900 nehсед

1000 hezar

d. Hejmarên mezin:

1000 000 milyon (hezar hezar)

1000 000 000 milyar (hezar milyon)

Bi gelenperî hejmarên bingehîn di kurdî de bi vî awayî çêdibin:

0 nîn (sifir, hîç)

1 yek

2 du (dido)

3 sê(sisê)

4 çar

5 pênc

6 şeş

7 heft

8 heşt

9 neh

10 deh

11 yazdeh

12 diwazdeh

13 sêzdeh

14 çardeh

.....

20 bîst

21 bîstûyek

22 bîstûdu

23 bîstûsê

24 bîstûçar

25 bîstûpênc

.....

30 sih (sî )

31 sihûyek

32 sihûdu

.....

40 çil

41 çilûyek

42 çilûdu

.....

50 pêncih (pêncî)

51 pêncihûyek

55 pêncihûpênc

.....

60 şêst



61 şêstûyek  
.....  
70 heftê  
71 hetêûyek  
.....  
80 heştê  
81 heştêûyek  
.....  
90 not  
91 notûyek  
.....  
100 sed  
101 sedûyek  
.....  
200 dused  
201dusedûyek  
202 dusedûdu  
300 sêsed  
301sêsedûyek  
1000hezar  
1001 hezarûyek  
100 001 sedhezarûyek  
101 000 sedûyekhezar

## Nasîn

Di kurdî de hejmar ji milê çepê ve (ji milka bilind ve) tîn xwendinê.

### 1.2.3.4.2 Tewandina hejmarên bingehîn

#### Yek

Yek bi "ê" tê tewandinê

Min ji yekê<sup>35</sup> pirsî.

Min ji bîstûyekê re got.

Sedûyekê ez dîtîm.

Sala hezarûnehsedûyekê.

Di sala 1981ê de, ez çûm zanîngehê.

Di sala 1991ê de, şerê gel li Kurdistanê xurt bû. Jimara yekê ku dikeve pêşiya navdêrekê, ew navdêr li gor tewangên xwe tê tewandinê. Jiber ku yek tewanga xwe liser navdêrên ku pê ve tîn girêdanê bi rê ve nabe.

Ji yek hespî pê ve min nedît.

Ji yek xortî pê ve nepeyîvî.

Ji yek gulê pê ve bihn nedida.

Ji yek keçê pê ve min hez nekîr.

---

<sup>35</sup>Jimara yekê li vir ne bi wateya şexsekê ye.

## Nasîn

Dema hejmar hevbend be ( bîstûyek , çilûyek )

hingê perçeyê duwemîn tenê tê tewandinê û

perçê yekemîn mîna xwe dimîne:

ji bîstûyekê

Sala nehsedûyekê

Ji didowan heta bîstan

Hejmarên ji didowan heta bîstan bi "an" tîn tewandinê, wek:

Diduwan ji min pirsîn.

Çaran ez dîtim.

Min ji dehan re got.

Çardehan ez girtim.

(1920) Sala hezarûnehsedûbîstan.

Di sala (1914)an de ,şerê cihanê yê yekemîn vêket.

( hezarûnehsedûçardehan)

Di sala 1984an de şerê çekdarî li Kurdistanê dest pê kir.

( Hezarûnehsedûheştêûçaran).

Ev hejmar( 2 -20 ) tewangên xwe didin navdêrên xwe jî, ev

navdêr li gor tewanga van hejmaran tîn tewandinê:

Min ev tiving bi şeş zêran kirî.

Bîst mirovan rê birîn.

Hijdeh keçan çek hilgirtin.

Çar salan min xwendina zanîngehê kir.

Hejmarên ji( 2 - 20 )dema bi serê xwe tên û navdêra wan ji hevokê dikeve ew bi xwe tên tewandinê. Lê dema bi navdêra xwe re tên, navdêra xwe didin tewandinê.

Hejmarên dehtayî ( 30,40, 50,.....100 )

Ev hejmar bi "î" tên tewandinê:

Sihî ji min pirsî.

Min ji çilî re got.

Sala 1990î, sala Serhildana Gelî ye.

Di sala 1980î de conta faşist hat desthilatîyê.

Sedî ji min re got : " Neçe Ewropa."

Sala (1970)î (hezarûnehsedûheftêyî)

Jimarên ( 30, 40, 50, 60, 70, 80, 90, 100 ) dema navdêra wan dihevokê de be, tewanga xwe didinê:

Min ev çek bi sed zêrî kirî.

Min ev şal bi çil pereyî kirî.

Sih mirovî rêveçûn çêkirin.

Pêncî kesî ez dîtîm.

Hezar

Hezar jî, mîna hejmarên dehtayî bi " î " tê tewandinê û tewanga xwe dide navdêran:

Hezarî bi hev re digotin: " Bijî Kurdistan ".

Min ji hezarî pirsî.

Hezar mirovî digotin : An Kurdistan an Kurdistan!

Min ev pirtûk bi hezar pereyî kirî.

Dema hezar bi hejmareke din re tê bikaranînê dikeve bin  
hîkariya wê hejmarê û li gor tewanga wê tê tewandinê:

Ji çar hezaran yek hat.

Sed hezarî serî hildan.

Bîst hezaran digotin: " Bimre bindestî ".

Yek hezarê min heye.

Di vê rewşê de hezar nikare navdêra xwe bitewîne û ew bi  
xwe jî, nayê tewandinê ku navdêr hebe:

Min ev tişt bi çar hezar zêr kirî.

### Nasîn

Rêzana ku liser hezarî dimeşe liser milyon û milyardî jî,  
dimeşe:

Milyonî digot: " kurd namirin."

Milyon kurdî soz didan ku riya şehîdan bişopînin.

Dema hejmar ne diyar be û guman liser hebe, herdem bi  
"an" tê tewandinê:

Bi hezaran gelê me serî hildide.

Bi milyonan alîkarî jibo şoreşê diçe.

Bi sedan rewşenbîr dibin yek.

## 2. Hejmarên rêzde

Ev hejmar bi paşgîna " emîn " dawî dibin:

Yekemîn , duwemîn, sêyemîn, çaremîn, pêncemîn, şeşemîn, ....

Ev hejmar cihê navdêrekê di nav rêzekê de diyar dikin.

## 3. Hejmarên parçeyî yên bingehîn

$1/2 = nîv$ ,  $1/3 = sêyek$ ,  $1/4 = çaryek$ ,  $2/3 = sêdu$ ,  $5/4 = çarpênç$ ,....

Tewandina hejmarnava "nîv"

dema nîv bi serê xwe be, bi "î" tê tewandinê:

Nîvî bide min.

Me bi nîvî kir.

Di vê rewşê de ku navdêr bê gotinê, ev navdêr li gor tewanga xwe tê tewandinê:

Nîv nanî bide min.

Min ev tişt bi nîv zêrî kirî.

nîv sêvê bixwe.

Sed û nîv rojê min kar kir.

Dema "nîv" bi hejmarekê ve dibe li gor tewanga wê hejmarê tê tewandinê:



Bîst û nîvan.

Çar û nîvan.

Sed û nivî.

Çil û nivî.

Yek û nivê.

Hejmarên parçeyî yên dehyekî

0.1 = nîn xal yek, 0.02 = nîn xal nîn dido,

1.45 = yek xal çilûpênc,....

4. Hejmarên Tewaw

0, 1, 2, 3, 3, 4, 5, 6, ....

Nîn, jore 1, jore dido, jore sisê,...

0, -1, -2, -3, -4, -5, -6,....

Nîn, jêre 1, jêre dido, jêre sisê,...

5. Hejmarên cotîn

2, 4, 6, 8, 10, 12, 14, ...

Jore dido, jore çar, jore pênc,...

-2, -4, -6, -8, -10, -12, -14, ...

Jêre dido, jêre çar, jêre pênc,...



6. Hejmarên dabeş

2, 4, 6, 8, 10, 12, 14, ...

-2, -4, -6, -8, -10, -12, -14, ...

7. Hejmarên xwebeş

1, 3, 5, 7, 9, 11, 13, 15, 17, 19, 21, 23, .....

8. Hejmarên çarkirî

Carek, ducar, sêcar, .....

Yeko yeko, dido dido, .....

Yekta, duta, sêta, ...

9. Hejmarên kombêj

şeşek, heftek, heşteker, ...

### Ehmedê Xanî û zarok

Rojek ji rojan Ehmedê Xanî, şeş zarokên kurd, keç û kur birin mala xwe. Mêvaniyeke mezin jibo wan li dar xist. Di şûn de, di nav wan de rûnişt û got: Ev gotinên min giring in, hûn di dilê xwe de veşêrin. Hûn biçûk in. Hûn geş in. Bê derd û xem dilîzin û dikenin. Ev dema dilgeşiyê ye. Eger hûn dixwazin her gav bextiyar bibin û tu caran pir bedbext nebin, li du tiştan bigerin: Heskirin û xebat. Kî hez ji we bike, hez jê bikin. Îroj, hez ji mirovên xwe bikin. Hez ji dê û bavên xwe bikin. Hez ji hevalên xwe bikin. Di şûn de hûnê hîni hezkirina diya me gişan, Kurdistanê bibin.

A diduwa, bixebitin. Îroj, jibo hînbûnê, jibo zanînê bixebitin. Daku hûn di halê dinê de bizanibin pêş ve biçin. Bibin mirov. Bibin hêja. Bibin serbest. Bibin însan.

Gava hûn dersên xwe baş dizanin. Dilê mamosteyê xwe xweş dikin. Hûn jî, geş dibin. Ji barekî giran rizgar dibin. Sivik dibin. Ev her gav wisa ye. Bixebitin, daku dilê we her gav ji we xweş be. Gava dilê mirov vehêsayî û biken be. Ew mirov tu caran ne bedbext e.

Zarokên delal !

Ez bi we bextiyar im. Ez dixwazim hûn jî, bi min dil xweş bibin. Daku welat jî, bi hezkirina me, her gav şa be.

### 1.2.3.5 Lêker

Lêker peyvek e guhêrbar e, di zimanê kurdî de, kar, kirin, bûn û hebûna mirovekî, tişteki yan jî, lawirekî nîşan dike. Ev peyv li gor dem, kes û raweya kirinê tê guhertinê. Di darêja raderiyê de yan ku dema lêker bê têkilî ye mîna nav tê bikaranînê. Ji vê darêjê re "rader" tê gotinê.

Mînak: kirin, birin, hatin, ketin, hilgirtin, rûniştin, kirîn, birîn, firîn, çûn, bûn, sûn, man, dan, pan, hejandin, lerizandin, firandin, .... ûwd.

Radera lêker du parçe ye, kok û paşgîn:

kirin	kir - in
kirîn	kirî - n
çûn	çû - n
man	ma - n

Paşgîna lêkerên kurdî herdem (n) e , jiber ku (i) tîpeke sist û lawaz e. Bi ketina (n) ew bi xwe jî, ji dawiya lêker dikeve.

kir - in	kir
kirî - n	kirî
çû - n	çû
ma - n	ma

Dema ku em radera lêker bi dem, kes, hejmar û raweyekê re têkildar dikin, lêker li gor wan hoyan tê veguhastinê . Di

vê rewşê de , li gor demê du kokên lêker tên ber çavan, ew jî, ev in : Koka demên berê (KDB) û koka demên niha û pêşedemê (KDN).

Bi ketina paşgîna lêker, rasterast koka demên berê ( KDB ) bi dest me dikeve.

kir - in                      kir

Kir, lêkera kirin e bi kesê sêyemîn yê yekhejmar re di buhêrk de. Wî / Wê kir.

Jibo bi destxistina koka demên niha û pêşedemê tu rêzanên tevayî nîn in. Tenê lêkerên ku bi (andin) û (în ) dawî dibin bi rê ne (rêzan liser wan dimeşe).

Lêkerên ku bi ( andin ) dawî dibin:

"din" dikeve û "a "cihê xwe dide "î":

Revandin      Revan      Revîn

Kelandin      Kelan      Kelîn

Lêkerên ku bi "în" dawî dibin:

" î n " dikeve û parçeyê dimîne koka dema niha û pêşedemê ye ( KDN )

Kirîn              Kir

Birîn              Bir

Hemû lêkerên din, pêwîst e mirov fermaniya wan nas bike ev jî, bi jiberkirinê çêdibe.

Kirin              Bike              Bi-k-e              k

Gotin

Bibêje

Bi-bêj-e

Bêj

#### 1.2.3.5.1 Veguhastina lêker

Ji têkildariya radera lêker bi kes, dem, hejmar û raweyan re " veguhastin " tê gotinê:

Min pênivîsek baş kirî.

Azad diçe şoreşê .

Min du gulên sor dîtî.

baş bixebite tê serfiraz bibî.

Di veguhastina lêker de, pêwîst e em berî her tiştî kokên deman nas bikin. ( KDB ) jibo hemû demên derbas bûyîn û ( KDN ) jibo demên nihok û pêşedemê.

Dema mirov lêker vediguhêze çar tiştên bingehîn tîn ber çavan ew jî, ev in : Kes, dem, hejmar û rawe.

#### 1. Kes

Kes, mirovek e, tişteke yan jî, lawirek e. Navek e yan jî, cînavek e. Bi karekî radibe yan jî, bûyereke tê serê wî û berkar dibe. Kesê bikarekî yan bi xebatekê radibe, jê re kiryar tê gotinê. Lê kesê ku di hevokê de bûyerê tê serê wî, jê re berkarê tê gotinê.



a. Kiryar (Kirde)

Kiryar kesek e, mirovek e, tişteke yan lawirek e. Cînav e yan jî, nav e. Di hevokê de bi karekî radibe û xebatekê dike.

Şoreşger hatin.

Agir geş dibe.

Xwendekar silav dikin.

Ez diçim dibistanê.

Min Hogir dît.

Wê gulek sor da min.

Wî name nivîsand.

Di van hevokan de, şoreşger, agir û xwendekar her yek navek e û bi karekî rabûye. Herwiha ez , min, wê û wî jî, cînav in, her yek bi karekî rabûye. Hemû jî, di hevokê de kiryar in.

b. Berkar

Kesê ku di hevokê de bûyer tê serê wî berkar e.

Dijmin Zoro kuşt.

Hacerê dijmin lerizand.

Di van hevokan de, zoro û dijmin du nav in. Bûyerek hatiye serê wan. Zoro hatiye kuştinê û dijmin hatiye lerizandinê. Ji van navan re, berkar tê gotinê. Dibe ku berkar nav be yan cînav be. Mirov be, tişt be yan jî, lawir be. Rasterast bi

lêkereke derhingev ve tê girêdanê. Lê bi awayekî ne rasterast bi lêkera nederhingêv ve jî, tê girêdanê.

Berkar bi du beşan par ve dibe: Berkarê durust û berkarê nedurust.

#### Berkarê durust

Berkarê durust, bûyer rasterast tê serê wî.

Şervan dijminan dikujin.

Gundî rê dibirin.

Memo Zînê dixwaze.

Navên dijminan, rê û Zînê rasterast bûyerên kuştin, birin û xwastinê hatine serê wan. Tu bindarên din jî, bi wan re nîn in.

#### Berkarê nedurust

Ew berkarê ku di hevokê de, bûyer rasterast nayê serê wî, jiber ku berkarekî din nediyar pê re heye jê re berkarê nedurust tê gotinê.

Daçekên "di, bi, ji, li" şûna berkarê nediyar ku bûyerê bi berkarê nedurust re hildigre, digirin.

Şoreşgeran li dijmin xistin.

Min ji mamoste pirsî.



Dijmin û mamoste di van hevokan de berkarên ne bi serê xwe ne. Jiber ku di buyerê de berkarekî din hevalê wan heye, lê navê wî nehatiye diyarkirinê .

Dema em dipirsin: Şoreşgeran bi çi li dijmin xist ? Bersiva vê pirsê, berkarekî din bi dijmin re heval diyar dike, mîna : Bi çekan, bi daran, bi keviran, bi rokêtan,...lêxistin. Herwiha, min çi ji mamoste pirsî ? Navê wî, temenê wî, dîroka Kurdistanê,....

## 2. Dem

Di veguhestina lêkeran de, sê demên bingehîn hene: Dema niha ( nihok), dema bê (pêşedem) û dema buhirî (buhêrk).

Niha, ez diçim dibistanê.

Sibe, ezê biçim bajêr.

Par ez çûm welêt.

## 3. Hejmar

Du hejmar di kurdî de hene. Yek, yekhejmar e û bêtir ji yekê kom e. Hejmara lêker bi hejmara kiryar û berkar ve girêdayî ye. Eger berkar di hevokê de nebe hejmara lêker li gor kiryar e:

Azad hat. (yekhejmar)

Şervan hatin. (kom)

Lê dema ku berkar di hevokê de hebe hejmar li gorê tê:

Te ez dîtîm. ( yekhejmar )

Te em dîtîn. (kom)

#### 4. Rawe

Rawe, awa û dirûva ku lêker tê de tê veguhastinê ye. Di kurdî de, ev rawe hene:

Raweya fermanî

Raweyên hekeyî ( Lavij û bijoke ).

Raweya gumani

#### 1.2.3.5.2 Di lêkeran de rader

Berî ku lêker bê veguhastinê, di rewşa xwe ya himî de ye û bi kes, dem, hejmar û raweyê re têkildar nebûye. Ji vê rewşê re rader tê gotinê. Radera lêker herdem bi " n " dawî dibe. Di piraniya raderan de "i" pêşiya "n" digire, lê tîpeke jar û lawaz e bi ketina "n" ew jî, ji dawiya lêker dikeve.

Radera lêker du parçe ye, kok û paşgîn:

çûn	çû-n
man	ma-n
dan	da-n
kirîn	kirî-n
hatin	hat-in

gotin            got-in

Dema paşgîn tê avêtinê (KDB) dimîne.

çû, ma, da, kirî, hat, got.

Jibo naskirina (KDN) tu rêzanên tevayî nîn in. Tenê jibo raderên ku bi "în" û "andin" dawî dibin rêzan heye. Lê yên din pêwist e bêt jiberkirinê. Jibo hesanîkirina vî karî em raderên lêkeran li gor tîpên dawiyê di van koman de par ve dikin:

1. Raderên ku bi "in" dawî dibin: Ev rader di sê koman de dicivin:

- a. Raderên ku bi "andin" dawî dibin
- b. Raderên ku bi "tin" dawî dibin.
- c. Raderên ku bi "rin" dawî dibin.

2. Raderên ku bi "în" dawî dibin.

3. Raderên ku bi "an" dawî dibin. Ev rader bi awayê din jî, tên bikaranînê:

a. Carna "an" dibe "ayin" :

dan        dayin

b. Carna "an" dibe "andin" :

pêçan     pêçandin

c. Carna " an " dibe " iyan " :  
geran      geriyan

4. Raderên ku bi "ûn" dawî dibin:

a. Carna " ûn " dibe " ûyîn " :  
bûn      bûyîn

b. Carna " ûn " dibe " ûtin " :  
cûn      cûtin

### Nasîn

Radera lêker mîna nav tê bikaranînê û navê kirin û bûnê yan jî, navê raderî jê re tê gotinê.

#### 1.2.3.5.3 Raweya fermanî û (KDN)

Koka dema niha (KDN)

Parçeyê radera lêker ku dibe binyata veguhastinê di demên nihok û pêşedemê de, jê re koka dema niha tê gotinê. Ev kok jî, ji fermaniya lêker tê naskirinê.

kirin      bi-k-e      k

Ez dikim.      Ezê bikim.

## Raweya fermanî

Raweya fermanî bi berxistina pêşgîna (bi) di pêşiya koka dema niha û paşgîna (e) çêdibe.

dan	bi-d-e
birin	bi-b-e
kirîn	bi-kir-e

### 1. Raderên ku bi " in " dawî dibin

#### a. Raderên ku bi (andin) dawî dibin

Di van raderan de (din) dikeve û (a) dibe (î):

kelandin      kelan      kelîn

Herwiha paşgîn û pêşgînên fermaniyê bi parçeyê mayî ve dibin.

weşandin	bi-weşîn-e	weşîn
ceribandin	bi-ceribîn-e	ceribîn
hêrandin	bi-hêrîn-e	hêrîn
pijandin	bi-pijîn-e	pijîn
revandin	bi-revîn-e	revîn

Li gor rêzana jor gerek nake mirov fermaniya van lêkeran nas bike. Dikare yekser ( KDN ) nas bike: ( in ) dikeve û ( a ) dibe ( î )

b. Lêkerên ku radera wan bi (tin) dawî dibe

Paşgîna (tin) ji raderê dikeve û parçeyê mayî pêşgîn û paşgîna fermaniyê distîne:

girtin	bi-gir-e	gir
jentîn	bi-jen-e	jen
hêrtin	bi-hêr-e	hêr
simtin	bi-sim-e	sim
nihêrtin	bi-nihêr-e	nihêr

c. Lêkerên ku radera wan bi (istin) dawî dibe

(Tin) tê avêtinê û (is) dibe (êş):

heristin	bi-herêş-e	herêş
hilawistin	hilawêş-e	hilawêş
ristin	bi-rêş-e	rêş

d. Raderên ku bi (iştin) dawî dibin

hilperiştin	hilperêş-e	hilperêş
maliştin	bi-mal-e	mal
rûniştin	rûn-e	rûn
veniştin	ven-e	ven

e. Raderên ku bi (ûtin) dawî dibin

cûtin	bi-cû	cû
-------	-------	----



sûtin	bi-sû	sû
dirûtin	bi-dirû	dirû

ji van raderan (tin) tê avêtinê.

f. Raderên ku bi (irin)dawî dibin

birin	bi-b-e	b
kirin	bi-k-e	k
mirin	bi-mir-e	mir

2. Lêkerên ku radera wan bi (în) dawî dibin

Paşgîna (în) ji raderê dikeve, parçeyê mayî koka dema niha ye.

barîn	bi-bar-e	bar
bezîn	bi-bez-e	bez
borîn	bi-bor-e	bor
zanîn	bi-zan-e	zan
revîn	bi-rev-e	rev

3. Lêkerên ku radera wan bi (an) dawî dibin

dan	bi-d-e	d
gihan	bi-gih-e	gih
man	bi-mîn-e	mîn
kolan	bi-kol-e	kol



#### 4. Lêkerên ku radera wan bi ( ûn ) dawî dibe

bûn	bi-b-e	b
çûn	bi-ç-e	ç
dûn	bi-dû	dû
pûn	bi-pû	pû

Jibo naskirina koka dema niha, baştir e mirov ji bilî raderên ku bi (andin) û (în) dawî dibin hemûyan ji ber bike. Eger di raderên ku bi (tin) dawî dibin de (a) hebe cihê xwe dide (ê)

alastin	b-alês-e	alês
bijartin	bi-bijêr-e	bijêr
bihartin	bi-bihêr-e	bihêr
pişavtin	bi-pişêv-e	pişêv
guvaştin	bi-guvêş-e	guvêş

Eger parçeyê mayî ji raderê piştî avêtina (tin) bi (s) dawî bibe, ev (s) cihê xwe dide (z).

gestin	bi-gez-e	gez
mîstin	bi-mîz-e	mîz
guhastin	bi-guhêz-e	guhêz
xwastin	bi-xwaz-e	xwaz
lîstin	bi-lîz-e	lîz
parastin	bi-parêz-e	parêz
bihîstin	bi-bihîz-e	bihîz

Lê eger ev perçe bi (f) dawî bibe, cihê xwe dide (v).

axaftin	bi-axiv-e	axiv
hêraftin	bi-hêriv-e	hêriv
bişkaftin	bi-bişkêv-e	bişkêv

Û eger ev perçe bi (ş) dawî bibe cihê xwe dide (j).

biruştin	bi-birêj-e	birêj
gihiştin	bi-gihîj-e	gihîj
kuştin	bi-kuj-e	kuj

5. Lêkerên ku radera wan bi (êtin) dawî dibe, ev (êtin) cihê xwe dide (êj).

avêtin	b-avêj-e	avêj
mêtin	bi-mêj-e	mêj
rêtin	bi-rêj-e	rêj

(atin) jî, cihê xwe dide (oje) yan jî (êje)

patin	bi - pêj - e	pêj
-------	--------------	-----

Lê (otin) cihê xwe dide (oj) yan jî, (oş)

sofin	bi-soj-e	soj
kotin	bi-koj-e	koj
dotin	bi-doş-e	doş
firotin	bi-firoş-e	firoş

#### 1.2.3.5.4 Komên Lêkeran

Di zimanê kurdî de lêker bi çend koman par ve dibe. Ev kom jî, ev in:

1. Lêker bi hebûn û tunebûna berkar bi du beşan par ve dibe:

a. Lêkerên derhingêv

Ev lêker di hevokê de berkarekî durust dixwazin. Wek lêkerên : Birin, nivîsandin, rakirin, hilgirtin, xwarin, vexwarin, dîtin, ....ûwd

Dema em hevokekê bi lêkerek ji van saz bikin, mîna " hilgirtin " . Min hilgirt. Ên ku li me guhdarî dikin dipirsin: Gelo vî çi hilgirt? jiber ku hevok kême. Lê ger min got: Min tîfing hilgirt . Yan jî : Min al hilgirt, hingê kêmahî di hevokê de namîne û wateya xwe bi temamî dide. Jiber ku lêkera "hilgirtin" derhingêv e, di hevokê de berkarekî durust dixwaze. Di hevokên jor de, tîfing û al berkarên durust in. Di buhêrkê de lêkerên derhingêv bi cînavên kesok, awayê

tewandî re (min, te, wî, wê. me, we, wan) tên bikaranînê. Lê di nihokê de bi awayê rast re (ez, tu, ew, em , ew, hûn, ew) tên bikaranînê . Herwiha di pêşedemê (mandê) de jî, bi awayên rast re tên bikaranînê.

#### b. Lêkerên nederhingêv

Ev lêker di hevokê de berkaran naxwazin. Hevok bêyî berkar wateya xwe dide. Bi lêker û kiryar hevok bê kêmahî durust dibe, mîna lêkerên : Hatin, çûn, mirin, razan, bûn , man, rabûn, ponijîn, girîn, firîn, ketin, .... ûwd.

Ez firîm.

Tu diçî.

Ewê bimire.

Hûn radizên.

Ewê bikevin.

Ev hevokên li jor bi lêker û kiryar tenê wateya xwe durust distînin. Lêkerên nederhingêv di her çaxan de bi awayê rast re yê cînavên kesok tên bikaranînê, an ku bi cînavên (ez, tu ,ew, em, hûn, ew) re tên veguhastinê.

Bi du bêşên din lêker tên parvekirinê :

1. Lêkerên sazber (birê)
2. Lêkerên guhber (bêrê)

### 1. Lêkerên sazber

Di van lêkeran de hemû çax ji koka raderê tên bikaranînê û li gor rêzaneke durust tên veguhastinê.

Lêkera (kirîn)

Koka dema berê                      kirî

Koka dema niha                      kir

Min kirî (buhêrk)

Ez dikirim ( nihok )

Ezê bikirim ( mand )

Bikire (fermanî)

Herwiha koka demê mîna xwe dimîne û pêşgîn û paşgînên kes û deman pê ve dibin.

### 2. Lêkerên guhber

Di van lêkeran de, hemû çax ji koka raderê dernakevin. Di navbera rader û fermaniyê de newekhevî heye. Ev lêker jî, du beş in:

a. Biramak

Di van lêkeran de, di fermaniyê de tîpên derî raderê hene:

Rader	KDB	KDN	Ferman
avêtin	avêt	avêj	bavêje
dotin	dot	doş	bidoşe
firotin	firof	firoş	bifiroşe
ketin	ket	kev	bikeve
kotin	kot	koj	bikoje
mêtin	mêt	mêj	bimêje
rêtin	rêt	rêj	birêje

Di lêkerên biramak de, tîpên ketî ( windabûyî ) ji raderê, di fermani û nihokê de careke din vedigerin. Avêtin: Koka wî kevin (avêjtin e). Tîpa (j) dîsa vedigere. Herwiha:

dotin	doştin
firotin	firoştin
ketin	kevtin.
kotin	kojtin
mêtin	mêjtin
rêtin	rêjtin



b. Lêkerên dubirak

Di van lêkeran de fermanî ne ji koka raderê ye, an ku fermanî û rader ne yek in:

Rader	KDB	KDN	Ferman
gotin	got	bêj	bibêje
anîn	anî	în	bîne
hatin	hat	tê	were

Di van lêkeran de tenê bi bihîstinê mirov fermanî û (KDN) nas dike.

Lêker bi sê awayên din tê parvekirinê:

1. Lêkerên dîdar.
2. Lêkerên nedîdar.
3. Lêkerên kesok

1. Lêkerên dîdar: Kiryarên van lêkeran diyar in û tîn naskirinê.

Rûkenê tîfing hilgirt. (Rûken)

Reşo dijmin hejand ( Reşo)

ARGK Mehmetçik lerizandin. (ARGK)

2. Lêkerên nedîdar: Kiryarên van lêkeran nayên naskirinê ew jî, du awa ne.



a. Awayê hatin - kirinê.

b. Awayê dane - kirinê.

a. Awayê hatin - kirinê

Bi alîkariya lêkera (hatin) tên sazkirinê. Kiryar, nediyar e, mirov nizane kî bi kar rabûye. Lê tenê mirov dizane ku bûyer pêk hatiye û kar hatiye kirinê.

Enî hat damezirandinê.

Artêş hat avakirinê .

Berxwedan hat bilindkirinê.

b. Awayê dane - kirinê

Bi alîkariya lêkera (dan) tên sazkirinê. Nayê naskirinê kî bi kar radibe, lê tenê mirov dizane ku kesekî nediyar kar daye kirinê, yan jî, kesekî diyar kar dide yekî nediyar jibo bike.

Min şal û şapikê xwe dan dirûtinê.

Te kirasek da çêkirinê.

Serok têkoşînê dide meşandinê.

Di lêkerên nedîdar de tenê lêkera alîkar tê veguhastinê, lê lêkera din di awayê raderî de dimîne û mîna nav tê tewandinê. Herwiha ku lêker cemkirî be, ji hev qut nabe, mîna :

Yekîtiya gel tê avakirinê.

Jîbo ev lêker ji navan bê cudakirinê, dawîya wê tîpa ( ê ) distîne.

### 3. Lêkerên kesok

Ev lêker bi hevkarîya du cînavên kesok tên sazîkirinê.

Min xwe dît.

Te xwe avêt.

Eger lêker nederhîngêv be ( bi ) dikeve navbera herdu cînavan.

Ez bi xwe razam.

Ew bi xwe çû.

Em bi xwe hatin.

Eger di lêkera derhîngêv de berkar hebe, dîsa (bi) dikeve navbera herdu cînavan.

Wî bi xwe dijmin kuşt.

Min bi xwe gul çand.

Lêkerên kesok bi alîkariya cînavê kesok (xwe) tên sazîkirinê.

Dema ku berkar û kiryar di hevokê de yek kes be hîngê, xwe şûna berkar digire û lêkera kesok tê çêkirinê.

Lêker bi sazîkirina xwe jî, bi sê beşan par ve dibin:

1. Lêkerên hîmî
2. Lêkerên afirandî
3. Lêkerên cemkirî

### 1. Lêkerên hîmî

Rayên van lêkeran, ne mîna navan tên bikaranînê, jibo çêkirina demên niha, bihurî û mandê tên bikaranînê.

Rader	K.D.B	K.D.N
ketin	ket	kev
dan	da	d
bûn	bû	b
kirin	kir	k
çûn	çû	ç
birin	bir	b

### 2. Lêkerên afirandî

Ev lêker ji nav û rayên lêkeran saz dibin. Lêkerên nederhingêv bi alîkariya (în) û yên derhingêv bi alîkariya (andin) çêdibin.

#### Mînak 1

Nav	nederhingêv	derhingêv
ger	gerîn	gerandin
rev	revîn	revandin
tirs	tirsîn	tirsandin
kel	kelîn	kelandin
hej	hejîn	hejandin
ken	kenîn	kenandin

## Mînak 2

nederhingêv	KDB	KDN	derhingêv
nalîn	nalî	nal	nalandin
nivîsîn	nivîsî	nivîs	nivîsandin
firîn	firî	fir	firandin
kişîn	kişî	kiş	kişandin
weşîn	weşî	weş	weşandin
barîn	barî	bar	barandin
tewîn	tewî	tew	tewandin
kewîn	kewî	kew	kewandin
lorîn	lorî	lor	lorandin

### 3. Lêkerên cemkirî

Ev lêker bi hev xistina parçeyên jêr saz dibin:

1. Pêşgîn
2. Nav yan jî, rengdêr
3. Lêkerên alîkar

Pêşgînên ku lêkerên cemkirî saz dikin, ev in: hil, ve, vê, da, rû, wer, der, ber, bin, pey, paş, pêş, ra, jê, tê, lê, pê, jev, lev, pev ... ûwd.

1. Pêşgîn û lêkera alîkar:

Hilgirtin, vegirtin, rêxistin, wegerandin, dagirtin, rûniştin, berxistin, derxistin, derbûn, serkevtin, pêşxistin, paşxistin, lêxistin, pêketin, levkirin, jêkirin, rakirin, têkçûn, lêkirin, jevkirin, pevçûn, pevketin, levxistin, peyketin, peyxistin,...

2. Nav û lêkera alîkar:

Bersivdan, rêxistin, cihgirtin, gilîkirin, hînbûn, pêketin, rêveçûn,...

3. Rengdêr û lêkera alîkar:

Sarkirin, sorbûn, korbûn, reşkirin, dûrketin, xweşbûn, xweşkirin, şaşman, germbûn, zerkirin, zerbûn, geşbûn, geşkirin, xurtkirin,

Nasîn

Di lêkerên cemkirî de, eger lêkera alîkar (parçeyê dawî ji Lêker) derhingêv be, lêkera cemkirî derhingêv e. Eger ev parçe nederhingêv be, lêker bi tevayî jî, nederhingêv e.

## Çêkirina lêkeran

1. Çêkirina lêkerên nederhingêv û yên derhingêv:

a. Ji navên raderî bi dûxistina paşgîna (andin) lêkerên derhingêv yên afirandî tên çêkirinê û bi dûxistina paşgîna (în) lêkerên nederhingêv yên afirandî tên çêkirinê:

Navê raderî	derhingêv	nederhingêv
leriz	lerizandin	lerizîn
meş	meşandin	meşîn
rev	revandin	revîn
bez	bezandin	bezîn
ger	gerandin	gerîn
ken	kenandin	kenîn
tirs	tirsandin	tirsîn
kel	kelandin	kelîn
bar	barandin	barîn
reng	rengandin	rengîn
sot	sotandin	sotîn
pêç	pêçandin	pêçîn
dom	domandin	domîn



b. Ji navan bi dûxistina lêkera alîkar (kirin) lêkerên derhingêv çêdibin û bi dûxistina (bûn) yên nederhingêv çêdibin.

Nav	derhingêv	nederhingêv
zêr	zêr kirin	zêr bûn
zîv	zîv kirin	zîv bûn
kar	kar kirin	kar bûn
çem	çem kirin	çem bûn
bar	bar kirin	bar bûn
par	par kirin	par bûn
gêr	gêr kirin	gêr bûn
rê	rê kirin	rê bûn
mehr	mehr kirin	mehr bûn
kaş	kaş kirin	kaş bûn

Herwiha ji navan bi alîkariya gelek lêkerên derhingêv, lêkerên derhingêv çêdibin:

Sûnd xwarin, rê xistin, rê birîn,...

Bi alîkariya yên nederhingêv jî, lêkerên nederhingêv yên nû çêdibin: Rê ketin, rêve çûn,...

c. Ji rengdêran bi dûxistina lêkera alîkar (kirin) lêkerên derhingêv û bi dûxistina lêkera (bûn) lêkerên nederhingêv çêdibin.



Rengdêr	derhingêv	nederhingêv
reş	reş kirin	reş bûn
xweş	xweş kirin	xweş bûn
germ	germ kirin	germ bûn
sor	sor kirin	sor bûn
dîn	dîn kirin	dîn bûn
zer	zer kirin	zer bûn

Herwiha dema lêkera alîkar derhingêv be, lêkera çêkirî jî, derhingêv e, lê dema nederhingêv be, ya çêkirî jî, nederhingêv e.

## 2. Çêkirina lêkerên cemkirî:

Lêkerên cemkirî bi têkilbûna nav, rengdêr û pêşgînan bi lêkerên alîkar re saz dibin.

a. Pêşgînên ku bi lêkerên alîkar re, lêkerên cemkirî çêdikin ev in:

Hil, ve, vê, da, rû, wer, der, ber, bin, ser, pey, nav, paş, ra, jê, tê, lê, pê, jev, lev, pev, tev, di ser re, di rex re, di nav de, di şûn de, di pêş de, bi paş de, bi ser de,... ûwd.

Mînak:

Hilkirin, hilbûn, hildan, hilgirtin, vebirîn, vebûn, vedan, vekirin, vegirtin, veşartin, veşartin, vejîandin, rakirin,

rabûn, raketin, raxistin, razan, wegerandin, daxistin, dagirtin, rûniştin, bergirtin, derketin, derkirin, derbûn, serkevtin, ser xwe bûn, pêş xistin, paş ketin, pey xistin, pey man, lev hatin, jev ketin, jev çûn, pev ketin, pê xistin, jê kirin...

b. Nav û lêkerên alîkar:

Soz dan, bersiv dan, rê xistin, cih girtin, kar dîtin, bîn kişandin, gilî kirin, hîn bûn, hîn kirin, rê ketin, cem kirin, kar kirin, ders dan, mal bar kirin, guh birîn, ser lê dan, rê birîn...

c. Rengdêr û lêkerên alîkar:

Kor bûn, sar bûn, kor kirin, sar kirin, dûr ketin, dûr bûn, dûr kirin, dûr xistin, sor kirin, sor bûn, saz kirin, saz bûn...

#### 1.2.3.5.5 Di lêkeran de dem (çax)

Di zimanê Kurdî de sê demên bingehîn hene:

1. Dema niha (nihok)
2. Dema bê (pêşedem, mand)
3. Dema buhirî (berê, buhêrk)

## 1. Nihok (dema niha)

Lêker liber çavên mirov pêk tê û bi awayekî gumanbir bûyer diqede yan jî, dê biqede.

### a. Nihok

Niha ez dixwim.

Ez li Almanyaya dimînim.

Ez pirtûka rêziman dinivîsim.

### b. Bûyereke ku dema berê çêbû be û xwe dirêjî dema niha bike:

Ji sê salan ve ez li Almanyaya dimînim.

Ev salek e ji êşa dilê xwe dinalim.

Ji sê mehan ve ez Şêrînê nas dikim.

### c. Bûyereke ku dê di pêşedemê de pêk bê û lêker bi hokereke demîn ve girêdayî be, mîna: Sibe, di sala bê de, piştî saeteke din...

Ez sibe diçim dibistanê.

Ez saleke din vedigerim welat.

Piştî saetekê ez diçim Amedê.



Lêkera afirandî

Lerizîn

Koka dema niha (Leriz) e.

Ez dilerizim

Tu dilerizî

Ew dilerize

Em dilerizin

Hûn dilerizin

Ew dilerizin

Lêkera cemkirî

bar kirin

Di van lêkeran de, lêkera alîkar tenê tê veguhestinê, koka dema niha jê tê deranînê û (di) pêşiya wê digire.

Koka dema niha: (Bar...K.) ye.

Ez bar dikim

Tu bar dikî

Ew bar dike

Em bar dikin

Hûn bar dikin

Ew bar dikin

### Nihokê dirêj

Lêker hîkariya xwe dewam dike yan jî, niv pêk hatiye û nivê din jî, dê pêk bê. Di vê rewşê de, dawiya kirde (kiryar) (î) distîne.

Ezî dikim	Ezî dilerizim	Ezî bar dikim
Tuyî dikî	Tuyî dilerizî	Tuyî bar dikî
Ewî dike	Ewî dilerize	Ewî bar dike
Emî dikin	Emî dilerizin	Emî bar dikin
Hûnî dikin	Hûnî dilerizin	Hûnî bar dikin
Ewî dikin	Ewî dilerizin	Ewî bar dikin

### Nihokê Pêşro (daxwazî)

lêker hîn pêk nehatiye û dibe ku pêk neyê jî. Pêkhatina wî, bi bûyereke din ve girêdayî ye. Di veguhastinê de, di şûna (dî) de, pêşiya lêker (bi) distîne:

Ez bikim	Ez bilerizim	Ez bar bikim
Tu bikî	Tu bilerizî	Tu bar bikî
Ew bike	Ew bilerize	Ew bar bike
Em bikin	Em bilerizin	Em bar bikin
Hûn bikin	Hûn bilerizin	Hûn bar bikin
Ew bikin	Ew bilerizin	Ew bar bikin

Di vê rewşê de, kirin yan jî, bûn bi xwestinê pêk tê. Ev rawe bêhtir



dema bê (pêşedemê) îfade dike. Carna jî, daçekên (da, ku) têne pêşiya lêkera xwestinî. Mîna:

Bêrîvanê tiving hilgirt da biçe şer.

Min xwe amad kir da romanekê binivîsim.

Hacer derket çiyar ku bibe simbola jina Kurd.

Kurd şer dikin ku bibin pêşengên mirovahiyê.

Di vir de (da, ku) daçekên sedemîn e.

Herwiha bêjeya (bila) jî, pêşiya van lêkeran digire: (Bila) ez biçim .

## 2. Pêşedem

Lêker hîn pêk nehatiye, lê wê di dema bê de, di pêşerojê de pêk bê. Di be ku lêker pêk neyê jî.

Di vê demê de pêşiya lêker, lêkera (hatin) di dema niha de û bi kesê sêyemîn yê yekhejmar re (ew) digire. Herwiha lêker jî, pêşgîna (bi) distîne. Lê, lêkera hatin bi sê cûreyan tê bikaranînê.

Ê, dê û wê, mîna:

Ez ê bikim

Ez dê bikim

Ez wê bikim

Emê bi çend nimûneyan ji klasîkên kurd vê rewşê şirove bikin:



Dê

Meleyê Cizîrî dibêje.

Esrar ezel dê dabed bîne zuhûrê.

Encam ser encam ji axaz çi hacet.

Ehmedê Xanî di Mem û Zînê de dibêje:

Evçend munafiq û neyarî

Hêja tu bi çavê min diyarî

Mem dê bimirit tu dê bimînî

Hêj xweş bigerî li rûyê zemînî

Ê

Di qewl û beytên Êzîdiyan de tê gotinê.

Newêrim bikêlimim

Wekî ez bêjim sineta berî Adem e

Ezê birecimim

Wê

Di qewl û beytên Ezîdiyan de tê gotinê:

Ew e milletê xirqe paristî

Xirqe maqûl kir ser xwe re dêxistî

Roja axretê wê jê here nûrek kesekî

Seydayê Tîrêj jî, di bilbilê dilşadî de dibêje:

Piştî wê stêrê bi xwe berbanga sibê ye.

Wê roj hile ronî bikeve şûna şevê ye

Karwanê me wê bigihe cî û warê meqsedê ye.

Çerxa Felekê herdem bifitil û ger û dewr e.

Dê, ê û wê ji kû hatine?

Ev her sê bêje yek lêker in, ew jî, lêkera hatin di dema nihok de ye.

Ez di êm (dêm, têm).

Tu di êyî (dêyî, têyî).

Ew diê (dê, tê) ew dê

dema dê ew dê

Ez dema diê bikim.

Ez dê bikim.

Di axaftinê de (dê) dikeve û dibe:

Ez dema ê bikim

Ez ê bikim

Bi baweriya min mana (dê) pêkanîna lêker di pêşerojê de bêguman dike. Dema ez dibêjim: Ez dê bikim. Hevok mîna nihok wateya xwe distîne û di pêkanîna kirinê de mîna: (ez dikim), yan jî, nêzîkî wê wateyê dibe. Lê (ez dikim) min dest bi kirinê kiriye û (dê) pêkanîna lêker di projeyekê de dihêle, belkî pêk bê û belkî jî, neyê.

Ezê bikim. Kirinê di projeyekê de dihêle. Belkî ez bikim û belkî ez nekim.

Ez wê bikim. (Ez ewê dê bikim) yan jî: (Ez ewê bikim): Di vir de lêkera hatin (ê) û cînavê nîşandek (ewê) bi hev re dibin yek (wê). Ez ewê dema ê bikim.

Ez ewê ê bikim.

Ez wê bikim.

Ew, ewê cînavê nîşandek e jibo dûr bikar tê, jibo vê jî, dema bi lêkera alîkar hatin (ê) re dibe yek, bikaranîna lêker di pêşedemê de durtir dike. Gelek caran cînavê nîşandek (ew) bi (ê) re dibe yek, ev jî, bi piranî dema ku nav di hevokê de şûna cînav digire, mîna:

Wê roj hile	Roj wê hile
Wê ronî bikeve	Ronî wê bikeve.
Roj, ew ê hile.	Ronî,ew ê bikeve.
Roj wê hile.	Ronî wê bikeve.

Ew û (ê) bi hev ve dibin yek.

Bi xwe hevok bi vî awayî rast dibe:

Ew roj ê hile	ew ê roj hile
Ew ronî ê bikeve	ew ê ronî bikeve

Ew ê, bi hev ve dibin (wê)

Jibo tevlihevî çênebe, emê di veguhastina lêker de, di pêşedemê de (dê) bi kar binin û van dîtînen jor mîna

pêşniyazan bihêlin<sup>36</sup>

Veguhastina lêker di pêşedemê de

Di pêşedemê de jî, mîna nihok herdem awayê rast yê cînavên kesanî (ez, tu, ew, em, hûn, ew) tê bikaranînê. Herwiha koka demê ji fermaniyê tê girtinê. Lêkera alîkar hatin (dê) pêşiya lêker digire û pêşgîna (bi) jî, pê ve dibe. Eger lêker cemkirî be (bi) dikeve pêşiya parçeyê dawî û ew parçe tenê tê veguhastinê.

Lêkera hîmî	Kirin	bike	(k)
Ez dê bikim		Em dê bikin	
Tu dê bikî		Hûn dê bikin	
Ew dê dike		Ew dê bikin	

Lêkera afirandî	Lerizîn	bilerize	(leriz)
Ez dê bilerizim.		Ew dê bilerizin	
Tu dê bilerizî.		Hûn dê bilerizin	
Ew dê bilerize.		Ew dê bilerizin	

---

<sup>36</sup>Dema ku di hevokê de, kiryar ( kirde ) ji lêker cuda û dûr dikeve ( wê ) tê bikaranînê.

Lêkera cemkirî	Bar kirin	bar bike ( bar-k-)
Ez dê bar bikim.		Ew dê bar bikin.
Tu dê bar bikî.		Hûn dê bar bikin.
Ew dê bar bike.		Ew dê bar bikin.

### 3. Buhêrk

Di demeke rabûyî de, lêker pêk hatiye. Bi lêkerên derhingêv re, cînavên kesanî (min, te, wî, wê, me, we, wan) tîn bikaranînê û bi lêkerên nederhingêv re cînavên (ez, tu, ew, em, hûn, ew) tîn bikaranînê. Di dema buhirtî de çar darêj hene:

#### a. Buhêrk

Demek di ser pêkanîna lêker re derbas bûye.

#### b. Mêjbûhêrk (çîrokî)

Demeke dirêj di ser pêkanîna lêker re derbasbûye û ketiye darêja çîrokiyê.

#### c. Buhêrka bicih

Bi temamî lêker pêk hatiye û hikariya xwe davêje dema niha.

ç. Buhêrka dirêj

Hîkariya kirinê demeke dirêj dewam dike.

a. Buhêrk

Veguhastina lêkera kirin ya himî û derhingêv:

Koka dema berê ( kir )

Min kir                      Me kir

Te kir                        We kir

Wî/wê kir                Wan kir

Lêkera çûn ya nederhingêv û himî: Koka dema berê ( çû )

Ez çûm                      Em çûn

Tu çuyî                     Hûn çûn.

Ew çû                        Ew çûn.

Lêkera afirandî ya derhingêv Lerizandin:

KDB ( lerizand )

Min lerizand                Me lerizand

Te lerizand                We lerizand

Wî/wê lerizand            Wan lerizand

Lêkera afirandî ya nederhingêv Lerizîn:

KDB ( lerizî )

Ez lerizîm                 Em lerizîn

Tu lerizî                    Hûn lerizîn

Ew lerizî                    Ew lerizîn



Lêkera cemkirî û derhingêv Bar kirin:

ÎKDB ( bar kir )

Min bar kir                      Me bar kir

Te bar kir                         We bar kir

Wî/ wê bar kir                 Wan bar kir

Lêkera cemkirî ya nederhingêv sor bûn:

KDB ( sor bû )

Ez sor bûm                        Em sor bûn

Tu sor bûyî                        Hûn sor bûn

Ew sor bû                         Ew sor bûn

b. Mêjbêj (mêjbuhêrk, çîrokî)

Demêke dirêj di ser pêkhatina kar re derbas bûye û ketiye darêja çîrokekê.

Lêkera kirin:

Min kiribû                        Me kiribû

Te kiribû                         We kiribû

Wî/wê kiribû                    Wan kiribû

Lêkera çûn

Ez çûbûm                         Em çûbûn

Tu çûbûyî                        Hûn çûbûn

Ew çûbû                         Ew çûbûn



Lêkera lerizandin

Min lerizandibû	Me lerizandibû
Te lerizandibû	We lerizandibû
Wî/wê lerizandibû	Wan lerizandibû

Lêkera bar kirin

Min bar kiribû	Me bar kiribû
Te bar kiribû	We bar kiribû
Wî/wê bar kiribû	Wan bar kiribû

Lêkera sor bûn

Ez sor bûbûm	Em sor bûbûn
Tu sor bûbûyî	Hûn sor bûbûn
Ew sorbûbû	Ew sor bûbûn

c. Buhêrka bicih

Lêker bi temamî û bê kêmasî pêk tê û hîkariya xwe li dema niha jî, dike.

Lêkera kirin

Min kiriye	Me kiriye
Te kiriye	We kiriye
Wî/wê kiriye	Wan kiriye

Lêkera çûn

Ez çûme	Em çûne
Tu çûyî	Hûn çûne

Ew çûye	Ew çûne
<u>Lêkera lerizandin</u>	
Min lerizandiye	Me lerizandiye
Te lerizandiye	We lerizandiye
Wî/wê lerizandiye	Wan lerizandiye
<u>Lêkera lerizîn</u>	
Ez lerizîme	Em lerizîne
Tu leriziyî	Hûn lerizîne
Ew leriziye	Ew lerizîne
<u>Lêkera bar kirin</u>	
Min bar kiriye	Me bar kiriye
Te bar kiriye	We bar kiriye
Wî/wê bar kiriye	Wan bar kiriye
<u>Lêkera sor bûn</u>	
Ez sor bûme	Em sor bûne
Tu sor bûyî	Hûn sor bûne
Ew sor bûye	Ew sor bûne

#### ç. Buhêrka dirêj

Lêker di dema berê de pêk hatiye. Lê hîkariya wî demeke dirêj dewam kiriye. Yan jî, lêker bicih pêk nehatiye. Pêkhatina wî dest pê kiribû û dewam dikir. Em dikarin bibêjin " buhêrka kêm ".

Lêkera kirin

Min dikir

Te dikir

Wî/wê dikir

Lêkera lerizandin

Min dilerizand

Te dilerizand

Wî/wê dilerizand

Lêkera lerizîn

Ez dilerizîm

Tu dilerizî

Ew dilerizî

Lêkera bar kirin

Min bar dikir

Te bar dikir

Wî/wê bar dikir

Lêkera sor bûn

Ez sor dibûm

Tu sor dibûyî

Ew sor dibû

Lêkera sor kirin

Min sor dikir

Te sor dikir

Me dikir

We dikir

Wan dikir

Me dilerizand

We dilerizand

Wan dilerizand

Em dilerizîn

Hûn dilerizîn

Ew dilerizîn

Me bar dikir

We bar dikir

Wan bar dikir

Em sor dibûn

Hûn sor dibûn

Ew sor dibûn

Me sor dikir

We sor dikir

Wî/wê sor dikir

Wan sor dikir

#### 1.2.3.5.6 Di lêkeran de " rawe "

Ji bilî hersê demên bingehîn, li gor dem , rawe û dirûvê lêker tê veguhastinê, ji raweyên ku lêker tê de bi awayên cuda tê veguhastinê, ev in:

1. Raweya fermanî (kotekî)
2. Raweyên hekeyî (egerî, mercî, şertî).

Ew jî, ev in:

- a. Lavij û nihokê lavij
  - b. Bijoke û nihokê bijoke.
3. Raweyên gumanî
    - a. Guman û nihokê guman
  4. Raweyên hatin-kirin û dan-kirinê

## 1. Raweya fermanî

Mirov, kesekî dike bin kotekê jibo ku bi karekî rabe.

### Lêkera kirin

Tu bike

Hûn bikin

Em bikin

### Lêkera lerizîn

Tu bilerize

Hûn bilerizin

Em bilerizin

### Lêkera lerizandin

Tu bilerizîne

Hûn bilerizînin

Em bilerizînin

### Lêkera bar kirin

Tu bar bike

Hûn bar bikin

Em bar bikin

## 2. Raweyên hekeyî

### a. Lavij

#### Lêkera kirin

Min bikira

Te bikira

Wî/wê bikira

#### Lêkera lerizandin

Min bilerizanda

Te bilerizanda

Wî/wê bilerizanda

#### Lêkera lerizîn

Ez bilerizîma

Me bikira

We bikira

Wan bikira

Me bilerizanda

We bilerizanda

Wan bilerizanda

Em bilerizîna

Tu bileriziya	Hûn bilerizîna
Ew bileriziya	Ew bilerizîna
<u>Lêkera bar kirin</u>	
Min bar bikira	Me bar bikira
Te bar bikira	We bar bikira
Wî/wê bar bikira	Wan bar bikira
<u>Lêkera sor bûn</u>	
Ez sor bibûma	Em sor bibûna
Tu sor bibûya	Hûn sor bibûna
Ew sor bibûya	Ew sor bibûna
Nihokê lavij	
Minê bikra	Meyê bikra
Teyê bikira	Weyê bikira
Wî/wê yê bikira	Wanê bikira
Ev rawe jî, mîna lavij e. Lê "ê" li pey cînav tê.	
Minê bilerizanda....	(lerizandin)
Ezê bilerizîma....	(lerizîn)
Minê bar bikira...	(bar kirin)
Ezê sor bibûma...	(sor bûn)

b. Bijoke

Kirin

Min kiriba

Me kiriba

Te kiriba

We kiriba

Wī/wê kiriba

Wan kiriba

Lerizandin

Min lerizandiba

Me lerizandiba

Te lerizandiba

We lerizandiba

Wī/wê lerizandiba

Wan lerizandiba

Lerizîn

Ez lerizîbama

Em lerizîbana

Tu lerizîba

Hûn lerizîbana

Ew lerizîba

Ew lerizîbana

Bar kirin

Min bar kiriba

Me bar kiriba

Te bar kiriba

We bar kiriba

Wī/wê bar kiriba

Wan bar kiriba

sor bûn

Ez sor bûbama

Em sor bûbana

Tu sor bûba

Hûn sor bûbana

Ew sor bûba

Ew sor bûbana



### Nihokê bijoke

Ew jî, mîna bijoke ye, lê "ê" li pey cînav tê.

Minê kiriba	Meyê kiriba
Teyê kiriba	Weyê kiriba
Wî/wê yê kiriba	Wanê kiriba
Minê lerizandiba...	(lerizandin)
Ezê lerizîbama...	(lerizîn)
Minê bar kiriba...	(bar kirin)
Ezê sor bûbama...	(sor bûn)

### 3. Raweya guman

#### Kirin

Min kiribe	Me kiribe
Te kiribe	We kiribe
Wî/wê kiribe	Wan kiribe

#### Lerizandin

Min lerizandibe	Me lerizandibe
Te lerizandibe	We lerizandibe
Wî/wê lerizandibe	Wan lerizandibe

#### Lerizîn

Ez lerizîbim	Em lerizîbin
Tu lerizîbî	Hûn lerizîbin
Ew lerizîbe	Ew lerizîbin

### Bar kirin

Min bar kiribe	Me bar kiribe
Te bar kiribe	We bar kiribe
Wî/wê bar kiribe	Wan bar kiribe

### sor bûn

Ez sor bûbim	Em sor bûbin
Tu sor bûbî	Hûn sor bûbin
Ew sor bûbe	Ew sor bûbin

### Nihokê guman

Minê kiribe	Meyê kiribe
Teyê kiribe	Weyê kiribe
Wî/wê yê kiribe	Wanê kiribe
Minê lerizandibe...	(lerizandin)
Ezê lerizîbim...	(lerizîn)
Minê bar kiribe...	(bar kirin)
Ezê sor bûbim...	(sor bûn)

## 4. Raweyên hatin-kirin û dan-kirinê

### 4.1. Raweya hatin-kirinê

Di vê raweyê de kar ji hêla kesekî nediyar ve tê kirinê.

Ev rawe bi alîkariya lêkera (hatin) tê sazkirinê. Lêker ji hêla kiryarekî nenas ve dikeve livbaziye. Di vê raweyê

de, lêkera alîkar hatin tê veguestinê û lêkera din di awayê raderî de dimîne û paşgîna (ê) distîne.

Nihok

حال

Ez tēm dîtinê

Tu têtî dîtinê

Ew têt dîtinê

Em tên dîtinê

Hûn tên dîtinê

Ew tên dîtinê

Buhêrk

گذشته

Ez hatim dîtinê

Tu hatî dîtinê

Ew hat dîtinê

Em hatin dîtinê

Hûn hatin dîtinê

Ew hatin dîtinê

Bicîhbuhêrk

ماضی بعین

Ez hatime dîtinê

Tu hatiyî dîtinê

Ew hatiye dîtinê

Em hatine dîtinê

Hûn hatine dîtinê

Ew hatine dîtinê

Mêjbuhêrk

ماضی مجبیه

Ez hatibûm dîtinê

Tu hatibûyî dîtinê

Ew hatibû dîtinê

Em hatibûn dîtinê

Hûn hatibûn dîtinê

Ew hatibûn dîtinê

Kêmbuhêrk

گذشته استمراری

Ez dihatim dîtinê

Tu dihatî dîtinê

Ew dihat dîtinê

Em dihatin dîtinê

Pêşedem

آینده

Ezê bêm dîtinê

Tuyê bêyî dîtinê

Ewê bê dîtinê

Emê bèn dîtinê

Hûn dihatin dîtinê  
Ew dihatin dîtinê

Lavij

Ez bihatama dîtinê  
Tu bihatayî dîtinê  
Ew bihata dîtinê  
Em bihatana dîtinê  
Hûn bihatana dîtinê  
Ew bihatana dîtinê

Guman

Ez hatibim dîtinê  
Tu hatibî dîtinê  
Ew hatibe dîtinê  
Em hatibin dîtinê  
Hûn hatibin dîtinê  
Ew hatibin dîtinê

Nihokê bijoke

Ezê hatibama dîtinê  
Tuyê hatibayî dîtinê  
Ewê hatiba dîtinê

Hûnê bèn dîtinê  
Ewê bèn dîtinê

Bijoke

Ez hatibama dîtinê  
Tu hatibayî dîtinê  
Ew hatiba dîtinê  
Em hatibana dîtinê  
Hûn hatibana dîtinê  
Ew hatibana dîtinê

Nihokê lavij

Ezê bihatama dîtinê  
Tuyê bihatayî dîtinê  
Ewê bihata dîtinê  
Emê bihatana dîtinê  
Hûnê bihatana dîtinê  
Ewê bihatana dîtinê

Nihokê guman

Ezê hatibim dîtinê  
Tuyê hatibî dîtinê  
Ewê hatibe dîtinê

Emê hatibana dîtinê	Emê hatibin dîtinê
Hûnê hatibana dîtinê	Hûnê hatibin dîtinê
Ewê hatibana dîtinê	Ewê hatibin dîtinê

#### 4.2. Raweya dan-kirinê

Dî vê raweyê de, kiryarekî nas karê xwe dide yekî din jibo lêker bixe livbaziye. Ev rawe bi alîkariya lêkera (bûn) tê çêkirinê. Lêkera (bûn) tê veguhastinê û lêkera din di awayê raderî de dimîne, lê dawiya wê paşgîna (ê) distîne.

##### Nihok

Ez didim çêkirinê  
 Tu didî çêkirinê  
 Ew dide çêkirinê  
 Em didin çêkirinê  
 Hûn didin çêkirinê  
 Ew didin çêkirinê

##### Buhêrk

Min da(n) çêkirinê  
 Te da(n) çêkirinê  
 Wî/Wê da(n) çêkirinê  
 Me da(n) çêkirinê  
 We da(n) çêkirinê  
 Wan da(n) çêkirinê

##### Bicîhbuhêrk

Min daye<sup>37</sup> çêkirinê  
 Te daye çêkirinê

##### Mêjbuhêrk

Min dabû çêkirinê  
 Te dabû çêkirinê

---

<sup>37</sup>Eger tiştên ku tên çêkirinê kom bin lêker di komê de tê bikaranînê (dane) û eger yek be di yekjimarîyê de tê bikaranînê ( daye).

Wî/Wê daye çêkirinê  
Me daye çêkirinê  
We daye çêkirinê  
Wan daye çêkirinê

Wî/Wê dabû çêkirinê  
Me dabû çêkirinê  
We dabû çêkirinê  
Wan dabû çêkirinê

Kêmbuhêrk

Min dida çêkirinê  
Te dida çêkirinê  
Wî/Wê dida çêkirinê  
Me dida çêkirinê  
We dida çêkirinê  
Wan dida çêkirinê

Pêşedem

Ezê bidim çêkirinê  
Tê bidî çêkirinê  
Ewê bide çêkirinê  
Emê bidin çêkirinê  
Hûnê bidin çêkirinê  
Ewê bidin çêkirinê

Lavij

Min bida(na) çêkirinê  
Te bida(na) çêkirinê

Bijoke

Min daba(na) çêkirinê  
Te daba(na) çêkirinê

Guman

Min dabe çêkirinê  
Te dabe çêkirinê  
Nihokê bijoke  
Minê daba çêkirinê

Nihokê lavij

Minê bida çêkirinê  
Tê bidaye çêkirinê  
Nihokê guman  
Minê dabe çêkirinê



### Nasîn

Lêkerên derhingêv di demên derbasbûyî de (buhêrk de) li gor berkar tîn guhertinê. Eger berkar yekhejmar be lêker jî, yekhejmar tê. Eger kom be lêker jî, kom tê.

Min pitûkek da Evînê.

Min du pirtûk dan Evînê.

Min xaniyek da çêkirinê.

Min sê xanî dan çêkirinê.

Min dilê xwe daye Kurdistanê.

Min dil û cegerê xwe dane Kurdistanê.



### 1.2.3.5.7 Di lêkeran de neyîni (nakirin)

Nakirin tunekirina karekî yan bûyerekê ye. Ne pêkanîn û qedexekirina pêkhatina lêker e. Amrazên nakirinê di zimanê kurdî de ev in: Na, ne, me, ni, nîn, tune.

#### Na

Dî dema niha û pêşerojê de tê bikaranînê.

#### Nihok

Na , şûna "di" digire, wek:

Ez diçim	ez naçim
Ez difirim	ez nafirim
Ez hildigirim	ez hilnagirim
Ez derdikevim	ez dernakevim

#### Pêşedem

Na, şûna "bi" digire û (ê) dikeve, mîna:

Ezê biçim	ez naçim
Ezê bifirim	ez nafirim
Ezê hilgirim	ez hilnagirim
Ezê derbikevim	ez dernakevim



Avê vemexwe!

Ji mal dermekeve!

Lê, em dikarin bibêjin: Neçe, nekeve, venexwe û  
dernekeve.

Ni

Ev amraz bi lêkerên (zanîn û karîn) re tê bikaranînê:

Ez nizanim çi bikim.

Ez nikarim bêdeng bimînim.

Em nizanin çi li welat çêdibe.

Nîn

Azadî li welatê me nîn e.

Genim di mala me de nîn e.

Ez Kurd im, ez Ereb nîn im.

Em Tirk nîn in, em Kurd in.

Tune<sup>38</sup>

Tiştêkî me tune ye

Mala min tune ye.

Xwarîna me tune ye.

---

<sup>38</sup>Tune, îşkera (heyîn) bi xwe ye di rewşa nakirinê de:  
Mala min heye.      Mala min tune ye.

### 1.2.3.5.8 Lêkera bûn

Ev lêker du wateyan dide, emê bi mînan wan şirove bikin.

1.

Ez dibim rojnamevan.

Ez dibim şervan.

Ewê bibe aqilmendekî mezin.

2.

Ez hozan im.

Ew aqilmend e.

Em şervan in.

Emê di wateya duwemîn de lêkera (bûn) veguhêzin.

#### Nihok

Ez im                      Ez Kurd im                      Ez dê me

Tu yî                      Tu Kurd î                      Tu dê yî

Ew e                      Ew Kurd e                      Ew dê ye

Em in                      Em Kurd in                      Em dê ne

Hûn in                      Hûn Kurd in                      Hûn dê ne

Ew in                      Ew Kurd in                      Ew dê ne

Ne ez im                      Ez ne Kurd im                      Ez ne dê me

#### Nihokê pêşro

Ez bim                      Ez Kurd bim

Tu bî                      Tu Kurd bî

Ew be	Ew Kurd be
Em bin	Em Kurd bin
Hûn bin	Hûn Kurd bin
Ew bin	Ew Kurd bin.

Pêşedem

Dê ez bim	Ezê Kurd bim
Dê tu bî	Tê Kurd bî
Dê ew be	Ewê Kurd be
Dê em bin	Emê Kurd bin
Dê hûn bin	Hûnê Kurd bin
Dê ew bin	Ewê Kurd bin

Buhêrk

گهز گهز تاره

Ez bûm	Ez Kurd bûm
Tu bûyî	Tu Kurd bûyî
Ew bû	Ew Kurd bû
Em bûn	Em Kurd bûn
Hûn bûn	Hûn Kurd bûn
Ew bûn	Ew Kurd bûn

Mêjbuhêrk

بافه بامه

Ez bûbûm	Ez Kurd bûbûm
----------	---------------



Fermanî

Bibe	Kurd bibe
Bibin	Kurd bibin

Lavij

بیلان کوردی بامان

Ez bama	Ez Kurd bama
Tu bayî	Tu Kurd bayî
Ew ba	Ew Kurd ba
Em bana	Em Kurd bana
Hûn bana	Hûn Kurd bana
Ew bana	Ew Kurd bana

(bibûma)

Nihokê Lavij

Ezê bama	Ezê Kurd bama
Tuyê bayî	Tê Kurd bayî
Ewê ba	Ewê Kurd ba
Emê bana	Emê Kurd bana
Hûnê bana	Hûnê Kurd bana
Ewê bana	Ewê Kurd bana

Bijoke

بیلان کوردی بامان

Ez bûbama	Ez Kurd bûbama
Tu bûbayî	Tu Kurd bûbayî

(bûbûma)



Ew bûba  
Em bûbana  
Hûn bûbana  
Ew bûbana

Ew Kurd bûba  
Em Kurd bûbana  
Hûn Kurd bûbana  
Ew Kurd bûbana

Nihokê bijoke

Ezê bûbama  
Tuyê bûbayî  
Ewê bûba  
Emê bûbana  
Hûnê bûbana  
Ewê bûbana

Ezê Kurd bûbama  
Tê Kurd bûbayî  
Ewê Kurd bûba  
Emê Kurd bûbana  
Hûnê Kurd bûbana  
Ewê Kurd bûbana

Guman

Ez bûbim  
Tu bûbî  
Ew bûbe  
Em bûbin  
Hûn bûbin  
Ew bûbin

Ez Kurd bûbim  
Tu Kurd bûbî  
Ew Kurd bûbe  
Em Kurd bûbin  
Hûn Kurd bûbin  
Ew Kurd bûbin

Nihokê guman

Ezê bûbim

Ezê Kurd bûbim

Tuyê bûbî	Tê Kurd bûbî
Ewê bûbe	Ewê Kurd bûbe
Emê bûbin	Emê Kurd bûbin
Hûnê bûbin	Hûnê Kurd bûbin
Ewê bûbin	Ewê Kurd bûbin

### Nasîn

Bi nav, rengdêr û cinavan re lêkera bûn biserê xwe tê nivîsandinê.

Ez Kurd im	Ez baş im	Ez çê me	Ez im
Tu Kurd î	Tu baş î	Tu çê yî	Tu yî
Ew Kurd e	Ew baş e	Ew çê ye	Ew e
Em Kurd in	Em baş in	Em çê ne	Em in
Hûn Kurd in	Hûn baş in	Hûn çê ne	Hûn in
Ew Kurd in	Ew baş in	Ew çê ne	Ew in

Lê bi lêkeran re, bi lêker ve tê nivîsandinê:

Ez diçim	Em diçin
Tu diçî	Hûn diçin
Ew diçe	Ew diçin

1.2.3.5.9 Veguhastin lêkera hebûn: Hebûn Hebe

<u>Nihok</u>	<u>Nihokê pêşro</u>	<u>Pêşedem</u>
Ez heme	Ez hebim	Ezê hebim
Tu heyî	Tu hebî	Tê hebî
Ew heye	Ew hebe	Ewê hebe
Em hene	Em hebin	Emê hebin
Hûn hene	Hûn hebin	Hûnê hebin
Ew hene	Ew hebin	Ewê hebin

<u>Buhêrk</u>	<u>Lavij</u>	<u>Bijoke</u>
Ez hebûm	Ez hebama	Ez hebûma
Tu hebûyî	Tu hebayî	Tu hebûyî
Ew hebû	Ew heba	Ew hebûya
Em hebûn	Em hebana	Em hebûna
Hûn hebûn	Hûn hebana	Hûn hebûna
Ew hebûn	Ew hebana	Ew hebûna

<u>Guman</u>	<u>Nihokê lavij</u>	<u>Nihokê bijoke</u>
Ez hebim	Ezê hebama	Ezê hebûma
Tu hebî	Tê hebayî	Tê hebûyayî
ew hebe	Ewê heba	Ewê hebûya
Em hebin	Emê hebana	Emê hebûna
Hûn hebin	Hûnê hebana	Hûnê hebûna
Ew hebin	Ewê hebana	Ewê hebûna

1.2.3.5.9 Veguhestina lêkerên derhingêv di demên derbasbûyî de

Lêkera dîtin (KDB) dît

(min, te, wî, wê, me, we, wan)dît / dîtin

Kê / kî çi dît? Kî / kê çi dîtin?

Kiryar	Berkar	Buhêrk
Te, wî, wê, wan	ez	dîtim
Min, te, me, we, wan	tu	dîtî
Te, wî, wê, we, wan	ew	dît
Min, wî, wê, me, wan	em	dîtin
Min, te, wî, wê, me, wan	hûn	dîtin
Min, te, we, wan	ew	dîtin
Min, te, wî, wê, me, wan	xwe	dît

Kiryar	Berkar	Mêjbuhêrk
min te wî wê we wan	ez	dîtibûm
min te wî wê we wan	tu	dîtibûyî
min te wî wê we wan	ew	dîtibû
min te wî wê we wan	em	dîtibûn
min te wî wê we wan	hûn	dîtibûn
min te wî wê we wan	ew	dîtibûn
min te wî wê we wan	xwe	ditibû

Kiryar	Berkar	Bicibuhêrk
min te wî wê we wan	ez	dîtime
min te wî wê we wan	tu	dîtiyî
min te wî wê we wan	ew	dîtiye
min te wî wê we wan	em	dîtine
min te wî wê we wan	hûn	dîtine
min te wî wê we wan	ew	dîtine
min te wî wê we wan	xwe	dîtiye

Kiryar	Berkar	Kêmbuhêrk
Te, wî,wê,me, wan	ez	didîtim
Min,te,me,we,wan	tu	didîtî
Te,wî,wê,we,wan	ew	didît
Min,wî,wê, me,wan	em	didîtin
Min, te,wî,wê,me	hûn	didîtin
Min,te,wî,wê,me,we,wan	ew	didîtin
Min,te,wî,wê,me,we,wan	xwe	didît

Kiryar	Berkar	Lavij
min te wī wē we wan	ez	bidītama
min te wī wē we wan	tu	bidītayī
min te wī wē we wan	ew	bidīta
min te wī wē we wan	em	bidītana
min te wī wē we wan	hūn	bidītana
min te wī wē we wan	ew	bidītana
min te wī wē we wan	xwe	bidīta

kiryar	Berkar	Bijoke
te wī wē we wan...	ez	dītibūma
min wī wē we wan ...	tu	dītibūyayī
min te wī wē we wan ...	ew	dītibūya
min te wī we wē wan ...	em	dītibūna
min te wī wē we wan ...	hūn	dītibūna
min te wī wē we wan ...	ew	dītibūna
min te wī wē we wan ...	xwe	dītibūya



Kiryar	Berkar	Guman
Min ,te, wī, wê...	ez	dītibim
Min, te, wī, wê...	tu	dītibī
Min, te, wī, wê ...	ew	dītibe
Min, te, wī, wê...	em	dītibin
Min, te, wī, wê...	hûn	dītibin
Min, te, wī, wê...	ew	dītibin

Di veguhastina lêkerên derhingêv, di demên derbasbûyî de, kiryar di awayê tewandî de û berkar di awayê rast de tê bikaranînê. Lê di nihok û pêşerojê de, kiryar di awayê rast de û berkar di awayê tewandî de tê bikaranînê:

Ez (te, wī, wê, me, we, wan) dibînim.

Ez xwe dibînim.

Tê (tuyê) min bibînî.

Ewê wê bibîne.



Kiryar	Berkar	N. lavij
(Min,te,wî,wê,me,we,wan) ê	ez	bidîtama
(Min,te,wî,wê,me,we,wan) ê	tu	bidîtayî
(Min,te,wî,wê, me,we,wan) ê	ew	bidîta
(Min,te,wî,wê,me,we,wan) ê	em	bidîtana
(Min,te,wî,wê,me,we,wan) ê	hûn	bidîtana
(Min,te,wî,wê,me,we,wan) ê	ew	bidîtana

Kiryar	Berkar	N. bijoke
(Min,te,wî,wê,me,we,wan) ê	ez	dîtibûma
(Min,te,wî,wê,me,we,wan) ê	tu	dîtibûyayî
(Min,te,wî,wê,me,we,wan) ê	ew	dîtibûya
(Min,te,wî,wê,me,we,wan) ê	em	dîtibûna
(Min,te,wî,wê,me,we,wan) ê	hûn	dîtibûna
(Min,te,wî,wê,me,we,wan) ê	ew	dîtibûna

Kiryar	Berkar	N. guman
(Min,te,wî,wê,me,we,wan) ê	ez	dîtibim
(Min,te,wî,wê,me,we,wan) ê	tu	dîtibî
(Min,te,wî,wê,me,we,wan) ê	ew	dîtibe
(Min,te,wî,wê,me,we,wan) ê	em	dîtibin
(Min,te,wî,wê,me,we,wan) ê	hûn	dîtibin
(Min,te,wî,wê,me,we,wan) ê	ew	dîtibin

Di demên derbasbûyî de, lêkera derhingêv bi berkar ve tê girêdanê û li gor wî tê veguhastinê.

Veguhetina lêkerên derhungêv di nihok û pêşedemê de

Lêkera dîtin                      KDN    bîn

Kî, kê/ çi dibîne?              Kiyê,kê/ çi dibîne?

Kiryar	Berkar	Nihok
Ez	xwe,te,wî,wê,me,we,wan	dibînim
Tu	min, xwe,wî,wê,me,we,wan	dibînî
Ew	min, te, xwe,me, we, wan	dibîne
Em	min,te,wî,wê,xwe,we,wan	dibînin
Hûn	min,te,wî,wê,me,xwe,wan	dibînin
Ew	min,te,wî,wê,me,we,xwe	dibînin

Kiryar	Berkar	Pêşedem
ezê	xwe,te,wî,wê,me,we,wan	bibînim
Tê	min, xwe,wî,wê,me,we,wan	bibînî
Ewê	min, te, xwe,me, we, wan	bibîne
Emê	min,te,wî,wê,xwe,we,wan	bibînin
Hûnê	min,te,wî,wê,me,xwe,wan	bibînin
Ewê	min,te,wî,wê,me,we,xwe	bibînin

Di pêşedemê de, ê (dê, wê) dawiya kiryar  
(ez, tu, ew, em, hûn, ew) digire

Di demên nihok û pêşedemê de, lêkera derhingêv bi kiryar ve tê girêdanê û li gor wî tê veguhastinê.

Veguhastina lêkerên derhingêv yên cemkirî:  
Lêkera hilgirtin koka dema niha (KDN) hil - gir  
Kî, kê/ çi hildigire? Kiyê, kê/ çi hil(bi)gire?

Kiryar	Berkar	Nihok
Ez	xwe,te,wî,wê,me,we,wan	hildigirim
Tu	min,xwe,wî,wê,me,we,wan	hildigirî
Ew	min,te,xwe,me,we,wan	hildigire
Em	min,te,wî,wê,xwe,we,wan	hildigirin
Hûn	min,te,wî,wê,me,xwe,wan	hildigirin
Ew	min,te,wî,wê,me,we,xwe	hildigirin

Di pêşedemê de, (ê) dawiya kiryar (ez, tu, ew, em, hûn, ew) digire û ( bi ) dikeve navbera herdu perçeyên lêker.

### 1.2.3.5.11 Çend lêkerên hîmî

Rader	KDN	KDB	Fermanî
kirin	k	kir	bike
bûn	b	bû	bibe
anîn	în	anî	bîne
girtin	gir	girt	bigire
xwarin	xw	xwar	bixwe
dan	d	da	bide
man	mîn	ma	bimîne
çûn	ç	çû	biçe
hatin	ê	hat	were
gotin	bêj	got	bêje
firotin	firoş	firof	bifiroşe
xistin	x	xist	bixe
ketin	kev	ket	bikeve
axaftin	axiv	axift	baxive
avêtin	avêj	avêt	bavêje
jîn	jî	jî	bijî
ajotin	ajo	ajot	bajo
birin	b	bir	bibe
dîtin	bîn	dît	bibîne
hiştin	hêl	hişt	bihêle

gihîştin	gihîj	gihîşt	bigihîje
kuştin	kuj	kuşt	bikuje
lîstin	lîz	lîst	bilîze
mirin	mir	mir	bimire
şûştin	şo	şûşt	bişo
xwastin	xwaz	xwest	bixwaze
bihîstin	bihîz	bihîst	bibihîze
birâştin	birêj	birâşt	bibirêje
cûtin	cû	cût	bicû
dotin	doş	dot	bidoşe
dizîn	diz	dizî	bidize
hejmartin	jimêr	hejmart	bijimêre
maliştin	mal	malişt	bimale
pan	pê	pa	bipê
parastin	parêz	parast	biparêze
ristin	rês	rist	birêse
sûtin	sû	sût	bisû
jentin	jen	jent	bijene
zan	zê	za	bizê
pûn	pû	pû	bipû
dirûtin	dirû	dirût	bidirû
rîtin	rî	rît	birî



### 1.2.3.6 Hoker

Hoker peyvek e neguhêrbar e, reng, rewş, kirin, cih û hejmara lêkeran diyar dike. Wateya wan temam dike. Hoker bi serê xwe nayê bikaranînê. Dema ku bi serê xwe be tenê navek e ne bêtir. Gelek caran mirov di navbera hoker û rengdêran de şaş dibe. Jibo ku em cudahiya di navbera wan de diyar bikin, em dibêjin: Hoker rengdêrê lêkeran e. Lebat û bizava lêkeran di nav rewş û rengê navdêran de diyar dikin.

Şoreşa nûjen hat.

Em vê hevokê nas dikin ku "nûjen" rewş, pesin, salix û rengê şoreşê diyar dike. Şoreş jî, di hevokê de navdêr e. Jibo vê peyva (nûjen) rengdêr e. Lê dema em bibêjin:

Şoreş nûjen hat.

peyva (nûjen) di vê hevokê de rengê lêkera hatin diyar dike. Bizav û lebata „hat" diyar dike. Jibo vê peyva "nûjen" di vê hevokê de hoker e. Herwiha em dibêjin:

Min xortê "jîr" dît	Rengdêr
Min xort "jîr" dît.	Hoker
Berfa "par" barî	Rengdêr
Berf "par" barî	Hoker



Tê xuyakirinê ku zêder girêdanê di navbera rengdêr û navdêr de çêdike, dema ku zêder radibe rengdêr bi lêker ve tê girêdanê û dibe hoker.

Di kurdî de (5) pênc beşên hokeran hene:

1. Hokerên ku dema lêker diyar dikin: Hokerên demîn
2. Hokerên ku cihê lêker diyar dikin: Hokerên cihîn
3. Hokerên ku rewşa lêker diyar dikin: Hokerên çawanî
4. Hokerên ku hejmarê lêker diyar dikin: Hokerên hejmarî
5. Hokerên pirsiyarî.

#### 1.2.3.6.1 Hokerên demîn

Ev hoker kirin û bûna lêker di nav deman de diyar dikin û bersiva van pirsan didin:

Kengî?

Çi demê?

Çi çaxî?

Ez çûm Hewlêrê.

Kengî?

Ez par çûm Hewlêrê.

Min şoreşgerek dît.

Çi demê?

Min îro şoreşgerek dît.

Gelek hokerên demîn hene. Ji van hokeran em çendekan rêz dikin: Niha, duh, pêr, pitirpêr, sibe, dusibe, sêsibe, îro, êvarî, îşev, şevadin, şevtiradin, par, pitirpêrar, îsal, danê sibê, danê êvarê, kêliyadin, demadin, berê, dereng, havînê, payîzê, zivistanê, biharê, hinga, hêj, hingorê, nîvro, berî nîvro, piştî nîvro, nîvşev, nîvêşevê, piştînişev, nijkêve, paşve, pêşde, paşîvê, zû, zûde, zûve, dewra berê, wêrojê, wêşevê, mêj, îne, şemiyê,... ûwd.

Herwiha hemû peyvên ku dem, heyam û çaxan diyar dikin dikarin bibin hokerên demîn.

#### 1.2.3.6.2 Hokerên cihîn

Ev hoker cihê kirin û bûna lêker diyar dikin û bersiva van pirsan didin:

Li ku?

Li ku derê?

Ku ve?

Çi cihî?

Ez hilkişiyam.

Bi ku ve?

Ez hilkişiyam jor.

Ez çûm.

Ku derê?

Ez çûm cem mamoste.

Ez ketim.

Çi cihî?

Ez ketim bin masê.

Em çend hokerên cihîn li jêr rêz dikin:

Ser, ber, bin, pêş, paş, cem, nik, bal, berjêr, berjor, der, hindir, kêlek, tenişt, alî, derve, dor, hêl, navber, nav, pêşber, rast, çep, rex, serbiser, seranser, serdest, bindest, serjêr, serjor, xwar, vir, wir, ... ûwd.

Hokerên mîna : Dûr, nêzîk, pêşî û paşî, bi kêrî diyarkirina cihê lêker û dema wî jî, tên. Hokerên demîn û cihîn in. Ev jî, li gor bikaranîna hevokê tê nasînê.

Çûna min Qamişlo dûr e. demîn

Ez ji dûr tîm. cihîn

#### 1.2.3.6.3 Hokerên çawanî

Ev hoker rewş û rengê kirin û bûna lêkeran diyar dikin.

Lêker çawa bûye, çawa hatiye kirin nîşan dikin. Hokerên çawanî bersiva van pirsan didin:

Çawa?

Çilo?

Bi çi awayî?

Bi çi tentêlê?

Reşo dipeyîve. Çawa?

Reşo baş dipeyîve.

Ez xweş diçim dibistanê.

Bêrîvan bilez hatin.

Şêrîn hêdî hêdî çû bajêr.

Em çend hokerên çawanî rêz dikin:

Hêdî, hêdî hêdî, baş, qenc, rind, bihêz, giran, fireh, teng, xweş, tenê, bilez, rast, birastî, cot, yeko yeko, bibaşî, zû, nebaş, wisa, çê, çêtir, xirab, wiha, wilo, werge, durust, dirêj, kurt, sist, sert, nerm, tûj, hişk, sivik, hêdîka,... ûwd.

Daçeka "tir" mîna rengdêran dibe paşgîn ji hokeran re jî. Rewşa çilonyê bêtir dike. Herwiha "tirîn" digihîne tixûbê dawî.

Ez xweş hatim

Ez xweştir hatim

Ez xweştirîn hatim.

Min tu hişk dîtî

Min Şevîn hişktir dît

Min Rojîn hişktirîn dît.

#### 1.2.3.6.4 Hokerên hejmarî (çendanî)

Ev hoker pirbûn û hindikahiya kirin û bizava lêker diyar dikin  
û bersiva van pirsan didin:

Çend?

Çiqas?

Mamoste ji min re got.

Mamoste gelekî ji min re got.

Min hindik xwarin da şervanan.

Ez carna diçûm Amedê.

Ji hokerên hejmarî ev in: Gelek, pir, zehf, hinek, hindik, çend, hew, evçend, hinde, bes, çendek, carna, hewçend, hewqas, kêr, zêde, tenê, carek, ûwd.

#### 1.2.3.6.5 Hokerên pirsiyarî

Peyvên ku bi kêrî pirsiyariyê tên û bi awayekî pirsiyarî bizav û leбата lêkeran diyar dikin ji wan re hokerên pirsiyarî tê gotinê. Bersiva van hokeran bi xwe bizava lêker diyar dike. Lê kesê ku pirsê dike baş dizane bersiv çi ye. Tenê dipirse jibo neqayîlbûna xwe liser wê rewşê diyar bike.

Em çawa heta niha bindest in?

Ma kî nizane em jî mirov in?

Hokerên pirsiyarî û cînavên pirsiyarî:

Hoker û cînavên pirsiyariyê yek peyv in, lê cînav bi kêrî pirsê tê û bersivêkê dixwaze. Hoker jî, neqayîlbûna xwe liser rewşekê diyar dike.

Kîjan? Hem cînav û hem hoker e. Em dibêjin:

Kîjan me nas nake ku em gel in?

Kîjan gul xweşik e?

Kîjan di hevoka yekemîn de hoker e û di hevoka duyemîn de cînav e. Ji hokerên pirsiyarî ev in:

Ma, çi, kî ye, çi ye, gelo, kînga, ku, kî, kê, bi çi, çira, çilo, çawa, çend, kîjan, çito, çer, çi dem, çima, jiku, ... ûwd.



### 1.2.3.7 Daçek

Daçek peyveke neguhêrbar e. Bi serê xwe wateyeke taybetî nayîne pê. Bê daçekan axaftin nabe: Celebên daçekan ev in:

1. Daçekên lêkerî (lêkerçêker).
2. Daçekên raweyî.
3. Daçekên navdêrî.
4. Daçekên erênî.
5. Daçekên nayînî.
6. Daçekên pirsiyarî.
7. Daçekên egerî.
8. Daçekên vekitî.

#### 1.2.3.7.1 Daçekên lêkerî

Ev daçek pêşgînên ku di çêkirina lêkeran de tên bikaranîne ne. Ji van daçekan:

Ve, ra, hil, ba, jê, tê, têk, vê, wer, çê, ber, da, der, hin, lê, pê, pêk, rû, ser, bin, pey, nav, pêş, paş, jev, lev, pev, tev, dû, hev, ûwd.

Ve Vexwendin, vegirtin, vemirandin,  
vebûn, vedan,...

Ra Raketin, rakirin, rabûn, raxistin, razan,  
rakişandin,...



Hil	Hildan, hilgirtin, hilkişandin, hilpişkîn, hilweşandin,...
Ba	Badan,
Jê	Jêkirin,
Tê	Têgihîştin,
Têk	Têkdan,
Vê	Vêxistin
Wer	Wergerandin,
Çê	Çêkirin,
Ber	Berxistin,
Da	Dagirtin,
Hin	Hingavtin,
Lê	Lêgerîn,
Pê	Pêvedan,
Pêk	Pêkanîn,
Rû	Rûniştin
Ser	Serkeftin,
Bin	Binkeftin,
Pey	Peyketin,
Nav	Navdan,
Pêş	Pêşketin,
Lev	Levhatin,
Pev	Pevçûn,

Tev     Tevdan,  
Dû     Dûketin,  
Hev     Hevgirtin

#### 1.2.3.7.2 Daçekên raweyî

Ev daçek di veguhastina lêkeran de tên bikaranînê.

Daçekên raweyî ev in:

Jibo nihok: di

Ez diçim dibistanê.

Jibo pêşedemê: ê (dê, wê) - bi

Ezê biçim dibistanê.

Jibo raweya fermanî: bi

Bilezîne li me dereng e.

Jibo raweyên hekeyî:

Ger , eger, heke, ku, heker, dibe, belkî.

Eger ez biçûma dibistanê, ezê fêrbibûma.

Dibe ku ez çûbim bajêr.

Ku ez çûbama welêt ezê dilgeş bibama.

Belkî min ew pirtûk xwendibe.

#### 1.2.3.7.3 Daçekên navdêrî

Ev daçek navan ditewînin. Daçekên navdêrî ev in:

bi, di, ji, li,

Ez ji bajêr têm.  
Min ji mamoste re got.  
Em bi Amedê ve çûn.  
Ez di Qamişlo re çûm Dêrikê.  
Ez par li Hewlêrê bûm.

#### 1.2.3.7.4 Daçekên erênî

Ev daçek bi kêrî erêkirina rewşekê tên. Daçekên erênî ev in:  
Bila dilê te xweş bibe.  
Belê, ez te nas dikim.  
Erê, Şêrîn hevala min e.  
Herê, ez Mem û Zîna Xanî dixwînim.  
A, ez ji Şirnexê me.  
Jixwe tu min nas dikî.

#### 1.2.3.7.5 Daçekên nayînî

Ev daçek rewşekê dîkin darêja nakirinê. Daçekên nayînî ev in:  
Bê tu bêjî ez dizanim tu Kurd î.  
Neçe biyanîyê, biyanî mirin e.  
Ez naxwazim bêrûmet bijîm.  
Ez nikarim bê serxwebûn û azadî bijîm.  
No, ez te nas nakim.

Naxêr, ez bindestiyê napejirînim.

#### 1.2.3.7.6 Daçekên pirsiyarî

Bi van daçekan pirs tên kirinê. Daçekên pirsiyarî ev in:

çawa, çer, çima, çira, çito, gelo, ka, ma, qey, bira, wa, weh, wey.

Çawa tu hatî?

Çima tu li me napirsî?

Gelo tu çûbûyî ku derê?

Qey tu ji gund tê?

#### 1.2.3.7.7 Daçekên egerî

Ev daçek sedema karekî, kirinekê yan jî, rewşekê vedikin.

Daçekên egerî ev in:

Da, daku, jiber, jiberku, jibo, bo, ku, seba, sedem, lewre, çinku, çimkî,..

Hogir tiving kirî da biçe şoreşê.

Jiber ku welatê me bindest e, zimanê me jî, qedexe ye.

Jibo pêşxistina zimanê kurdî yekîtiyeke zimanzanan pêwîst e.

Serxak û binxaka me talan dibe lewre em xêzan û jar in.

Herdem em bûne leşkerên biyaniyan seba ku em li xwe xwedî derneketine.

#### 1.2.3.7.8 Daçekên vekitî

Daçekên vekitî ev in:

Ba, bal, belkî, bes, bese, cardî, cem, sipas, dîsa, êdî, gel, ger, gor, heçî, her, heta, şabaş, heya, hingî, lew, lewma, lewre, mîna, nik, jixwe, tewrî, wekî, wilo, ,wisa, xwezka, xwezî, tenê,... ûwd.

Êdî em ji xewa mirinê hişyar bûn.

Dîsa li welatê me kuştin û talan e.

Ger em azad bibin hingî emê mîna mirovan bijîn.

Êdî bes e ev zilm û zor.

### 1.2.3.8 Gihanek

Gihanek peyveke neguhêrbar e. Du peyvan, du hevokan yan jî, peyv û hevokekê bi hev girê dide. Gihanek sê beş in:

#### 1.2.3.8.1 Gihanekên xwerû

Jî, jî, ku, lê, lo, û.

Roja xweş ji serê sibê xuya ye.

Ez jî, mîna te Kurd im.

Ew sîxurê ku te dît hat kuştinê.

Ev xweş e lê kin e.

Ezê biçim şoreşê lo tu kêfxweş be.

Ez şoreşger û aşitîxwaz im.

#### 1.2.3.8.2 Gihanekên dubare

Jî ... jî, carna ... carna jî, çiqas ... çiqas jî,

çawa ... ewqas jî, hem...hem jî, ne...ne,

ne ... ne jî, ya ... ya, yan ... yan jî, ..

Dijminê me diz e jî, şêr e jî.

Carna berf dibare carna jî, baran.

Çiqas em bixebitin ewqas jî, emê pêşkevin.

Çawa tu biçînî wisa jî, tê biçînî.

Hem şoreşger e hem jî, karker e.

Ne diçe kar ne diçe dibistanê.

Ya dimire ya dimîne.  
Yan Kurdistan yan jî, Kurdistan.  
Yan serkeftin yan serkeftin.

#### 1.2.3.8.3 Gihanekên daçekî

Ev gihanek bi xwe daçek in, lê bi awayê gihanekan tên bikaranînê. Gihanekên daçekî ev in:  
Digel, gel, lewre, mîna, wekî, loma.  
Dema min Bêrîvan dît digel komek gerîla bû.  
Xebat çû şoreşê Hogir gel wî çû.  
Min doza serxwebûnê dikir loma dijmin ez girtim  
Zora şorşgerî xurt dibe loma dijmin hinekî me dipejirîne.  
Ew mîna dijmin dihizire .  
Şervan xwe wekî berpirsiyarekî gelî dibîne.



### 1.2.3.9 Bang ( Deng, Baneşan )

Bang peyveke neguhêrbar e. Reng nade navdêr û peyvan û bi wan nayê kişandinê. Ev peyv gazî, kovan, hawar, şahî û dilxweşiyên diyar dîke. Bang bi sê beşan par dibin:

1. Bangê gazîkirinê
2. Bangên dilxweşî û şahiyê
3. Bangên êş û kovanan

#### 1.2.3.9.1 Bangên gazîkirinê

Dema ku buyerek bê serê mirov û bixwaze derdorên xwe bi hawarekê bihesîne, ev bang tîn bikaranîne:

Hey, ey, gelî, gidî, lê, lêlê, lo, lolo, haware, wey lo, wey lê, hey lo, hey lê, hey hey.

Hey welato hey welato

Tu yî xemla rojhilat

Ji Asûr ta bû çar qet

Tim liser te kêferat

Gelî Kurdan rabin ev roja me ye.

Lo xorto! Lê keçê! Hawar rabin li me dereng e.

Ey rêberê zane rêkêş seyda û jîr

Dengê perîşana mamoste Kemal Pîr

#### 1.2.3.9.2 Bangên dilxweşî û şahiyê

Ev bang di dilxweşî û şahiyên de tîn bikaranînê. Ew jî, ev in: Êh, hah, hih, ox, xweş,

Êh, ev roj xweş e!

Hah te çî baş got!

Ox te dilê min bi vê peyvê şad kir!

Xweş ev çî awazeke bêmirin e!

#### 1.2.3.9.3 Bangên êş, nifrîn û kovanan

Ev bang di êş, nexweşî, poşmanî û aciziyê de tîn avêtinê.

Ew jî, ev in: Ax, ay, of, nifir, tuf, wax, wey.

Ax ez ketim çî rewşê!

Ay dilê min!

Of serê min çî dêşe!

Nifir li vê dema bêbext!

Tuf li sîxurên xwefiroş!

Wax ev çî rewşeke zor e!

Wey li minê dayê!

#### 1.2.4 Hevok

Hevok yekîtiyek naverokî ye. Ev yekîti bi beşên axaftinê saz dibe û bi nivîskî yan bi devîkî têgihîştinekê bi mebesta dîtinekê, ramanekê, daxwazekê, hisekê yan wêneyê bûyerekê tîne ziman. Di avahiya hevokê de, nav, lêker, cînav, rengdêr, hejmar, hoker, daçek, gehandek û bang cihê xwe, her yek bi awayekî digire. Bi yekbûna vê koma peyvan wateyek ku mirov liser tişteki agahdar dike saz dibe. Mînak Ezê sibe biçim Amedê.

Min rewşa Azad li biyanîyê dît.

Ez gelek bi diyariya te dil xweş bûm.

Jiyan xweş e.

Ax ! Ev çi rewş e !

Têgihîştina hevokê pir caran bi beşên avahiya wê ve girêdayî ye.

1. Dema em dibêjin:

Jiyan xweş e.

Yê dipeyîve ramana xwe liser jiyanê tîne ziman. Lê dema li dawîya vê hevokê li şûna xalê ( niqtê ) xalepirs ( nişana pirsê ) bê danîne:

Jiyan xweş e?

Yê ku dipeyîve dixwaze ji mirovekî din, ramana wî liser jiyane hîn bibe. Hevoka yekemîn agahdarî ye. Mirov dikare bi ( bêjehevok ) bi nav bike. Ya duyemîn jî, hevokê pirsiyarî ye. Mirov dikare bi ( pirsehevok ) bi nav bike.

2. Pir caran girêdana lêker bi beşên din yê axaftinê re, me liser hevokê dike xwedî têgihîştinek taybetî. Dema em dibêjin:

Hogir dijî.

Hogir li çiyane dijî.

Hogir jiyane xweş dijî.

Lêkera ( jîn ) li dijî ( mirin ) tê bikaranînê yan jî, cih û rengê jiyane diyar dike. Lê pir lêkerên din bi yek wateyê tên bikaranînê. Mîna:

Hogir dixwîne. ( xwendin )

3. Di axaftina devikî de, bi ahenga deng têgihîştina hevokê çêdibe. Her renekî hevokê ahengek xwe taybetî heye. Ji vê ahengê mirov dizane pirs e, agahdarî ye yan jî, fermanî ye.

### 1.2.4.1 Avahiya hevokê

#### 1.2.4.1.1 Hevokên lêkerî

Hevok di Kurmancî de, bi gelemperî bi vî awayê jêr tê sazkirinê:

<u>Kiryar</u>	<u>Aqahdarî / Berkar</u>	<u>Lêker</u>
Ez	çayê	vedixwim.
Ew	gulan	av dide.
Berfîn	berxan	diçêrîne.

Lê bi hin lêkerên nederhingêv re ku bizava wan berbi aliyekî ve ye. Mîna:

çûn, ketin, hatin, firîn, bûn ( bi wateya çêbûn )... bi awayê jêr tê sazkirinê:

<u>Kiryar</u>	<u>Lêker</u>	<u>Aqahdarî</u>
Ez	diçim	gund.
Guhderz	ket	çalê.
Şêrîn	hat	bajêr.
Mado	bû	şoreşger.
Serdar	firî	asîmanan.

Eger bi van lêkeran re daçek bên bikaranînê û aliyê bizava lêker bê guherînê, hevok dîsa vedigere ser awayê xwe yê gelemper:

<u>Kiryar</u>	<u>Agahdarî</u>	<u>Lêker</u>
Ez	ji gund	diçim.
Guhderz	di çalê de	ket.
Şêrîn	ji bajêr	hat.
Serdar	di asîmanan re	firî.

Di hin rewşan de, lêker di darêja raderî de, tê bikaranînê û mîna navê mê tê tewandinê. Eger di van rewşan de, lêker bê kiryar be pêşiya hevokê digire:

Çûna zozanan xweş e.

Hatina biharê pîroz e.

Eger ev lêkerê di darêja raderî de bibe agahdarî di hevokên lêkerî de û bi lêkerekî din re bê, awayê jêr distîne:

Gulê, çûna bêriyê xweş dibîne.

Gel, hatina Newrozê pîroz kir.

Eger lêkerê derhingêv du berkaran bistîne, hevok awayê jêr distîne:

<u>Kiryar</u>	<u>Berkar 1</u>	<u>Lêker</u>	<u>Berkar 2</u>
Azad	gul	firotin	keçan.
Şêrîn	silav	da	şehîdan.
Min	nan	da	gerîla.



Eger berkarê duyemîn nedurust be<sup>39</sup>, hevok awayê jêr distîne:

<u>Kiryar</u>	<u>Berkar1</u>	<u>Berkar2</u>	<u>Lêker</u>
Şoreşgeran	nan	ji Gulê	xwestin.
Şermîn	navê gund	ji Şîlan	pirsî.

Pir caran hevok bi lêkerên nederhingêv re, bi kiryar û lêker çêdibe. Hingê bi vî awayî tê:

<u>Kiryar</u>	<u>Lêker</u>
Sûlav	raza.
Nermîn	hat.
Ez	dimeşim.
Ew	direve.
Em	diçin.

Eger hoker di hevokên lêkerî de hebe, bi awayên jêr tên sazkirinê:

1. Lêkerên nederhingêv:

<u>Hoker</u>	<u>Kiryar</u>	<u>Lêker</u>	<u>Berkar</u>
Piştî nîvro	Canda	gihîşt	Botanê.
Êvarê	Sernaz	diçe	dibistanê.

Yan jî, bi vî awayî:

---

<sup>39</sup>Berkarê nedurust herdem pêşiya lêker digire.



<u>Kiryar</u>	<u>Hoker</u>	<u>Lêker</u>	<u>Berkar</u>
Canda	Piştî nîvro	gihîşt	Botanê.
Sernaz	êvarê	diçe	dibistanê.

2. Lêkerên derhingêv:

<u>Hoker</u>	<u>Kiryar</u>	<u>Berkar</u>	<u>Lêker</u>
Kêliyek din	ez	çayê	vedixwim.
Niha	ez	nan	dixwim.

Yan jî, bi vî awayê jêr:

<u>Kiryar</u>	<u>Hoker</u>	<u>Berkar</u>	<u>Lêker</u>
Ez	kêliyek din	çayê	vedixwim.
Ez	niha	nan	dixwim.

Eger di van rewşan de, berkar nedurust be, lêker dikeve dawiya hevokê:

Piştî nîvre Canda ji Botanê diçe.

Sernaz êvarê ji dibistanê tê.

Ez niha xwe ji xwarina nan re amade dikim.

Hevok, di, raweya fermanî de, ji rêzana gelemper der  
nakeve:

Were em nan bixwin!

Werin em biçin Çiyayê Şerefdînê!

Jiyanê baş nas bike!

Bibe xwedyê jiyaneke birûmet!

#### 1.2.4.1.2 Hevokên navdêrî

Ev hevok ji nav, rengdêr û lêkera bûn tên sazkirinê. Tu  
bizavê nakin û di rewşa bûnê de dimînin. Herwiha berkar û  
kiryar di van hevokan de, nîn in:

Jiyana birûmet gelek xweş e.

Gundiyên Kurd leheng in.

Şoreş rûmeta gel e.

Berxwedan jiyaneke e.

Serxwebûn û azadî nêzîk in.

Zindan dibistana qehremaniyê ne.

Koledarî rûreşîya mirovayiyê ye.

#### 1.2.4.1.3 Hevokên bangê

Ev hevok dikarin mîna hevokên lêkerî û yên navdêrî jî, bîn:

1. Mîna hevokên navdêrî:

Ax, ev çî rewş e!

Oh xweş, ev çî awazek nemir e!  
Wey, li minê dayê!  
Tuf, li mirovên xwefiroş!  
Nifir, li vê dema bêbext !

2. Mîna hevokên lêkerî:  
Lo xorto ! Ji xew rabe dereng e!  
Ox, te dilê min xweş kir !  
Of, dilê min çiqas dêşe!  
Ax, ez ketime çî rewşê !

#### 1.2.4.2 Di hevokê de, niqteşanî

Jibo asankirina xwendin, têgihîştin û xweşkirina ahenga hevokê, çend nîşan di nav de, cih digirin.

Ev nîşan dawiya hevokê, wateya parçeyekî jê û daxwaza wê pêş me dikin. Li hêla din, di xwendinê de, cihê rawes û bîndanê jî, diyar dikin. Ji van nîşanan re niqteşanî tê gotinê.

Nîşanên niqteşaniyê jî, ev in:

.	Xal ( Niqte )
,	Dabir ( Bihnok )
?	Xalepirs ( Niqtepirs )
!	Xalebang ( Niqtebang )
:	Xalecot ( Niqtecot )
;	Xaledabir ( Niqtedabir )
( )	Kevanek
" "	Dunik
—	Xêzek
-	Bendek

. Xal

Ev nîşan dawiya hevokê diyar dike:

Duh, ez çûm Amedê. Min şal û şapek kirî. Li wir min hevalekî xwe dît. Em gelekî bi hev şa bûn. Li nav bajêr, min tiştên balkêş dît. Leşkeran kolan dagirtibûn.

## Dabir

Di nivîsandinê de, dabir pir pêwîst e. Cihên ku digire ev in:

1. Cihê gihaneka ( û ):

Hogir, Azad, Rojîn û Rewşen ji bajêr tîn. Ev ciwan pir hişyar in. Dost û dijmin ji hev nas dikin, xwedî bawerî ne, jiyane nas dikin û riya xwe baş dizanin.

2. Dikeve navbera parçeyên hevokê yê biçûk, lê bi mercê ku wateya wê neyê guherandinê.

ê Piştî jî, tê:

Çiya, cihê rûmeta me, hem jî, ji pîrozahiyên me ne.

ê Pir caran, di...de, di...re, bi...ve, ji...re,...di nava du dabiran de, cih digirin:

Di rewşên awarte de, hevalên min, ji min re, dibin aqilmend. Ez, ji te re, dibêjim ku em biçin çiyê baş e.

ê Piştî kiryarê ku ji lêkerê xwe dûr dikeve tê:

Şêrîn, di rojêke bi berf, baran û bager de, hat rûdinê.

Ez, di sala hezar û nehsed û şêstî de, ji dê bûme.

Reşo, jiberku nizane bixwîne, matmayî dimîne.

8 Piştî banglêkirinê tê:

Mizgîn, li min binêre û gotinên min guhdar bike.

Xebat, ku tu çûyî Şerefdînê hevalan silav bike.

? Xalepirs

Dikeve dawîya hevokên pirsîyariyê:

Tu kengê ji welat hatî?

Ew çi dixwaze?

Çend leşker hatin gund?

! Xalebang

Dikeve dawîya bang û hevokên bi wan re:

Ax ! Ev çi zemanekî xirab e!

Xwedêyo ! Te çawa li hev anî !

Oh xweş ! Çi mizgîneke baş e!

Kuro, bibe mirov!

: Xalecot

Dikeve dawiya hevokê ku tiştêk tê gotinê yan hejmartinê:  
Beyana sibê bû, bavê min ji xew hişyar bû û got: Ev çiya ji  
şer û kuştinê natirsin.  
Di dînê Zerdeşt de, sê baweriyên bingehîn hene: Peyva  
xweş, baweriyê rast û karê baş.

; Xaledabir

Dikeve navbera hevokên ku bi hev ve girêdayî ne û wateya  
hev temam dikin. Hîn hevok neqediya ye û babeteke nû  
dest pê dike:  
Reşo, bilez ji malê derdikeve; wisa xuya ye ku tiştêkî pêwîst  
qewmî ye.

( ) Kevanek

Peyvên ku bi sebebekê dikevin nav hevokê, dikevin nav  
kevanekan û rakirina wan jî, wateya hevokê naguherîne:  
Di Kurmancî de, du zayend hene ( nêr û mê ).

" " Dunik

Peyvên ku ji cihekî din tînin guhastinê di nav dunikan de, tînin  
nivîsandinê:

" Ay Ahora yê mezin " Zerdeşt digot.



\_ Xêzek

Eger nivîsandin ket awayê axaftinê û peyvbêj hat guhartinê,  
li pêşiya hevokê xêzek tê nivîsandinê:

Di navbera dil û mejî de, gotûbêjek germ dest pê kir:

\_ Jiyan pir xweş e!

\_ Lê du bindestî.

.....

- Bendek

Dikeve navbera du peyvên ku hogiriyek di nav wan de heye:

Birca - Belek

Kaniya - Spî

Bedir - Xan

Nasîn

Di Kurmancî de, nîşana herî pêwîst dabir e.

## EV XAK ŞEHÎDISTAN E, PÎROZ E BUHSTEKÊ BIPÎVE Û SERÇOK BIBE

Li vir jînê dest pê kir. Li vir yekemîn car birakujiyê bi Habîl û Qabîl tovê şer binax kir. Li vir roj bû Xweda. Agir bû Xweda. Li vir: Ey Ahora Zerdeşt bang kir. Tofan rabû. Nûh jiyan rizgar kir. Keleka mirovahiyê ji vir rabû û li vir cih dît. Dîsa radibe ji vir. Li vir hovîtiyê neyartî geş kir. Xaka vir, xwînê bi rengê xwe sor kir. Li her buhstekê gorê hezar carî devê xwe vekir. Hezar cendek hembêz kir. Liser vê xaka pîroz mirovahiyê bi hezar rengî xwe geş kir. Tofan û lehiyên kedxwaran lek bilek hatin û çûn. Lê mirovên vir serbilind man, mîna bejn û bala çiyayên xwe. Destên xwe dan bin goka rojê. Cihan renege reng ronî kirin. Demên tariyê, bi pêtên agir yên ji bedena xwe ronahî gur kirin.

Ev welatê rojê ye. Taristanê napejirîne. Li hember tariyê, li hember Ahrîman û şerxwazan herdem ji vir banga "BERXWEDAN JIYAN E" bilind dibe. Îro, stêrkên asîmanan şermdar in li vir. Mirovahiya kuştî dinale. Lê dîsa bi jiyane dil şad dibe li vir. Robotên ker, lal û kor dibin xwedî guh, ziman û çav. Li vir, liser vê xakê mirovahiya şermdar çariyên reş diçirîne. Bi rûmeta rojê biharên geş dixemilîne. Li vir, liser

vê xakê keçên rind, bedew û ciwan xwe ji zinaran werdikin jibo nebin nêçîra gur û hovan. Xortên enîbilind bi guleya xwe ya dawî giyan dispêrin. Xwesipariyê napejirînin. Eniya mirovahiya talankirî bi xalên reş nîşan dikin. Li vir şîrmij û mindalên bêguneh dibin armanca gule û gazên mirinê. Cenawir û hovên di kêsma mirovan de, welatê rojê û agirdankên pîroz bi cizmeyên xwe qirêj dikin. Bihuşta cihanê dikin dogeh. Lê ev der welatê rojê ye. Taristan nikare lê cih bigire. Her tîrêjek bi hezaran leşkerên Ahora dafirîne. Bi bişkivandina gulan re, bi pêlên bayê re, bi xuşîna Zap, Dîcla û Feradan re, bi bilûra şivanan re, bi kenê zarokan re, bi hêsirên çavên dayîkan re, bi kesera dilê dîliyên zindanan re lek bilek leşkerên Ahora tên daçikandin. Berbi rojê hildikişin. Li destê wan agirê pîroz e. Agirê Mihtra û Zerdeşt. Agirê bêvemirin ji kuçikê dîroka nemir gur û geş dikin.

Dîsa bang bilind dibe: "Berxwedan Jiyan e". Giyan liber mirovahiya kuştî digere. Geş dibe. Xwe bi pencên rojê dixemilîne. Madî rabûye li vir Madî! Ahrîman xwe bi paş de dikişîne. Şer di taristanê de winda dibe. Aştî, li welatê rojê nû dibe mêvan. Berbi cihaneke hemdem ve şax dide.

Ev welat Şehîdistan e! Eman!...Hêdî hêdî piyê xwe bavêje ser xaka wî! Pîroz e! Di her buhstekê de golek xwîn heye. Bi dehan şehîdên nenas hembêz dike. Liber bejnên wan yên

ku xwe dikişînin bilindahiya rojê serçok bibe. Xwe bitewîne,  
xaka Şehîdistanê ye ev xak!

Bahoz û bagerên zivistanê ji ber pencên rojê neçar mane.  
Bi şûn de direvin. Çirûska yekemîn ji zindanan birûsk veda.  
Li cihê Keleka Nûh bû mêvanê rojê. Şax û tîjkên xwe berbi  
gelî û zinarên Cûdî, Gebar, Herekol, Agirî, Bêxêr û Sîpanê  
Xelatê vekişandin. Mem û Zîn, Xec û Siyabend, Ferhad û  
Şêrîn, Edûl û Derwêş li xewna evîne hişyar kirin. Bi hev re  
kirin yek. Bi yek awazê hemû çiya û deştan singa xwe ji  
agirê nevemirî re vekirin. Bûn hêlîn û lûsên xwazgîniyên  
rojê. Pêt û tîjkan xwe vekişandin jêr û jor. Li banê gerdûnê  
belav bûn. Deşt û geliyên tarî, bajar û gund bi agirê germ û  
ron dil şad bûn. Sermest hejryan.

Îro, li welatê rojê govend û dîlan e. Dengê azadî û aştiyê  
sirûdên bêmirin dafirîne. Li baskên ewrên avis siwar dibin û  
pêl didin. Dîsa enîbilind berbi rojê ve diçin. Sersotkên xwe  
gur û geş dikin. Çira ji çirayê pê dikeve. Bi hezaran  
meşxelên azadiyê dimeşin. Li cihana bêguh, bêziman û  
bêçav dibin birûsk û tav. Xeml û rehela Mîdya li dar dixin.  
Radikin ser destan. bi rengên kesk, sor û zer berbi jor ve  
hildidin. Pêtên agir singa xwe ji cihaneke hemdem re  
vedikin. Keskezer li herhêlê vedidin. Li welatê rojê hêvî  
dixemile. Hêviya mirovahiyê, hêviya stoxwar û birçiyar ji



pencên roja Şehîdistanê mêweyên bihuştî dafirîne.  
Zehmetkêşên dîrokê dibin tîrêj û ronî. Bi rojê re dibin yek.  
Dibin agirê bizot. Stoyên keserkûran bi lala û dur  
dixemilînin. Ji hêsirên wan guliyên mindalan dihûnin.  
Welatê Rojê semawenda (daweta) jînê li dar xistiye. Lê  
eman! Li meşa xwe baldar bin! pêxwas û bêpêjin bimeşin!  
Her buhstek ji vê xaka pîroz bi dehan şehîdên bênav  
(nenas) hambêz dike. Ev axa Mîdya ye! Kurdistan e!  
Na...Şehîdistan e!...

## ÎSA, DÎSA TÊ XAÇKIRINÊ

*Giyana Xwedê liser min e! Ez şandime ku ji girtiyan re azadî û ji koran re bînahiyê bînim. Ezê ketiyan aza bikim. Ey mirovan! Hûn dizanin rûyê erd û asîmanan nas bikin! Lê çawa hûn nizanin vê demê nas bikin. Baweriya xwe bi min bînin. Ez rizgariya we me. Ji bo we hatime û ji bo we êş û azarê dikişînim!*

Berî duhezar sal ev bang ji Qudsa pîroz raperî û li rojhilatê pêl da. Lê çav kor bûn. Guh ker bûn. Ziman lal bûn. Dijminên ronahiyê xaç bi xwînê sor kirin. Perdeyên reş berdan ser banga azadî û

aştîyê û fetisandin. Niha jî, her ew deng e zîz dibe. Li Amedê, li Mihabadê û Hewlêrê, li Botan û Agirî, li Qamişlo û Efrînê û li her cihên Kurdistanê. Li hember vî dengê aştîxwaz bi hezaran xaç daçikandine. Perdeyên reş û tarî li pêşiya tîrêjên ronahiyê raxistine. Dîsa xwîn bi darê xaçan ve diherike. Kulîlk û gupik serên xwe ji nav pêlan radikin. Bi ronahiya rojê şa dibin.

Ey Îsayê Nûranî! Hilbijartiyê Xwedê yê birêz! Vê carê dûşopên te xaç û mîx amade kirine. Ji Elmaniya, ji Amerîka xaç diyarî Kurdistanê kirine. Dixwazin bi destê faşistên

nûjen banga te bifetisînin. Bêtirs hilkişe ser xaçên xwe. Ew baş dizanin êş û azarê bi mirovahiyê bikin. Baş dizanin şerê ronahiyê bikin. Xaç û mîxên sedsala bîstan ne mîna yên berî du hezar sal in. Di kuştina ronahiyê de pir pêşketin çêbûye. Belê! Dûşopên te, te bi destên faşistan xaç dikin. Lê xemgîn nebe. Dilovaniya wan jî heye. Li pey te digirîn û hêsiran dibarînin. "Bi guran re goşt dixwin û bi şivanan re şînê dikin". Tê guhê me peyvên te ji jinên Qudsa şerîf re ku liser êşa te digirîn û dinaliyan: *" Ey qîzên Qudsa pîroz liser min negirîn! Liser xwe û zarokên xwe bigirîn!*

*Lewre di rojên dê bên de, dê bibêjin xwezî bi wan ku zaro hîç ne anîne! Bi wan zikan ku hîç ne welidandine û bi wan çîçikan ku hîç şîr nedane! Hingê dê dest pê bikin ji çîyan re bibêjin biser me ve bikevin û ji giran re me veşêrin."* Gelo îro ji dûşopên xwe re tu çi dibêji?! Xaç û mîx ji destê wan in. Xaçkirin jî, ramana wan e. Lê dîsa liser te digirînin. Zagona reşatî û taristanê ye.

Banga xwe dubare bike. Em te dibihîzin tu çi dibêji: *" Ey sextekaran! Liser xwe bigirîn! Liser mirovahiya ku hûn dikujin bigirîn! Hûn dijminên rojê, baş min bi êşînin! Ez jibo mirovan êş û azarê hildigirim! Xwîna min bihara mirovahiyê ye! Xaçan daçikînin! Şaristaniya nû dê bê avakirin! Ez mîna giyanê me li biharan zîl didim! Li her cihî hatime daçikandin!*



*Ji nav xaka pîroz tovê jînê tîrêja rojê hembêz dike! Ez ronahî me! Ez roj û jiyana im! Bi xaçkirinê ez namirim! Ez giyan bi xwe me! Giyan jî nemir e! Lê hûn?! Roj wê bê ku xezeb liser we bibare! Ne erd û ne asîman we hildigirin! Lewre hûn munafiq û sextekar in! "*

Ey Îsayê Nûranî rizgarkarê mirovan! Kevoka aştiyê! "*Bi navê bav û kur û giyana pîroz Xwedê yek e ! Amîn!*" Ez rêdanê ji te dixwazim ku ji te bipirsim. Emê ji nû dest pê bikin. "*Eger yekî li rûyê te yê rastê xist yê çepê jî, jê re vegire!*" Te digot. Gelo ev ji herçih û zemanî re rast e? Tu dikarî îro vê gotinê dubare bikî? Ez bawer nakim! Jiber ku hovên vî zemanî di şûna zileyana de, napalim, gazên mirinê, top û panzeran bikar tînin. Eger li hember wan tu xwe neparêzî tu ji kokan radibî û doz dimire. Tu bê çareyî ku di şûna zileyê de diduyan li wan vegebin. Çiyana dihêrifînin. Gundana dişewitînin. Malan wêran dikin. Ka bêje min ey xundekarê bijartiyê Xwedê eger Xwedê jî bi hana kurê xwe ve neyê çare çî ye? Ku çiya hêrifî em nikarin çiyayekî din binin jibo dîsa bihêrifînin. Ku gund şewitî emê çawa gundekî din ava bikin. Ku mal wêran bû û xwedî kuştin wê kî careke din ava bike jibo dîsa wêran bikin. Eger mirovahî hemû hat xaçkirin tuyê jibo kê dozê bimeşîni? Jibo azadiya miriyan doz nîn e! Dilsar nebe ey Îsayê Nûranî! Banga te îro li

Kurdistanê bilind dibe. Bi ser her xaçan dikeve! Lê biborîne  
ku ev bang li gor demê hatiye nûkirin û bi  
"Berxwedan Jiyan e" hatiye xemilandin. Azadî û aşî bê  
berxwedan nayên cih. Her çiqasî dixwazin te dîsa -lê vê  
carê li Kurdistanê - xaç bikin jî, lê bi ser nakevin. Lew re  
daxwazên te bi berxwedanê tên cih.

## Çavkanî

- êBEDIRXAN, C. û LESCOT, R. Rêzimanê Kurdî  
êBEDIRXAN, C. Kovara HAWAR  
êKURDO, Q. Gramera Zimanê Kurdî  
êNEBEZ, J. Zimanê Kurdî Yê Yekgirtî  
êHAJO, Z. 20 Lektionen Für Deutsche  
êKARTAL, H. Navên Kurdî  
êKARTAL, H. Xebatên Neçapkirî  
êSAĐNIÇ, F. H. Hêmana Rêzimanê Kurdî  
êKURD, R. Rêzimanê Kurdî  
êRIZGAR, B. Dersên Zimanê Kurdî  
êSEBRÎ, O. Alfebêya Kurdî  
êBEDIRXAN, K. Rêzimanê Kurdî  
êCEGERXWÎN Rêzimanê Kurdî  
êXANÎ, E. Mem û Zîn  
êCIZÎRÎ, M. Dîwan  
êHEKARÎ, P. B. Dîwan  
êDUDEN Rêzimanê Almanî  
êLUSCHER, R. û SCHPÇPERS, R. Rêzimanê Almanî Yê Nû  
êHABECKER, P. Zeýchensetzung ( Almanî )  
êHEJAR Henbane Borîne - Ferheng  
êOMAR, F. F. Ferheng, Kurdî - Almanî  
êNÎZAMEDÎN, F. Ferheng, Kurdî - Erebi  
êELÎ, C. û EMÎN, M. Rêzimanê Zelal - Erebi  
êALANSARÎ, H. Rêzimanê Erebi

• KOVARA LÊKOLÎN  
• KOVARA STÊR  
• KOVARA REWŞEN  
• KOVARA ROJA NÛ  
• ROJNAMYA WELAT  
• ROJNAMEYA BERXWEDAN

**ISBN:3-930943-19-0**